

MESYUARAT KEDUA, PENGGAL KELIMA
PARLIMEN KEEMPAT BELAS
2022

HARI KHAMIS : 4 OGOS 2022

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 9 HINGGA NO. 113)**

NOTA : [RUJUK PENYATA RASMI HARIAN (HANSARD)]

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN NIK MOHAMAD ABDUH BIN NIK
ABDUL AZIZ (BACHOK)**

TARIKH : 4 OGOS 2022 (KHAMIS)

SOALAN

TUAN NIK MOHAMAD ABDUH BIN NIK ABDUL AZIZ (BACHOK) minta **MENTERI TENAGA DAN SUMBER ASLI** menyatakan langkah-langkah untuk memastikan pengambilan tanah projek ECRL memenuhi aspek kemampanan ekologi agar kesan kepada ekosistem untuk hidupan liar dan habitatnya terkawal.

JAWAPAN

Tuan Yang di-Pertua,

Kementerian Tenaga dan Sumber Asli (KeTSA) melalui Jabatan Ketua Pengarah Tanah dan Galian Persekutuan (JKPTG) bertanggungjawab melaksanakan urusan pengambilan tanah projek ECRL berlandaskan peruntukan undang-undang di bawah Akta Pengambilan Tanah 1960. Dimaklumkan bahawa tanah yang terlibat dalam pengambilan projek ECRL adalah di bawah tanggungjawab Kementerian Pengangkutan (MOT) dan dilaksanakan berdasarkan kajian serta keperluan teknikal projek tersebut.

Projek ECRL melibatkan jajaran sejauh 665 kilometer merentasi beberapa kawasan hutan simpan yang merupakan habitat kepada hidupan liar. Pelaksanaan projek ECRL ini akan mengakibatkan fragmentasi hutan yang memutuskan koridor (laluhan) hidupan liar dan membawa kepada kehilangan habitat yang luas. KeTSA mengambil perhatian terhadap aspek kemampuhan ekologi dan konservasi hidupan liar agar kesan kepada ekosistem untuk hidupan liar dan habitatnya adalah terkawal.

Sehubungan itu, KeTSA melalui Jabatan Perlindungan Hidupan Liar dan Taman Negara (PERHILITAN) telah menetapkan Pelan Pengurusan Hidupan Liar atau *Wildlife Management Plan* (WMP) sebagai prasyarat utama dalam kelulusan laporan Penilaian Impak alam Sekitar (*Environmental Impact Assessment* - EIA). WMP bertujuan sebagai langkah mitigasi terhadap hidupan liar yang terkesan dalam pembangunan projek dan ia memainkan peranan penting dalam menjaga dan menjamin kelestarian hidupan liar selari dengan pembangunan projek ini. Antara langkah-langkah mitigasi di dalam Wildlife Management Plan adalah:

1. Perlaksanaan program pengurusan konflik hidupan liar seperti kera dan babi hutan melalui pemasangan perangkap;

SOALAN NO : 9

2. Membina pagar dan tembok di sepanjang jajaran ECRL bagi menghalang hidupan liar dari memasuki landasan ECRL;
3. Pembinaan terowong di jajaran yang melalui hutan yang menjadi habitat hidupan liar seperti Tapir dan antara lokasi yang dicadangkan adalah di Gambang, Pahang;
4. Pembinaan viaduct untuk laluan hidupan liar seperti gajah di Kemasul Pahang; dan
5. Pembinaan culvert untuk laluan hidupan liar saiz kecil dan sederhana seperti beruang, kijang dan spesies kucing hutan.

Jabatan Perlindungan Hidupan Liar dan Taman Negara (PERHILITAN) juga telah memeterai perjanjian kerjasama dengan ECRL dalam pelaksanaan mitigasi hidupan liar di sepanjang jajaran ECRL sehingga tahun 2024.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN SIVAKUMAR VARATHARAJU
NAIDU [BATU GAJAH]
TARIKH : 04 OGOS 2022 (KHAMIS)

SOALAN

TUAN SIVAKUMAR VARATHARAJU NAIDU [BATU GAJAH] minta **MENTERI KEWANGAN** menyatakan sama ada Kerajaan berhasrat untuk berunding dengan pihak bank dan institusi kewangan yang lain untuk menempohkan tindakan kebankrapan terhadap pelanggan-pelanggan yang tidak mampu membayar pinjaman mereka kerana kekangan-kekangan pasca pandemik COVID-19. Berapa jumlah kes kebankrapan yang telah diistiharkan oleh mahkamah setakat bulan Jun 2022.

JAWAPAN

Tuan Yang di-Pertua,

Untuk makluman Ahli Yang Berhormat, sebelum sebarang tindakan kebangkrapan diambil, institusi kewangan dikehendaki untuk memastikan peminjam yang bermasalah dalam membayar balik pinjaman dilayan dengan adil dan diberi pertimbangan yang sewajarnya berdasarkan Prinsip Layanan Adil kepada Pengguna Kewangan dan Amalan Pembiayaan yang Bertanggungjawab yang dikeluarkan oleh Bank Negara Malaysia (BNM).

Bagi peminjam yang menghadapi kesulitan kewangan, termasuk yang masih belum pulih sepenuhnya dari kesan pandemik, institusi-institusi kewangan kekal komited membantu mereka. Sebagai contoh, sekiranya institusi kewangan mendapati peminjam memapar tanda-tanda kesukaran pembayaran balik (sebagai contoh, 1 bulan tidak berbayar) mereka akan menghubungi peminjam untuk memahami situasi peminjam dan menawarkan pelan pembayaran balik alternatif berdasarkan situasi dan kemampuan peminjam. Pengenaan tindakan muflis terhadap peminjam hanyalah langkah terakhir oleh institusi kewangan selepas semua usaha pemulihan lain telah diambil untuk mendapatkan balik pinjaman yang telah diberi kepada peminjam. Maklumat terkini daripada bank-bank dan institusi kewangan lain yang terpilih (penyedia perkhidmatan sewa beli) juga tidak menunjukkan sebarang kenaikan ketara dalam kalangan pemberi pinjaman yang menfailkan kes muflis.

Di samping itu, peminjam yang menghadapi kesulitan kewangan juga digalakkan untuk mengambil tindakan pro-aktif untuk menghubungi institusi kewangan masing-masing sebelum pinjaman tersebut menjadi pinjaman tidak berbayar. Bagi peminjam yang mempunyai pinjaman dengan pelbagai institusi kewangan, mereka juga boleh mendapatkan khidmat nasihat daripada Agensi Kaunseling dan Pengurusan Kredit (AKPK) untuk dipertimbangkan di bawah Program Pengurusan Kredit (PPK). Program ini dapat membantu mereka untuk terus membayar balik pinjaman dan dapat menyelamatkan mereka daripada tindakan undang-undang yang boleh diambil seperti kebangkrapan atau lelongan harta, sekiranya peminjam gagal meneruskan pembayaran balik pinjaman.

Selain institusi kewangan, tindakan kebangkrapan turut diambil oleh pemiutang lain yang berada di luar bidang kuasa BNM, seperti syarikat pemberi kredit, pembekal dan sebagainya. Sehubungan ini, Kerajaan melalui kementerian dan agensi yang berkaitan sedang berusaha bersama untuk memastikan peminjam/ penghutang mendapat layanan yang adil dan bertanggungjawab melalui penggubalan Akta Kredit Pengguna (AKP) dan penubuhan Lembaga Pemantauan Kredit Pengguna di bawah Kementerian Kewangan serta penetapan standard dan garis panduan yang seragam berkaitan Prinsip Layanan Adil kepada Pengguna Kewangan dan Amalan Pembiayaan yang Bertanggungjawab.

Bedasarkan rekod Jabatan Insolvensi Malaysia dari tahun 2018 hingga Jun 2022, jumlah kes kebangkrapan yang direkodkan menurun dari tahun ke tahun iaitu masing-masing sebanyak 16,482 kes bagi tahun 2018, 12,051 kes bagi tahun 2019, 8,351 kes bagi tahun 2020, 6,554 kes bagi tahun 2021 dan 3,165 kes bagi tahun 2022 sehingga bulan Jun.

Daripada jumlah bagi tahun 2022 sehingga bulan Mei, Mahkamah telah menjatuhkan Perintah Kebankrapan sebanyak 829 kes bagi bulan Januari, 561 kes bagi bulan Februari, 492 kes bagi bulan Mac, 426 kes bagi bulan April dan 386 kes bagi bulan Mei dan 471 kes bagi bulan Jun.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN AHMAD TARMIZI BIN SULAIMAN
[SIK]**

TARIKH : 4 OGOS 2022 (KHAMIS)

SOALAN

Minta **MENTERI PENGAJIAN TINGGI** menyatakan perbelanjaan Kementerian bagi penarafan universiti dalam ranking dunia dan relevansi penarafan ranking dunia ini mempengaruhi pengeluaran kualiti graduan, termasuk pelajar dari luar negara.

JAWAPAN

Tan Sri Yang di-Pertua,

Kementerian Pengajian Tinggi (KPT) tidak mempunyai peruntukan yang khusus bagi perbelanjaan kepada penarafan universiti dalam ranking dunia. Penarafan yang diterima daripada agensi ranking dunia adalah hasil daripada inisiatif oleh pihak universiti dan melalui peruntukan sedia ada yang telah diberikan oleh Kerajaan dalam bentuk geran penyelidikan dan hasil daripada pembelajaran dan penyelidikan.

Penarafan dalam ranking dunia adalah relevan dalam konteks pengiktirafan sistem pendidikan tinggi Malaysia secara amnya dan mempengaruhi pengeluaran kualiti graduan, termasuk pelajar dari luar negara. Ini disebabkan terdapat elemen reputasi akademik dan reputasi majikan dalam sistem penarafan dunia yang dikeluarkan oleh *QS World University Rankings* sebagai manifestasi keberhasilan graduan yang berkualiti. Oleh yang demikian, ia pastinya menjadi faktor penarik untuk pelajar antarabangsa meneruskan pengajian di Malaysia.

Ranking boleh digunakan sebagai penanda aras dan petunjuk kualiti sistem pendidikan tinggi negara. Namun begitu, ia tidak sepatutnya dilihat sebagai ukuran kualiti yang mutlak. Pengiktirafan antarabangsa melalui ranking ini penting bagi memposisikan pendidikan tinggi negara di peringkat antarabangsa, selain membantu institusi dalam mempromosi dan menarik pelajar antarabangsa dan penyelidik terkemuka dunia untuk menjalankan kerjasama penyelidikan dengan universiti tempatan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : PUAN HAJAH NATRAH BINTI ISMAIL
[SEKIJANG]**

TARIKH : 04 OGOS 2022 (KHAMIS)

SOALAN

PUAN HAJAH NATRAH BINTI ISMAIL [SEKIJANG] minta **MENTERI KANAN PENDIDIKAN** menyatakan perkembangan terkini pelantikan warden asrama sekolah dan adakah pengambilan ini mampu menyelesaikan isu kekurangan dan elaun warden asrama sekolah di seluruh negara.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa prihatin terhadap aspek keselamatan dan kesejahteraan murid di asrama, termasuk menyediakan Warden Asrama. Buat masa ini, Warden Asrama dilantik dalam kalangan guru berdasarkan konsep *in loco parentis* (peranan ibu bapa) di asrama untuk menjaga hal berkaitan kebajikan, keselamatan, pelajaran dan disiplin murid.

Terkini, KPM telah menambah baik portfolio warden asrama di 1,874 buah sekolah berasrama bawah KPM. Berkuatkuasa 1 Ogos 2022, bilangan warden asrama akan ditambah seramai 3,813 orang, iaitu melibatkan peningkatan sebanyak 63 peratus daripada 6,055 orang kepada 9,868 orang. Selain daripada itu, kadar Elaun Warden Asrama (EWA) dinaikkan sebanyak 25 peratus. Kadar baharu EWA adalah seperti berikut:

- i. RM350 sebulan bagi Ketua Warden Asrama; dan
- ii. RM300 sebulan bagi Warden Asrama.

Kali terakhir kadar EWA disemak adalah pada tahun 1997.

Penambahbaikan portfolio Warden Asrama membolehkan pengawasan dan penyeliaan asrama dilaksana dengan lebih teratur dan berkesan. Usaha ini juga akan dapat meningkatkan pemantauan murid di asrama dan memberi keyakinan kepada ibu bapa serta masyarakat terhadap aspek keselamatan murid di asrama.

Berkenaan cadangan mewujudkan perjawatan Warden Khas, cadangan ini perlu mendapat pertimbangan Agensi Pusat memandangkan ia melibatkan pertambahan bilangan jawatan serta implikasi kewangan yang tinggi kepada kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

DARIPADA : TAN SRI HAJI IDRIS BIN JUSOH (BESUT)

TARIKH : 4 OGOS 2022 (KHAMIS)

SOALAN

TAN SRI HAJI IDRIS BIN JUSOH (BESUT) minta **MENTERI PERTANIAN DAN INDUSTRI MAKANAN** menyatakan langkah pihak Kementerian dalam menggalakkan lebih ramai usahawan muda dalam bidang agrokeusahawanan bagi memenuhi hasrat negara memajukan sektor pertanian sebagai penyumbang utama kepada pertumbuhan ekonomi negara.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pertanian dan Industri Makanan (MAFI) sentiasa mengalakkan penyertaan golongan muda yang sangat signifikan dalam memacu keupayaan dan produktiviti industri agromakanan negara. MAFI telah merangka pendekatan strategik bagi menggalakkan dan meningkatkan penglibatan golongan muda dalam sektor agromakanan dan industri makanan menerusi pengaplikasian pemodenan, teknologi dan inovasi bidang pertanian serta perkongsian model amalan terbaik, seiring dengan Dasar Agromakanan Negara (DAN) 2.0.

Menerusi DAN 2.0 ini, MAFI memberikan penekanan kepada (4) pelan tindakan utama sebagai strategi bagi menarik dan mengekalkan bakat muda dalam sektor pertanian iaitu:

- (i) penjenamaan semula sektor agromakanan dengan menggalakkan penggunaan pertanian moden dan pintar untuk menarik bakat muda dalam sektor agromakanan;
- (ii) Mewujudkan sumber tenaga kerja industri yang optimum melalui pengintegrasian siswazah ke dalam persekitaran pekerjaan yang sebenar menerusi tambahan latihan amali dan perantisan;
- (iii) Meningkatkan pendedahan generasi muda kepada aktiviti pertanian melalui pendidikan bersasar serta kaedah lain seperti pertandingan inovasi dan perkongsian kisah kejayaan; dan
- (iv) Membangunkan model pengurusan dan amalan terbaik sebagai galakan bagi mengukuhkan produktiviti buruh dan meningkatkan keupayaan pengeluaran.

Dalam menyokong pelan tindakan ini, MAFI akan meneruskan program sedia ada serta komited untuk meneroka peluang dan inisiatif baharu yang berkaitan. Sebagai contoh, Program Agropreneur Muda telah

SOALAN NO: 13

diperkenalkan sejak tahun 2016 sebagai usaha membantu mengurangkan kos permulaan dan pengembangan projek pertanian mereka melalui pemberian geran dalam bentuk barangan sehingga RM20,000 bagi setiap penerima. Di samping itu, MAFI turut menawarkan kursus dan latihan teknikal agropreneur dalam semua sub sektor agromakanan bagi membantu mereka meningkatkan kemahiran seterusnya memastikan peningkatan keupayaan dan pengeluaran hasil bagi menjamin pendapatan yang lebih stabil.

MAFI akan terus memperkukuhkan platform Program Agropreneur Muda ini dan berharap dapat membantu golongan muda meningkatkan output dan kualiti pengeluaran, seterusnya memacu pertumbuhan ekonomi dan sosial negara melalui sektor agromakanan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN HASSAN BIN ABDUL KARIM
[PASIR GUDANG]
TARIKH : 04 OGOS 2022 (KHAMIS)

SOALAN

TUAN HASSAN BIN ABDUL KARIM [PASIR GUDANG] minta **MENTERI KEWANGAN** menyatakan bagaimana kedudukan simpanan wang pekerjapekerja untuk hari tua mereka secara terperinci di bawah Kumpulan Wang Simpanan Pekerja (KWSP) selepas Kerajaan membenarkan empat kali pengeluaran di bawah skim i-Citra, i-Sinar dan i-Lestari. Apakah jaminan pekerja-pekerja yang telah mengeluarkan simpanan KWSP mereka itu tidak terdedah kepada hidup di bawah garis kemiskinan di hari tua mereka nanti.

JAWAPAN

Tuan Yang di-Pertua,

Sejak pandemik COVID-19, KWSP telah melaksanakan empat (4) program pengeluaran sementara (khas) iaitu i-Lestari, i-Sinar, i-Citra dan Pengeluaran Khas yang terbuka kepada ahli di bawah umur 55 tahun tertakluk kepada syarat-syarat kelayakan yang ditetapkan bagi membantu ahli meneruskan kelangsungan hidup dalam menempuhi cabaran dan impak Perintah Kawalan Pergerakan (PKP) akibat pandemik COVID-19. Secara keseluruhannya, ahli KWSP yang layak di bawah keempat-empat pengeluaran ini boleh mengeluarkan dana persaraan mereka sehingga RM81,000, tertakluk kepada jumlah baki simpanan mereka.

Dalam tempoh dua (2) tahun, seramai **8.14 juta ahli** atau 64% daripada 12.8 juta ahli yang berumur di bawah 55 tahun telah membuat **sekurang-kurangnya satu daripada pengeluaran** ini yang melibatkan jumlah amaun pengeluaran sebanyak RM145 bilion.

Secara keseluruhannya, program-program pengeluaran ini khususnya yang melibatkan pengeluaran daripada Akaun 1 telah memberikan kesan jangka panjang terhadap kecukupan simpanan persaraan ahli. Ini dapat dilihat melalui penurunan dalam peratusan **ahli aktif** di bawah umur 55 tahun yang mempunyai simpanan di dalam Akaun 1 melebihi Kuantum Simpanan Asas mengikut umur, iaitu menurun daripada 36% pada Disember 2020 kepada **28% pada Jun 2022**.

KWSP meningkatkan usaha untuk membina semula simpanan ahli dengan menyediakan pelbagai saluran untuk ahli menambah simpanan persaraan mereka. Bagi ahli yang bekerja dan mempunyai majikan, mereka boleh memilih untuk mencarum melebihi kadar caruman berkanun syer pekerja iaitu 11% pada bila-bila masa. Selain itu, mereka juga boleh mencarum sendiri pada bila-bila masa tertakluk kepada amaun maksimum RM60,000 setahun.

Bagi ahli yang bekerja sendiri, tiada pendapatan tetap atau tidak bekerja seperti pelajar dan suri rumah yang berumur di bawah 60 tahun

turut boleh memilih mencarum secara sukarela pada bila-bila masa mengikut kemampuan di bawah Program i-Saraan sehingga RM60,000 setahun. Sebagai insentif untuk menggalakkan golongan ini menyimpan di bawah i-Saraan, Kerajaan telah memberi sumbangan sebanyak 15% daripada amaun caruman, atau sehingga RM250 setahun.

Selain itu, ahli juga boleh menambah simpanan persaraan pasangan (suami/ isteri), ibu bapa atau anak-anak mereka yang merupakan ahli KWSP pada bila-bila masa tertakluk kepada amaun maksimum RM60 ribu setahun. Pada masa yang sama, pihak ketiga yang diluluskan juga boleh mencarum untuk ahli KWSP, namun, masih tertakluk kepada amaun maksimum yang sama iaitu RM60,000 setahun.

Dalam usaha membantu ahli membina semula simpanan yang telah dikeluarkan, mekanisme pengisian semula akan dilaksanakan bermula bulan Ogos 2022 bagi ahli-ahli yang terlibat dengan pengeluaran i-Sinar, i-Citra dan Pengeluaran Khas, tertakluk kepada terma pengisian semula bagi setiap program pengeluaran masing-masing. Melalui mekanisme pengisian semula ini, caruman baharu akan dikreditkan ke dalam Akaun 1 sepenuhnya sehingga amaun yang tertakluk kepada pengisian semula adalah mencukupi. Setelah itu, pecahan caruman akan kembali kepada 70 peratus untuk Akaun 1 dan 30 peratus untuk Akaun 2.

KWSP juga menyedari bahawa untuk jangka masa panjang, kesedaran dan pengetahuan mengenai perancangan kewangan dan persaraan adalah penting untuk menyeimbangkan keperluan kewangan hari ini dan kepentingan persaraan di masa hadapan. Oleh itu, KWSP telah memperkenalkan *Retirement Advisory Service* (RAS) sejak 2014 yang bertujuan memberi khidmat nasihat dan rundingan mengenai perancangan kewangan dan persaraan. Perkhidmatan ini diberi secara percuma dan terbuka kepada ahli dan bukan ahli di cawangan-cawangan KWSP di seluruh negara.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK HAJI SHABUDIN BIN YAHAYA
[TASEK GELUGOR]**

TARIKH : 04 OGOS 2022 (KHAMIS)

SOALAN

DATUK HAJI SHABUDIN BIN YAHAYA [TASEK GELUGOR] minta **MENTERI KANAN PENDIDIKAN** menyatakan berapa peruntukan yang telah dikeluarkan bagi membaiki kemudahan sekolah yang rosak di Pulau Pinang dan berapa bilangan sekolah yang telah dibaik pulih sehingga Mei 2022.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa memberi perhatian kepada usaha menyediakan fasiliti pendidikan seperti bangunan akademik, kemudahan sekolah dan lain-lain agar dapat berfungsi dengan baik, selamat dan kondusif digunakan oleh warga sekolah.

Bagi sekolah yang mengalami kerosakan, KPM menyalurkan peruntukan penyelenggaraan kepada jabatan pendidikan negeri (JPN) dan Jabatan Kerja Raya (JKR) untuk melaksanakan pembaikan berdasarkan tahap kerosakan menggunakan Skor Gred Impak.

Untuk makluman Ahli Yang Berhormat, sehingga 31 Mei 2022, KPM telah menyalurkan peruntukan sebanyak RM27.7 juta bagi menyelenggara 399 buah sekolah di Pulau Pinang yang merangkumi penyelenggaraan struktur dan bukan struktur bangunan, bumbung, pendawaian elektrik, pagar, longkang, padang dan lain-lain penyelenggaraan kecil.

Sekian, terima kasih.

**PEMBERITAHUAN PERTANYAAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : PUAN YEO BEE YIN [BAKRI]

TARIKH : 4 OGOS 2022 (KHAMIS)

SOALAN

Puan Yeo Bee Yin [Bakri] minta **MENTERI KOMUNIKASI DAN MULTIMEDIA** menyatakan langkah-langkah yang diambil oleh Kementerian untuk mencapai sasaran MyDigital bahawa Malaysia memiliki jumlah *submarine cable landing* yang tertinggi di Asia Tenggara menjelang 2025.

JAWAPAN

Tuan Yang di-Pertua,

Kerajaan komited untuk mencapai aspirasi MyDIGITAL yang menyasarkan Malaysia sebagai sebuah ekonomi digital yang moden. Melalui inisiatif #MyDigital, kerajaan menyasarkan untuk mempunyai bilangan pendaratan kabel dasar laut lebih banyak menjelang tahun 2025 bagi meletakkan Malaysia sebagai lokasi yang sangat kompetitif di rantau ASEAN. Ia secara tidak langsung akan menambah baik perkhidmatan jalur lebar dan menggalakkan penubuhan lebih banyak pusat data berteknologi tinggi di Malaysia.

Untuk makluman Ahli Yang Berhormat, setakat ini terdapat 17 sistem kabel dasar laut antarabangsa yang beroperasi oleh pihak swasta dengan jumlah kapasiti keseluruhan sehingga 42 Tbps. Kesemua sistem

kabel ini menghubungkan Malaysia ke rangkaian antarabangsa merentasi ketujuh-tujuh benua. Bagi meningkatkan lagi kesalinghubungan antarabangsa negara, empat lagi sistem kabel baharu sedang dalam pelaksanaan.

Sehingga kini, terdapat 34 pusat data di seluruh Malaysia yang menawarkan perkhidmatan-perkhidmatan digital bernilai tinggi seperti perkhidmatan pengkomputeran awan dan 23 kabel dasar laut yang telah mendarat di beberapa stesen pendaratan kabel di Malaysia. Pada masa ini juga terdapat empat projek pusat data *hyperscale* yang telah diumumkan, iaitu dari Microsoft, GDS, Bridge Data Centres dan Yondr. Selain dari projek-projek tersebut, beberapa potensi pelaburan pusat data dan kabel dasar laut kini dalam proses fasilitasi dan rundingan bagi memuktamadkan keputusan pelaburan di Malaysia.

Kerajaan telah menubuhkan Pasukan Petugas Penyelarasan Pelaburan Pusat Data atau DCICTF (*Data Centre Investment Coordination Task Force*) yang dipengerusikan bersama oleh Kementerian Komunikasi dan Multimedia Malaysia (K-KOMM) dan Kementerian Perdagangan Antarabangsa dan Industri (MITI) bagi memudahkan dan fasilitasi kepada para pelabur pangkalan data yang berminat melabur di Malaysia dalam menyediakan persekitaran pelaburan yang menarik. DCICTF ini akan meneliti isu-isu yang dibangkitkan oleh para pelabur pangkalan data, termasuk kabel dasar laut, seterusnya mendapatkan penyelesaian seperti mengenal pasti dasar-dasar yang perlu diubah atau ditambah baik bagi membolehkan Malaysia lebih berdaya saing serta menjadi destinasi pilihan utama untuk melabur.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TAN SRI HAJI IDRIS BIN JUSOH
[BESUT]**

TARIKH : 4 OGOS 2022 (KHAMIS)

SOALAN

Minta **MENTERI PENGAJIAN TINGGI** menyatakan langkah-langkah Kementerian dalam mempromosikan Malaysia sebagai destinasi pilihan untuk pelajar antarabangsa melanjutkan pengajian mereka sebagai hab pendidikan tinggi pilihan di peringkat global.

JAWAPAN

Tan Sri Yang di-Pertua,

Kementerian Pengajian Tinggi (KPT) telah melaksanakan pelbagai program promosi dan aktiviti untuk meneroka pasaran baharu serta menambah baik hubungan diplomasi antarabangsa. Ini dilaksanakan melalui Bahagian *Education Malaysia* (BEM) dan pejabat *Education Malaysia Luar Negara* (EMLN), dengan kerjasama *Education Malaysia Global Services* (EMGS) yang bertanggungjawab mempromosikan pendidikan tinggi di luar negara.

Usaha-usaha yang dilaksanakan adalah menjurus kepada mempromosikan Malaysia sebagai hab pendidikan tinggi pilihan di peringkat global di samping turut menjadi destinasi pilihan untuk pelajar antarabangsa melanjutkan pengajian.

Antara promosi dan inisiatif yang dilaksanakan termasuklah:

- (i) Kempen berterusan secara fizikal dan maya. Ini termasuklah melalui penyertaan dalam acara-acara pameran, mesyuarat-mesyuarat perniagaan, seminar dan lawatan, misi kemasukan pasaran, libat urus bersama persatuan-persatuan pelajar antarabangsa dan program bersama alumni antarabangsa.
- (ii) Inisiatif *EducationMalaysia4U Diplomacy Tour*, yang mana aktiviti libat urus dilaksanakan oleh pejabat EMLN dengan pihak di luar negara bersama-sama dengan pihak Kedutaan bagi meneroka potensi pasaran baharu. Contoh program yang telah dilaksanakan ialah libat urus *Malaysia-China Higher Education*, *Education Malaysia Jordan Coverage Country Engagement* dan lain-lain lagi. Baru-baru ini juga pejabat *Education Malaysia* Indonesia telah bekerjasama dengan EMGS menganjurkan “Pameran Ayo Kuliah di Malaysia 2022” di Pekanbaru melibatkan 27 universiti awam, swasta dan antarabangsa Malaysia.

- (iii) Inisiatif *i-EducationMalaysia4U* yang menggunakan medium berasaskan digital seperti aplikasi mudah alih dan media sosial sebagai mekanisme penyebaran maklumat di peringkat global dengan lebih cepat dan berkesan. Antara program yang telah dilaksanakan menggunakan platform *i-EducationMalaysia4U* ini adalah seperti *Asia Pacific University Info Day @ EM Dubai*, *Education For The Future Series 2022 “Session 3: Build + Engage With Oil And Gas Professionals: Study At UTHM Malaysia”*, penyertaan dalam *Jordan International Exhibition for Higher Education (JIEHE)*, dan Majlis Guru Bimbingan Kaunseling (MGBK) *CAREER DAY 2022*.
- (iv) Program *MyAlumni@EducationMalaysia4U*. Program melibatkan alumni yang pernah menyambung pengajian di Malaysia. Antara aktiviti yang telah dilaksanakan ialah *The Launching of Study In Malaysia Mobility Ambassador* oleh *Education Malaysia Australia*, Program Alumni *Testimoni Provider* oleh pejabat *Education Malaysia Jordan*, *Malaysian Universities Alumni* di Mesir dan program bersama *Malaysian Alumni Council of China*.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN WONG KAH WHO [IPOH TIMUR]
TARIKH : 04 OGOS 2022 (KHAMIS)

SOALAN

TUAN WONG KAH WOH [IPOH TIMUR] minta **MENTERI KEWANGAN** menyatakan status pembayaran balik tunggakan pemulangan wang GST yang dinyatakan sebanyak RM19.4 bilion pada tahun 2018. Berapa jumlah pembayar cukai (syarikat dan individu) yang telah menerima pembayaran balik pemulangan wang GST tersebut.

JAWAPAN

Tuan Yang di-Pertua,

Untuk makluman Ahli Yang Berhormat, amaun tunggakan wang GST berjumlah RM19.4 billion pada tahun 2018 yang telah dibayar balik sehingga ke 30 Jun 2022 adalah sebanyak RM18.96 billion. Amaun ini melibatkan sejumlah 104,002 orang kena cukai (Syarikat dan Pemilik Tunggal).

Situasi ini terjadi adalah disebabkan antara lain kerana terdapat antara registran atau Orang Kena Cukai (OKC) gagal memberi kerjasama di dalam memberi maklumat yang diperlukan oleh pihak Jabatan Kastam Diraja Malaysia (JKDM) bagi tujuan pengesahan dan semakan. Selain itu, terdapat juga beberapa isu teknikal seperti maklumat perbankan yang tidak dikemaskini bagi tujuan bayaran balik GST.

Namun begitu, pihak JKDM telah bertindak secara pro-aktif di dalam memastikan pihak yang terlibat memberi kerjasama yang sepatutnya dan mengambil tindakan dengan mengemaskini maklumat yang berkaitan dalam memastikan bayaran balik GST dapat dibuat.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' RAMLI BIN DATO' MOHD NOR
(CAMERON HIGHLANDS)**

TARIKH : 4 OGOS 2022 (KHAMIS)

SOALAN

DATO' RAMLI BIN DATO' MOHD NOR (CAMERON HIGHLANDS) minta **MENTERI TENAGA DAN SUMBER ASLI** menyatakan apakah status terkini mangsa yang tertimbus dalam kejadian runtuhan batu tapak kuari di Keramat Pulai, Jalan Simpang Pulai - Cameron Highlands.

JAWAPAN

Tuan Yang di-Pertua,

1. Jabatan Mineral dan Geosains Malaysia (JMG) telah menerima laporan kejadian runtuhan batu kuari di Kuari Danshak Sdn. Bhd (No.2) di Mukim Sg. Raia, Daerah Kinta pada 8 Mac 2022. Kejadian tersebut melibatkan dua pekerja dan dua jentera yang dilaporkan tertimbus di bawah runtuhan batu kuari.
2. Kejadian runtuhan batu berkemungkinan berpunca daripada struktur geologi bukit batu kapur tersebut yang mempunyai banyak rongga dan rekahan. Runtuhan batu dipercayai berlaku di bahagian lereng bukit yang berketinggian 200 meter dan menyebabkan gelinciran batu sejauh lebih kurang 150 meter.

3. Susulan daripada pemerhatian dan siasatan di kawasan kejadian, Pejabat Tanah dan Galian (PTG) Negeri Perak, JMG Negeri Perak dan Pegawai Daerah Kinta telah mengeluarkan arahan untuk menghentikan aktiviti pengkuarian serta merta kepada pengusaha kuari yang terlibat. Selain itu, PTG Negeri Perak turut mengeluarkan arahan untuk menghentikan sementara kerja-kerja penggerudian, peletupan dan pemecahan batu secara mekanikal kepada kuari berdekatan bagi membolehkan kerja mencari dan menyelamat dijalankan.
4. Kerja mencari dan menyelamat telah bermula pada 8 Mac 2022 melibatkan agensi seperti Polis Diraja Malaysia, Jabatan Bomba dan Penyelamat Malaysia, Pasukan Khas Operasi Taktikal dan Penyelamat Malaysia (STORM), Pasukan Mencari dan Menyelamat Khas Malaysia (SMART), Pejabat Daerah dan Tanah Kinta, Jabatan Kerja Raya Negeri Perak, PTG Negeri Perak dan JMG Negeri Perak. Kerja mencari dan menyelamat dijalankan berpandukan nasihat teknikal daripada pihak JMG terhadap tahap keselamatan dan kestabilan kawasan runtuh batu.
5. Pada 7 April 2022, satu Mesyuarat Khas Kerja-Kerja Mencari dan Menyelamat (SAR) telah diadakan di Pejabat Daerah dan Tanah Ipoh dan dipengerusikan oleh Pegawai Daerah Kinta. Mesyuarat tersebut memutuskan untuk mengurangkan bilangan anggota yang terlibat dalam aktiviti mencari dan menyelamat. Namun, pihak pengusaha kuari diminta untuk meneruskan kerja mencari dan menyelamat sehingga mangsa yang dipercayai tertimbus dapat ditemui.
6. Operasi mencari dan menyelamat mangsa kejadian masih diteruskan sehingga kini oleh Pihak penguasa kuari dan Jurutera Perunding kerana dua orang mangsa dan jentera yang dipercayai tertimbus belum ditemui. Antara langkah yang dilakukan ialah kerja peletupan sekunder di lokasi kejadian bagi memecahkan bongkahan batuan dan memindahkan batuan daripada lokasi kejadian. Operasi ini akan terus dipantau oleh Polis Diraja Malaysia, Jabatan Bomba dan Penyelamat Malaysia serta dibantu oleh JMG Negeri Perak.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : PUAN RUSNAH BINTI ALUAI
[TANGGA BATU]**

TARIKH : 04 OGOS 2022 (KHAMIS)

SOALAN

PUAN RUSNAH BINTI ALUAI [TANGGA BATU] minta **MENTERI KANAN PENDIDIKAN** menyatakan bilakah keputusan bagi Pengambilan Khas Pegawai Perkhidmatan Pendidikan DG41 secara '*Contract of Service*' (CoS) 2022 akan dikeluarkan di laman web MyPDPP.

JAWAPAN

Tuan Yang di-Pertua,

Kementerian Pendidikan Malaysia (KPM) telah mengumumkan Pengambilan Khas seramai 18,702 orang Pegawai Perkhidmatan Pendidikan (PPP) Gred DG41 secara *one-off* pada 20 Jun 2021 bagi mengisi kekosongan guru di sekolah KPM seluruh negara. Ini merupakan inisiatif yang diambil oleh KPM bagi mengatasi isu kekosongan guru yang telah berlarutan sekian lama.

Untuk makluman Ahli Yang Berhormat, urusan pengambilan khas guru secara *Contract of Service* (CoS) telah selesai dilaksanakan sepenuhnya oleh Suruhanjaya Perkhidmatan Pendidikan (SPP). Keputusan tersebut telah diumumkan dalam laman sesawang SPP pada 27 Mei 2022

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT, MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : DATO' SRI AZALINA OTHMAN SAID
(PENGERANG)**

TARIKH : 4 OGOS 2022

SOALAN

DATO' SRI AZALINA OTHMAN SAID (PENGERANG) minta **MENTERI PEMBANGUNAN WANITA, KELUARGA DAN MASYARAKAT** menyatakan status penggubalan Rang Undang-Undang Antigangguan Seksual dan bila ianya dijangka dibentangkan.

JAWAPAN

Tuan Yang di-Pertua,

Rang Undang-Undang Antigangguan Seksual (RUU AGS) telah dibacakan buat kali pertama pada 15 Disember 2021 semasa Mesyuarat Kedua Dewan Rakyat bagi Mesyuarat Penggal Keempat, Parlimen Ke-14. Bacaan kali kedua dan ketiga RUU telah dibuat di Dewan Rakyat serta diluluskan pada 20 Julai 2022. Kementerian mensasarkan pembentangan RUU AGS 2021 bagi bacaan kali kedua dan ketiga di Dewan Negara yang akan bersidang pada 8 hingga 16 Ogos 2022.

Kementerian ingin merakamkan ucapan terima kasih kepada semua ahli Parlimen Dewan Rakyat di atas sokongan ke atas RUU AGS ini dan semoga setiap niat dan tugas kita mendapat keberkatan dan balasan baik di sisi Allah SWT.

RUU ini digubal sebagai satu manifestasi penting bahawa kesalahan gangguan seksual merupakan satu pelanggaran kepada hak asasi manusia, suatu bentuk keganasan berasaskan gender dan diskriminasi terhadap mangsa. Kementerian memerlukan sokongan daripada semua untuk merealisasikan dan menyediakan persekitaran yang selamat untuk terus meningkatkan pengupayaan rakyat dan seterusnya merencanakan aktiviti ekonomi, sosial dan politik. Besarlah harapan Kementerian supaya dengan adanya RUU ini, rakyat bukan saja ada kesedaran yang tinggi malah dapat menggunakan Tribunal AGS untuk mendapatkan keadilan dan seterusnya meningkatkan kesejahteraan masyarakat, produktiviti negara serta imej negara di arena antarabangsa.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : PUAN HAJAH FUZIAH BINTI SALLEH
[KUANTAN]**

TARIKH : 04 OGOS 2022 (KHAMIS)

SOALAN

PUAN HAJAH FUZIAH BINTI SALLEH [KUANTAN] minta **MENTERI KANAN PENDIDIKAN** menyatakan langkah-langkah terperinci yang diambil oleh pihak Kementerian dalam menangani isu buli di sekolah yang semakin berleluasa.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa memandang serius isu buli yang melibatkan murid sekolah bawah KPM. Dalam hal ini, KPM telah melaksanakan pelbagai penambahbaikan berterusan bagi mengukuhkan pendekatan sedia ada dengan memberi tumpuan kepada empat aspek utama iaitu penyedaran, pelaporan, penghukuman dan pemantauan.

Untuk makluman Ahli Yang Berhormat, dalam konteks penyedaran, KPM telah memperkenalkan konsep Sekolahku SEJAHTERA. Pendekatan ini bertujuan memupuk dan menerapkan elemen dan nilai penting kehidupan dalam kalangan warga sekolah, termasuk murid. Elemen ini diterap dan dididik oleh guru secara langsung atau tidak langsung di dalam aktiviti kurikulum dan kokurikulum. Ini bagi memastikan murid dapat benar-benar menghayatinya seterusnya menjadi sebahagian daripada amalan dalam kehidupan mereka sama ada di sekolah atau di luar sekolah. Konsep ini memberi tumpuan kepada 14 elemen iaitu:

S - Selamat, Seronok & Sihat
E - Etika & Empati
J - Jati Diri
A - Adab Sopan
H - Harmoni
T - Tekun, Teliti & Terampil
E - Eksplorasi
R - Rasional
A - Artikulasi

Penerapan elemen selamat, sihat, seronok, empati, jati diri, adab sopan, harmoni dan rasional dalam kalangan warga sekolah akan dapat membentuk keperibadian murid yang menyedari bahawa buli perlu dibanteras sepenuhnya.

Dalam aspek pelaporan, KPM telah menyediakan saluran pelaporan bagi membolehkan pihak sekolah melaporkan kes buli kepada KPM. Pada masa kini KPM juga sedang merangka sistem pelaporan yang

akan membolehkan warga sekolah termasuk murid dan ibu bapa mereka membuat aduan terus kepada pihak KPM dan maklumat yang diterima akan dilindungi. KPM akan terus menambah baik sistem pelaporan kes buli bagi memastikan pendekatan yang terbaik dapat dibangunkan.

KPM juga telah menyediakan Garis Panduan Mencegah dan Menangani Perbuatan Buli Dalam Kalangan Murid di Sekolah dan Buku Panduan Pengurusan Menangani Buli Di Sekolah sebagai panduan kepada pihak sekolah.

Berhubung dengan penghukuman di peringkat sekolah, KPM telah mengeluarkan Surat Pekeliling Ikhtisas (SPI) Bil. 8/2010 yang menyentuh tentang hukuman terhadap pelaku buli di sekolah atau di asrama. KPM sedang meneliti hukuman ke atas murid yang melakukan perbuatan buli dengan membuat penambahbaikan kepada mana-mana hukuman yang tersenarai dalam SPI tersebut. Ini bagi memastikan hukuman yang dikenakan adalah setimpal dan menjadi pendekatan pencegahan yang berkesan.

Di samping itu, terdapat Peraturan-Peraturan Pendidikan (Disiplin Murid) 1959 [L.N.61] yang mengawal disiplin murid-murid sekolah. Peraturan sedia ada memperuntukkan bidang kuasa Pengetua atau Guru Besar untuk mengambil tindakan disiplin terhadap murid dan tertakluk kepada tahap keseriusan kes boleh mengakibatkan murid digantung atau dibuang sekolah sekiranya Pengetua atau Guru Besar berpuas hati perlu untuk melakukan sedemikian bagi tujuan mengawal disiplin murid di sekolah tersebut.

Untuk makluman Ahli Yang Berhormat, KPM mempunyai kuasa yang mencukupi untuk menangani kejadian buli di sekolah. Sekiranya kejadian buli berlaku, murid yang menjadi mangsa boleh melaporkan kepada pihak sekolah atau kepada pihak polis untuk siasatan lanjut. Berhubung cadangan berkenaan penggubalan Akta Anti Membuli, ianya adalah di luar bidang kuasa KPM kerana buli tidak terhad kepada murid sekolah sahaja. Setakat ini, kesalahan berkaitan buli secara lisan atau fizikal boleh mengguna pakai peruntukan sedia ada dalam Kanun Keseksaan [Akta 574] iaitu di bawah Seksyen 504, Seksyen 509, Seksyen 323, Seksyen 324, Seksyen 325 dan Seksyen 326.

Oleh itu, sekiranya perlakuan buli tersebut termasuk dalam salah satu kesalahan yang diperuntukan dalam mana-mana seksyen di atas, siasatan akan dilaksanakan oleh pihak polis.

Bagi aspek pemantauan pula, pada masa ini pemantauan di sekolah dilaksanakan oleh pentadbir, guru dan warden yang terdiri daripada kalangan guru. KPM juga sentiasa mengingatkan guru bimbingan dan kaunseling memberikan khidmat bimbingan dan kaunseling kepada pembuli dan mangsa buli serta murid yang cenderung untuk melakukan perbuatan membuli.

KPM sentiasa mengingatkan pihak sekolah agar berusaha mewujudkan persekitaran sekolah yang selamat menerusi Program Sekolah Selamat dengan kerjasama agensi kerajaan dan bukan kerajaan seperti Polis Diraja Malaysia (PDRM), Kumpulan Penggerak Ibu bapa Komuniti dan Swasta (PIBKS); *National Institute of Occupational Safety and Health* (NIOSH) serta Jabatan Sukarelawan Malaysia (RELA). KPM turut mengarahkan semua sekolah termasuk sekolah asrama untuk melaksanakan program kesedaran menangani isu buli bersama-sama Pegawai Perhubungan Sekolah (PPS) dari Polis Diraja Malaysia (PDRM) bermula Januari 2022 secara berterusan.

Mengambil kira bahawa masih terdapat ruang penambahbaikan bagi meningkatkan keberkesanan mekanisme sedia ada, terkini, KPM telah mengambil inisiatif menubuhkan Jawatankuasa Khas Bagi Meneliti dan Menambahbaik Prosedur Pengendalian Kes Gangguan Seksual dan Buli di Institusi Pendidikan pada 12 Mei 2022. Ahli jawatankuasa khas ini terdiri daripada individu yang mempunyai kepakaran dalam bidang pendidikan, pengendalian kes jenayah, gangguan seksual, penelitian sistem, prosedur kerajaan dan kriminologi. Jawatankuasa ini sedang meneliti semua dokumen, kaedah dan prosedur sedia ada serta mengesyorkan tindakan dan penambahbaikan yang boleh dilaksanakan oleh KPM.

KPM yakin dengan pendekatan menyeluruh yang dilaksanakan dapat menangani isu buli di sekolah.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : DATO' SRI HASAN BIN ARIFIN [ROMPIN]

TARIKH : 04 OGOS 2022 (KHAMIS)

SOALAN

DATO' SRI HASAN BIN ARIFIN [ROMPIN] minta **MENTERI PELANCONGAN, SENI DAN BUDAYA** menyatakan apakah prestasi terkini industri pelancongan di Malaysia sejak Fasa Peralihan Endemik dan pembukaan semula pintu sempadan negara. Apakah insentif dan inisiatif disediakan dalam menggalakkan lagi perkembangan industri pelancongan terutamanya yang melibatkan pengusaha pelancongan tempatan.

JAWAPAN

Tuan Yang di-Pertua,

1. Bagi suku pertama tahun 2022, Malaysia telah mencatatkan ketibaan seramai 98,053 orang pelancong asing dengan perbelanjaan pelancong asing sebanyak RM359.66juta. Untuk makluman, Malaysia telah menerima kehadiran seramai 6,696,230 orang pelancong asing dalam tempoh yang sama pada tahun 2019, iaitu sebelum penularan COVID-19 di seluruh dunia.
2. Sebagai perbandingan, pada suku pertama tahun 2022, negara-negara di seluruh dunia telah mencatatkan peningkatan ketibaan pelancong antarabangsa, dengan pergerakan seramai 76 juta orang pelancong antarabangsa, di mana 47 juta daripadanya dicatatkan pada bulan Mac 2022 sahaja. Walau bagaimanapun prestasi ini masih lagi pengurangan sebanyak 61% jika dibandingkan dengan prestasi paras pra-pandemik pada tahun 2019. Prestasi ini dijangka akan bertambah baik pada tahun hadapan berdasarkan laporan Pertubuhan Pelancongan Dunia (*United Nation World Tourism Organisation* - UNWTO) yang meramalkan bahawa industri pelancongan bagi negara-negara di rantau Asia Pasifik dijangka akan bertambah pulih pada tahun 2023.
3. Sejak Malaysia membuka semula pintu sempadan antarabangsanya bermula 1 April 2022 yang lalu, negara telah menerima kehadiran hampir 2 juta orang pengunjung antarabangsa.
4. Antara faktor tarikan pelancong ke Malaysia adalah kejayaan negara mengimbangi keperluan ekonomi dengan kesihatan, yang jelas dibuktikan apabila pembukaan semula sektor ekonomi dan pelancongan secara berfasa tidak menyumbang kepada penularan COVID-19 yang tidak terkawal.
5. Menurut statistik oleh Malaysia Airports Holdings Bhd (MAHB), trafik antarabangsa di rangkaian lapangan terbang tempatan meningkat sebanyak 53% susulan pembukaan semula sempadan pada 1 April 2022. Lapangan Terbang Antarabangsa Kota Kinabalu, Lapangan Terbang Antarabangsa Pulau Pinang dan Lapangan Terbang

SOALAN NO : 23

Antarabangsa Langkawi menunjukkan peningkatan paling ketara, dengan masing-masing mencatatkan peningkatan lebih 200%. Sejumlah 2.78 juta penumpang direkodkan pada bulan April 2022, dengan 77% adalah pergerakan penumpang domestik. Di samping itu, lima syarikat penerbangan iaitu Vietjet Air, Scoot, AirAsia, Thai AirAsia dan AirAsia X telah menyambung semula 17 laluan antarabangsa ke Malaysia.

6. Pada masa yang sama, Kajian Kadar Purata Penginapan Berbayar yang dijalankan oleh Tourism Malaysia melaporkan Kadar Purata Penginapan (AOR) bagi penginapan berbayar untuk sukuan pertama tahun 2022 juga menunjukkan peningkatan kepada 39.8% berbanding tahun lalu iaitu pada 23.8%. Peningkatan ini didorong oleh pemansuhan Perintah Kawalan Pergerakan (PKP) dan inisiatif kerajaan yang lain seperti LITB. Kadar Purata Penginapan (AOR) bagi penginapan berbayar dijangka akan terus menunjukkan trend peningkatan bagi bulan April dan seterusnya sejajar dengan pembukaan semula sempadan antarabangsa negara bermula 1 April 2022.

7. Sementara itu, MOTAC telah melancarkan Rangka Kerja Pemulihan Pelancongan 2.0 atau TRF 2.0 yang menggariskan rangka kerja atau inisiatif jangka pendek dan sederhana MOTAC untuk memperkukuhkan pemulihan dan mengembalikan daya saing industri pelancongan.

8. Antara insentif dan inisiatif utama yang disediakan dalam menggalakkan lagi perkembangan industri pelancongan adalah:

- (i) menyokong pemulihan perniagaan pelancongan dan kebudayaan melalui bantuan fiskal dan bukan fiskal demi meringankan beban penggiat industri dan seterusnya membolehkan mereka beroperasi secara optimum. Antaranya:
 - (a) MOTAC telah menyalurkan sejumlah RM53.67juta bantuan kewangan kepada lebih 18,000 pengusaha pelancongan;
 - (b) menawarkan baucar untuk aktiviti berkaitan pelancongan kepada Keluarga Malaysia. Sehingga Jun 2022, sebanyak RM5.95juta nilai baucar telah ditebus bagi pembelian produk kraf, seni visual, dan buku. Manakala sebanyak

SOALAN NO : 23

RM4.43juta nilai baucar telah ditawarkan bagi pakej pelancongan, minat khas dan pengangkutan darat;

- (c) telah menyalurkan RM3.73juta bagi lebih 520 permohonan yang telah diluluskan di bawah Geran Padanan Bagi Tujuan Pembaikan Hotel Bajet dan Inap Desa (Homestay) bagi membantu membaikpulih hotel bajet dan inap desa supaya kemudahan yang ditawarkan sentiasa berada di tahap yang berkualiti;
 - (d) meluluskan peruntukan sebanyak RM23.29juta bagi lebih 130 permohonan di bawah Geran Sepadan Sektor Pelancongan dan Kebudayaan bagi penganjuran program/acara/aktiviti berkaitan pelancongan, seni dan budaya; dan
 - (e) melanjutkan tempoh kelonggaran hal-hal berkaitan fi lesen, kompaun dan syarat lesen kepada agensi-agensi pelancongan dan pemandu-pemandu pelancong sehingga 31 Disember 2022.
- (ii) menyediakan insentif pembiayaan seperti Skim Infrastruktur Pelancongan (SIP) dan Pembiayaan Pelancongan PENJANA serta insentif Galakan Cukai dan Pendaftaran Projek Pelancongan;
- (iii) meningkatkan kualiti perkhidmatan (*service quality*) menerusi:
- (a) penyediaan kursus dan latihan yang menjadi pra-syarat kepada pengusaha-pengusaha pelancongan untuk mendapatkan lesen dengan MOTAC; dan
 - (b) pelaksanaan kursus-kursus peningkatan kemahiran (*upskilling*) dan pemahiran semula (*reskilling*) kepada pemain industri pelancongan.

SOALAN NO : 23

- (iv) memperkukuh semula industri acara perniagaan negara (MICE) menerusi inisiatif-inisiatif melalui agensi MOTAC iaitu Malaysia Convention & Exhibition Bureau (MyCEB):
 - (a) program '*Let's Meet Locally*', '*Let's Meet Tomorrow*' dan '*Let's Meet Now*' yang menawarkan insentif khas untuk memastikan penganjur acara tempatan dapat meningkatkan semula prestasi perniagaan masing-masing;
 - (b) program 3R (*Reset, Restart & Responsible*) bertujuan memberi perlindungan dalam bentuk insurans, peluang untuk menghadiri acara perdagangan antarabangsa untuk mendapatkan *business leads* dan *event contract* serta bantuan untuk mendapatkan pengiktirafan profesional yang disediakan oleh badan-badan antarabangsa; dan
 - (c) program '*Subvention*' atau Sokongan Kewangan Teknikal disediakan kepada persatuan dan penganjur acara perniagaan untuk membida dan membawa masuk acara perniagaan antarabangsa berprofil tinggi.
- (v) menggalakkan lebih ramai penggiat industri untuk melibatkan diri sebagai penyedia perkhidmatan mesra Muslim yang diiktiraf melalui pelbagai program seperti *Muslim Friendly Accommodation Recognition* (MFAR), *Muslim Friendly Tourist Guide* (MFTG) dan *Muslim Friendly Tourism Products, Hospitality and Packages* (MFT PROHPACK) kepada para pengusaha produk-produk pelancongan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN KESAVAN A/L SUBRAMANIAM
[SUNGAI SIPUT]**

TARIKH : 04 OGOS 2022 (KHAMIS)

SOALAN

TUAN KESAVAN A/L SUBRAMANIAM [SUNGAI SIPUT] minta **MENTERI KANAN PENDIDIKAN** menyatakan status terkini, bangunan baru SJKT Ladang Sungai Reyla yang masih belum disiapkan. Padahal kerajaan berjanji akan disiapkan sebelum bulan Jun 2020.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) telah diluluskan projek pembinaan bangunan baharu Sekolah Jenis Kebangsaan Tamil (SJKT) Ladang Sungai Reyla, Sungai Siput, Perak di bawah Pakej Rangsangan Khas Tahun 2012.

Kelewatan untuk menyiapkan sekolah tersebut adalah disebabkan kegagalan kontraktor menyiapkan baki kerja seperti kerja bekalan elektrik, kerja-kerja penurapan jalan dan pematuhan syarat-syarat Kebenaran Merancang (KM) daripada Pihak Berkuasa Tempatan (PBT). Oleh kerana kelewatan kontraktor dalam menyiapkan baki kerja tersebut, kelulusan pembekalan elektrik oleh pihak Tenaga Nasional Berhad (TNB) juga telah terbatal pada 6 Disember 2019.

Pada 12 Februari 2020, KPM telah mengeluarkan arahan kepada kontraktor supaya mendapatkan semula kelulusan TNB dan menyiapkan baki kerja di tapak. Adalah menjadi tanggungjawab kontraktor untuk mematuhi syarat-syarat PBT dan pembekal utiliti sepertimana yang ditetapkan di dalam Dokumen Kontrak.

Untuk makluman Ahli Yang Berhormat, KPM juga telah mengambil tindakan membantu dengan menghubungi dan mengemukakan surat sokongan kepada pihak TNB pada 22 Oktober 2020 untuk mempercepatkan kelulusan bekalan tenaga ini. Bagi memastikan pihak kontraktor dapat menyelesaikan isu yang tertangguh ini, KPM telah mengadakan sesi libat urus dengan pihak kontraktor pada 30 Ogos 2021.

Untuk makluman Ahli Yang Berhormat, KPM juga telah menghantar permohonan bagi pengecualian jaminan bank untuk penyerahan tapak pencawang kepada TNB pada 13 April 2022. KPM telah mengemukakan surat susulan kepada TNB pada 12 Julai 2022 bagi mendapatkan status permohonan tersebut.

Berdasarkan laporan kemajuan serta baki kerja semasa, dijangkakan projek dapat disiapkan pada Disember 2022 tertakluk kepada kelulusan pihak TNB serta komitmen penuh daripada kontraktor mengikut klausa yang termaktub dalam kontrak.

Sekian, terima kasih.

**PEMBERITAHUAN PERTANYAAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI HAJAH ROHANI BINTI HAJI
ABDUL KARIM [BATANG LUPAR]**

TARIKH : 4 OGOS 2022 (KHAMIS)

SOALAN

Dato' Sri Hajah Rohani binti Haji Abdul Karim [Batang Lupar] minta **MENTERI KOMUNIKASI DAN MULTIMEDIA** menyatakan bagaimanakah teknologi 5G boleh dinikmati oleh masyarakat luar bandar kerana masih lagi terdapat banyak kawasan yang hanya ada teknologi 3G dan 4G malah lebih mengecewakan tiada rangkaian langsung seperti di beberapa kawasan luar bandar Batang Lupar.

JAWAPAN

Tuan Yang di-Pertua,

Kerajaan melalui Suruhanjaya Komunikasi dan Multimedia Malaysia (SKMM) menerusi Pelan Jalinan Digital Negara (JENDELA) sentiasa cakna dan akan terus meningkatkan usaha bagi memberikan akses gentian optik kepada 9 juta premis di seluruh negara, kadar kelajuan purata jalur lebar mudah alih kepada 100Mbps melalui pelaksanaan 5G dan liputan jalur lebar mudah alih 4G di kawasan berpenduduk kepada 100%.

Peratusan liputan 4G di kawasan berpenduduk di Sarawak telah meningkat kepada 84.24% pada suku pertama 2022 berbanding 73.67% sebelum pelaksanaan Pelan Jalinan Digital Negara (JENDELA). Disamping itu, peratusan liputan 4G di kawasan berpenduduk di Parlimen Batang Lupar pula telah meningkat kepada 74.07% pada suku pertama 2022 berbanding 65.85% sebelum pelaksanaan Pelan Jalinan Digital Negara (JENDELA). Melalui Pelan JENDELA Fasa 1, pelaksanaan dan pencapaian di Sarawak dan Parlimen Batang Lupar setakat suku pertama 2022 adalah seperti berikut:

Inisiatif	Tapak Menara Baharu		Naik Taraf Stesen Pemancar		Premis Tersedia Gentian Optik		Jalur Lebar Satelit	
	Siap	Pelaksanaan	Siap	Pelaksanaan	Siap	Pelaksanaan	Siap	Pelaksanaan
Sarawak	85	741	2,933	247	78,262	29,914	523	0
Batang Lupar	0	15	60	6	388	181	-	-

Pelaksanaan rangkaian 5G oleh Digital Nasional Berhad (DNB) sedang dijalankan secara berfasa dan ia bermula di kawasan-kawasan yang mempunyai aktiviti ekonomi yang tinggi kerana kelebihan teknologi 5G lebih memberi impak kepada sektor perusahaan dan industri.

Peluasan rangkaian 5G juga diteruskan bagi tahun 2022 dengan sasaran 36% liputan di kawasan berpenduduk dan melibatkan penyediaan kira-kira 4,000 tapak 5G. Kawasan yang terlibat adalah

kawasan Lembah Klang dan bandar-bandar utama di Johor, Melaka, Negeri Sembilan, Perak, Pulau Pinang, Sabah dan Sarawak. Pihak DNB telah menyasarkan sehingga 80% kawasan berpenduduk akan mendapat liputan 5G pada penghujung tahun 2024. Pelaksanaan yang pantas dan meluas ini akan mengurangkan risiko peluasan jurang digital dalam masyarakat. Peluasan liputan melebihi 80% kawasan berpenduduk akan dilaksanakan DNB pada tahun-tahun seterusnya.

Pelaksanaan pembangunan rangkaian 5G di negeri Sarawak telah bermula pada suku kedua tahun 2022. Pihak DNB sedang bekerjasama dengan pihak Kerajaan Negeri Sarawak dan agensi-agensi yang berkaitan bagi memastikan pembangunan rangkaian 5G berjalan lancar. Untuk tahun 2022, sebanyak 339 tapak 5G dirancang dibangunkan iaitu 227 tapak di daerah Kuching dan 112 tapak di daerah Miri. Sehingga 11 Julai 2022, sebanyak 17 tapak telah siap dibangunkan, kesemuanya di daerah Kuching.

Sekian, terima kasih

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN FONG KUI LUN [BUKIT BINTANG]
TARIKH : 04 OGOS 2022 (KHAMIS)

SOALAN

TUAN FONG KUI LUN [BUKIT BINTANG] minta **MENTERI KEWANGAN** menyatakan jumlah bantuan subsidi dan jenisnya yang dikeluarkan oleh Kerajaan bagi tempoh 2020-2022.

JAWAPAN

Tuan Yang di-Pertua,

Jumlah perbelanjaan bagi bantuan dan subsidi bagi tahun 2020 adalah berjumlah RM23.3 bilion dan bagi tahun 2021 adalah berjumlah RM37.3 bilion. Untuk tahun 2022, peruntukan yang disediakan di bawah Bajet 2022 adalah berjumlah RM31 bilion.

Walau bagaimanapun, ekoran kenaikan harga komoditi global dengan mendadak, langkah Kerajaan untuk mengekalkan harga bersubsidi terutamanya untuk bahanapi melibatkan peningkatan ketara subsidi untuk ditanggung oleh Kerajaan. Berdasarkan unjuran terkini, perbelanjaan bantuan dan subsidi dijangka akan mencecah paras RM77.7 bilion untuk tahun 2022.

Peningkatan perbelanjaan lebih RM40 bilion disebabkan terutamanya oleh subsidi produk petroleum, iaitu Petrol RON95, Diesel dan LPG. Subsidi bagi produk petroleum meningkat daripada RM1.6 bilion pada tahun 2020 kepada RM11 bilion pada tahun 2021 dan diunjurkan meningkat mencecah RM37 bilion pada tahun 2022.

Subsidi minyak masak juga menunjukkan tren meingkat, daripada RM0.53 bilion pada tahun 2020 kepada RM2.2 bilion pada tahun 2021 dan dijangka berpotensi mencecah RM4 bilion.

Tanggungan Kerajaan berhubung bantuan dan subsidi yang kian meningkat adalah berdasarkan komitmen Kerajaan bagi melindungi rakyat daripada kesan penuh kenaikan harga komoditi dan makanan dunia yang mendadak.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SRI RICHARD RIOT ANAK JAEM
[SERIAN]**

TARIKH : 04 OGOS 2022 (KHAMIS)

SOALAN

DATO' SRI RICHARD RIOT ANAK JAEM [SERIAN] minta **MENTERI KANAN PENDIDIKAN** menyatakan apakah status 'Pemutihan Hakmilik Tanah' sekolah-sekolah rendah di negeri Sarawak khasnya di kawasan Parlimen Serian.

JAWAPAN

Tuan Yang di-Pertua,

Untuk makluman Ahli Yang Berhormat, program pemutihan tapak pendidikan Kementerian Pendidikan Malaysia (KPM) sentiasa dilaksanakan secara berterusan bagi memastikan tapak-tapak sekolah KPM didaftarkan sebagai hak milik Pesuruhjaya Tanah Persekutuan (PTP).

Berdasarkan kedudukan pada 30 Jun 2022, jumlah keseluruhan tapak sekolah rendah dan menengah KPM di seluruh negeri Sarawak adalah sebanyak 1,126. Daripada jumlah tersebut, sebanyak 958 tapak adalah sekolah rendah iaitu 359 tapak telah selesai didaftarkan sebagai hak milik PTP. Baki lagi 599 tapak sekolah rendah masih dalam proses pemutihan.

Untuk makluman Ahli Yang Berhormat, bagi kawasan Parlimen Serian, terdapat sebanyak 44 tapak sekolah rendah. Daripada jumlah tersebut, sebanyak 12 tapak sekolah rendah telah selesai pemilikan PTP. Baki lagi 32 tapak sekolah rendah masih dalam proses pemutihan di pelbagai peringkat seperti semakan terperinci dan penyediaan dokumen di peringkat KPM, Jabatan Ketua Pengarah Tanah dan Galian Persekutuan (JKPTG) serta semakan di peringkat Jabatan Tanah dan Survei (JTS) Negeri Sarawak.

Sehubungan ini, KPM komited untuk memastikan semua tapak sekolah berkenaan ditukar status kepada hak milik PTP dengan membuat perolehan tapak mengikut syarat-syarat yang ditetapkan oleh JKPTG dan kerajaan negeri.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN OSCAR LING CHAI YEW [SIBU]
TARIKH : 04 OGOS 2022 (KHAMIS)

SOALAN

TUAN OSCAR LING CHAI YEW [SIBU] minta **MENTERI KEWANGAN** menyatakan masalah yang berlaku kepada sistem keselamatan bank kita apabila wang boleh hilang tanpa sebab dari akaun bank dan adakah bank harus bertanggungjawab terhadap masalah ini. Apakah keputusan siasatan terkini terhadap kes ini dan senaraikan statistik penipuan bank berlaku di Sibu dan mengikut negeri dalam Malaysia.

JAWAPAN

Tuan Yang di-Pertua,

Untuk makluman Yang Berhormat, jenayah penipuan adalah satu kesalahan yang termaktub dalam Kanun Keseksaan dan siasatannya adalah dalam bidang kuasa pihak Polis Diraja Malaysia (PDRM). Sebarang insiden penipuan haruslah dilaporkan terus kepada pihak PDRM untuk siasatan lanjut. Menurut rekod PDRM, statistik kes jenayah atas talian bagi tahun 2021 hingga 30 Jun 2022 adalah seperti berikut:

TAHUN	JUMLAH
2021	20,701
2022 (sehingga 30 Jun 2022)	10,468

Isu kehilangan wang dalam akaun tanpa pengetahuan / kebenaran pelanggan adalah berpunca terutamanya daripada pelbagai kaedah pemerdayaan oleh sindiket penipuan kewangan untuk mendorong pelanggan institusi kewangan menyerahkan maklumat perbankan sama ada secara sedar atau tidak. Contohnya, tawaran servis pembersih rumah atau penghantaran makanan di mana sindiket penipuan kewangan mengarahkan mangsa memuat turun fail aplikasi APK (*Android Package Kit*) yang boleh membaca sistem pesanan ringkas (SMS) tanpa disedari mangsa, berserta skrin pembayaran atau pemindahan wang yang palsu. Ada masanya, sindiket-sindiket ini turut menyamar sebagai pihak berkuasa atau bank bagi memancing maklumat perbankan dari mangsa-mangsa. Justeru, pihak Bank Negara Malaysia (BNM) dan industri perbankan sentiasa mengingatkan orang ramai supaya berhati-hati dan melindungi maklumat perbankan daripada dikongsi dengan pihak yang tidak bertanggungjawab.

Orang ramai dinasihatkan agar mengambil tindakan berhati-hati bagi mengelakkan daripada terpedaya dan menjadi mangsa penipuan. Antara tindakan yang boleh dipraktikkan adalah:

- Jangan sesekali panik dan mengikut arahan yang diberikan oleh pemanggil termasuk pemindahan wang kepada orang yang tidak

dikenali, tanpa terlebih dahulu menghubungi pihak polis atau institusi kewangan terbabit;

- Jangan hubungi semula nombor telefon yang diterima, sebaliknya dapatkan nombor telefon rasmi syarikat, organisasi atau institusi terbabit melalui laman sesawang rasmi untuk pengesahan lanjut;
- Jangan dedahkan atau kongsi butiran ID pengguna dan kata laluan akaun perbankan atas talian, nombor dan PIN kad ATM atau kad kredit anda kepada orang yang tidak dikenali;
- Jangan memuat turun aplikasi pihak ketiga menggunakan fail APK diberikan oleh orang yang tidak dikenali kerana aplikasi terbabit boleh mengakses maklumat peribadi dalam telefon mangsa; dan
- Sentiasa berwaspada dan tidak mudah terpedaya dengan muslihat atau tipu helah pihak-pihak tertentu.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : TUAN NIK MOHAMAD ABDUH BIN NIK
ABDUL AZIZ (BACHOK)**

TARIKH : 4 OGOS 2022 (KHAMIS)

SOALAN

TUAN NIK MOHAMAD ABDUH BIN NIK ABDUL AZIZ (BACHOK) minta **MENTERI PERTANIAN DAN INDUSTRI MAKANAN** menyatakan perancangan Kementerian untuk memperbanyakkan jumlah ternakan lembu bersaiz besar seperti yang diperkatakan iaitu “lembu sado” dan menjadikan Kelantan sebagai peneraju industri penternakan khususnya di Parlimen Bachok.

JAWAPAN

Tuan Yang di-Pertua,

Untuk makluman Ahli Yang Berhormat, “lembu sado” adalah lembu pedaging kacukan yang terhasil melalui teknologi pembiakan secara permanian beradas menggunakan semen beku lembu daripada baka yang mempunyai ciri-ciri otot berganda semulajadi seperti *Charolais*, *Limousin* dan *Belgian Blue*. Penternakan lembu sado ini telah mendapat perhatian dan sambutan yang baik di kalangan penternak-penternak berskala kecil terutamanya di negeri-negeri pantai timur kerana pengeluaran dagingnya yang tinggi. Usaha ini juga dilihat selari dengan Dasar Agromakanan Negara (DAN2.0) dan Pelan Strategik Industri Pedaging Negara (*Bif Plan*) 2021 – 2025.

SOALAN NO: 29

Bagi menyokong industri penternakan lembu sado di Kelantan dan khususnya di Parlimen Bachok, Kementerian menerusi Jabatan Perkhidmatan Veterinar (DVS) Persekutuan dan Negeri Kelantan telah melaksanakan tindakan-tindakan seperti berikut:

- (i) memperkenalkan sistem pengeluaran lembu sado yang dinamakan NAIMbif;
- (ii) menyediakan perkhidmatan pernian beradas yang cekap;
- (iii) menyediakan bekalan semen beku yang bermutu dan berkualiti;
- (iv) melancarkan kempen "Jom Pakat Simpan Induk yang Berkualiti" untuk mengalakkan penternak menyimpan berkualiti bagi menghasilkan anak lembu kacukan berkualiti; dan
- (v) membuat perolehan strategik induk-induk lembu kacukan *charolais*.

Menerusi inisiatif-iniasitif yang disediakan tersebut diharapkan dapat menarik lebih ramai penyertaan golongan penternak untuk menceburi industri penternakan lembu sado seterusnya membantu meningkatkan pengeluaran daging negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN KARUPAIYA A/L MUTUSAMI
[PADANG SERAI]**

TARIKH : 4 OGOS 2022 (KHAMIS)

SOALAN

Minta **MENTERI PENGAJIAN TINGGI** menyatakan jumlah pelajar yang memasuki IPTA pada setiap tahun dan agihan purata mengikut kaum.

JAWAPAN

Tan Sri Yang di-Pertua,

Untuk makluman Ahli Yang Berhormat, purata kemasukan pelajar lepasan STPM/Matrikulasi/Asasi untuk lima (5) tahun terkini bagi **Bumiputera adalah sebanyak 37,701 (77.65%), manakala Bukan Bumiputera sebanyak 10,854 (22.35%)**. Purata kadar penawaran berbanding permohonan yang layak bagi calon Bumiputera untuk tempoh lima (5) tahun adalah sebanyak 83.67% berbanding 45,059 calon Bumiputera yang layak. Manakala purata kadar penawaran bagi tempoh yang sama bagi calon Bukan Bumiputera ialah 86.62% berbanding 12,531 calon Bukan Bumiputera yang layak.

Dalam konteks purata penawaran kepada calon **Bumiputera mengikut bidang bagi tempoh lima (5) tahun terkini** adalah seperti berikut:

- (i) Pendidikan – 2,983 calon;
- (ii) Sastera & Kemanusiaan – 4,161 calon;
- (iii) Sains Sosial, Perniagaan & Undang-undang – 12,725 calon;
- (iv) Sains, Matematik & Perkomputeran – 6,398 calon;
- (v) Kejuruteraan, Pembuatan & Pembinaan – 7,272 calon;
- (vi) Pertanian & Veterinar – 493 calon;
- (vii) Kesihatan & Kebajikan – 2,205 calon; dan
- (viii) Perkhidmatan – 1,464 calon.

Manakala purata penawaran kepada calon **Bukan Bumiputera mengikut bidang** bagi tempoh yang sama adalah seperti yang berikut:

- (i) Pendidikan – 357 calon;
- (ii) Sastera & Kemanusiaan – 708 calon;
- (iii) Sains Sosial, Perniagaan & Undang-undang – 3,961 calon;
- (iv) Sains, Matematik & Perkomputeran – 2,239 calon;
- (v) Kejuruteraan, Pembuatan & Pembinaan – 2,579 calon;
- (vi) Pertanian & Veterinar – 126 calon;
- (vii) Kesihatan & Kebajikan – 650 calon; dan
- (viii) Perkhidmatan – 235 calon.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN
DARIPADA : TUAN SABRI BIN AZIT [JERAI]
TARIKH : 04 OGOS 2022 (KHAMIS)

SOALAN

TUAN SABRI BIN AZIT [JERAI] minta **MENTERI KANAN PENDIDIKAN** menyatakan berapakah jumlah calon guru *contract of service* (CoS) yang sudah mendapat penempatan bertugas.

BPSH

JAWAPAN

Tuan Yang di-Pertua,

Kementerian Pendidikan Malaysia (KPM) memaklumkan bahawa sehingga Julai 2022, seramai 16,381 guru baharu telah ditempatkan di seluruh negara bawah Pengambilan Khas Pegawai Perkhidmatan Pendidikan DG41 Secara *One Off* Tahun 2021. Daripada jumlah tersebut, seramai 2,611 guru merupakan lantikan *contract of service* (CoS). Surat tawaran penempatan telah dikeluarkan pada 15 Julai 2022 dan guru melapor diri di sekolah bermula pada 25 Julai 2022.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN CHAN FOONG HIN [KOTA
KINABALU]
TARIKH : 04 OGOS 2022 (KHAMIS)

SOALAN

TUAN CHAN FOONG HIN [KOTA KINABALU] minta **MENTERI KEWANGAN** menyatakan jumlah Cukai Makmur (cukai khas sekali saja yang dikuatkuasakan menerusi pembentangan Bajet 2022) yang telah dikutip setakat Jun 2022. Adakah Cukai Makmur berjaya dalam matlamatnya bantu rakyat hadapi inflasi dan adakah Kerajaan bercadang meneruskannya pada Bajet 2023.

JAWAPAN

Tuan Yang di-Pertua,

Untuk makluman Ahli Yang Berhormat, melalui pembentangan Bajet 2022 Kerajaan telah melaksanakan Cukai Makmur secara *one-off* terpakai hanya kepada syarikat yang memperoleh pendapatan bercukai melebihi seratus juta ringgit (RM100 juta). Cukai pada kadar 33 peratus akan dikenakan ke atas jumlah pendapatan bercukai yang melebihi seratus juta ringgit (RM100 juta) bagi tahun taksiran 2022 sahaja. Kerajaan mensasarkan sekurang-kurangnya **4 bilion ringgit** hasil tambahan daripada Cukai Makmur.

Memandangkan pengenaan Cukai Makmur adalah bagi tahun taksiran 2022, maka jumlah kutipan hasil khusus dari cukai tersebut hanya boleh ditentukan setelah semua syarikat membuat pelaporan cukai dalam Borang Nyata Cukai Pendapatan (BNCP) bagi tahun taksiran 2022 dalam tempoh tujuh (7) bulan dari tempoh akhir tahun perakaunan syarikat. Oleh yang demikian, jumlah kutipan hasil daripada Cukai Makmur seperti yang diminta belum dapat dikemukakan buat masa ini.

Seperti yang telah dimaklumkan sebelum ini, Cukai Makmur adalah berbentuk *one-off* iaitu bagi tahun taksiran 2022 sahaja dan Kerajaan tidak bercadang meneruskannya dalam Bajet 2023.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI CHE ABDULLAH BIN MAT NAWI
[TUMPAT]**

TARIKH : 4 OGOS 2022 (KHAMIS)

SOALAN

Minta **MENTERI PENGAJIAN TINGGI** menyatakan status kemampuan Perbadanan Tabung Pendidikan Tinggi Nasional (PTPTN) dalam memberi pinjaman kepada para pelajar di kala masih ramai peminjam yang sudah menamatkan pengajian belum melunaskan hutang sepenuhnya kepada PTPTN.

JAWAPAN

Tan Sri Yang di-Pertua,

Secara puratanya, PTPTN telah meluluskan pinjaman kepada 180,000 peminjam baharu setiap tahun dengan jumlah peruntukan antara RM3.5 bilion hingga RM4 bilion setahun. Mengambil kira model pembiayaan PTPTN yang bergantung kepada kutipan bayaran balik daripada peminjam sebagai sumber utama dana pusingan, sebahagian besar keperluan peruntukan pembiayaan pinjaman PTPTN adalah berdasarkan kepada kutipan bayaran balik yang diterima. Dalam perkara ini, sebarang kekurangan akan ditampung melalui pinjaman/pengeluaran sukuk dengan jaminan Kerajaan.

Untuk makluman Ahli Yang Berhormat, sehingga 30 Jun 2022, seramai 2.05 juta (82.04%) peminjam telah membuat bayaran balik pinjaman mereka dengan jumlah keseluruhan sebanyak RM17.83 bilion. Berdasarkan kedudukan kewangan PTPTN serta komitmen Kerajaan, PTPTN masih berupaya untuk memberikan pinjaman pendidikan kepada pelajar yang layak.

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN
DARIPADA : YB PUAN TEO NIE CHING [KULAI]
TARIKH : 4 OGOS 2022 (KHAMIS)

SOALAN

YB PUAN TEO NIE CHING [KULAI] minta **MENTERI PENGAJIAN TINGGI** menyatakan tindakan yang telah dan akan diambil untuk memastikan mutu profesor supaya tiada **profesor kangkung** di universiti tempatan.

JAWAPAN

Tan Sri Yang di-Pertua,

Kakitangan akademik universiti awam (UA) yang dilantik ke jawatan profesor penuh telah melalui pelbagai kaedah tapisan serta pengukuran yang ditetapkan oleh pelbagai pihak. Dalam hubungan ini, seseorang profesor perlu memberikan dedikasi sepenuhnya kepada bidang kepakaran yang beliau ceburi dengan membuat penulisan artikel dan jurnal yang diiktiraf dunia seperti *Scopus*, *Thomson Reuters ISI* dan *Google Scholar*.

Bagi maksud ini, Kementerian Pengajian Tinggi (KPT) telah menerbitkan dua (2) garis panduan, iaitu Garis Panduan Pelantikan dan Kenaikan Pangkat ke Jawatan Profesor di Institusi Pengajian Tinggi di Malaysia pada tahun 2012 serta *University Transformation Programme (UniTP)*, *Orange Book: Strengthening Academic Career Pathways and Leadership Development* pada tahun 2015 sebagai rujukan bagi laluan kerjaya kakitangan akademik.

Dalam konteks IPTS pula, adaptasi *University Transformation Programme (UniTP)*, *Orange Book: Strengthening Academic Career Pathways and Leadership Development* diguna pakai. Selain itu, dokumen *Way Forward for Private Higher Education Institutions: Education as an Industry (2020 – 2025)* juga menjadi dokumen penting dalam menentukan tatacara dan tadbir urus IPTS yang cekap. Justeru, pelantikan atau kenaikan pangkat ke jawatan profesor atau profesor kanan hendaklah dibuat berdasarkan garis panduan yang dikeluarkan oleh Ketua Pendaftar IPTS.

Selain itu, Agensi Kelayakan Malaysia (MQA) turut menyemak aspek akreditasi program staf akademik. Berdasarkan kepada standard yang ditetapkan dalam Kod Amalan Akreditasi Program, Institut Pendidikan Tinggi (IPT) bertanggungjawab untuk mewujudkan prosedur yang jelas berkaitan polisi dan kriteria pelantikan staf akademik dengan mengambil kira aspek kelayakan akademik dan pengalaman.

Sebagai sokongan kepada jaminan kualiti staf akademik, MQA juga telah membangunkan Garis Panduan Amalan Baik: Staf Akademik yang meliputi empat (4) bidang amalan, iaitu pengambilan, pentadbiran, pembangunan dan perkhidmatan profesional staf akademik untuk rujukan IPT. Turut diterangkan dalam Garis Panduan ini ialah kategori jawatan akademik di pelbagai peringkat termasuklah dari segi peranan dan ciri-ciri akademik serta keserjanaan. Pemantauan kualiti bagi perkara-perkara yang dinyatakan juga diambil kira semasa lawatan akreditasi dan audit pematuhan oleh MQA.

Tuntasnya, pelantikan seorang pensyarah ke jawatan profesor perlu melalui pelbagai mekanisme serta tapisan bagi memastikan mereka yang dilantik benar-benar layak. KPT berharap tiada lagi suara-suara nakal yang menggelarkan para ilmuwan kita di UA dan IPTS sebagai “Profesor Kangkung”, sebaliknya menghargai sumbangan buah fikiran serta tenaga mereka dalam membentuk peradaban bangsa yang berilmu dan dihormati.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : DATUK SERI DR. SHAMSUL ANUAR BIN
HAJI NASARAH (LENGGONG)**

TARIKH : 4 OGOS 2022 (KHAMIS)

SOALAN

DATUK SERI DR. SHAMSUL ANUAR BIN HAJI NASARAH (LENGGONG) minta **MENTERI PERTANIAN DAN INDUSTRI MAKANAN** menyatakan apakah langkah komprehensif yang dilaksanakan untuk mengurangkan kebergantungan terhadap import makanan yang mudah terdedah kepada kesan domino akibat daripada perubahan krisis di peringkat global di samping memastikan tahap sekuriti makanan negara berada di dalam keadaan yang mencukupi dengan harga yang berpatutan.

JAWAPAN:

Tuan Yang di-Pertua,

Untuk makluman Ahli Yang Berhormat, Kerajaan mengambil perhatian yang serius terhadap isu kebergantungan terhadap import makanan yang semakin meningkat setiap tahun. Pada tahun 2021, import makanan mencatat nilai RM63.6 bilion berbanding RM55.4 bilion pada tahun 2020 bagi memastikan bekalan makanan domestik kekal terjamin. Namun begitu, tidak dapat dinafikan apabila berlaku konflik geopolitik di peringkat global seperti konflik Rusia- Ukraine, ia memberi kesan kepada sektor pertanian dunia memandangkan Rusia merupakan pengeksport utama baja di dunia.

Dalam hal ini, Kerajaan sentiasa komited dalam memastikan bekalan makanan negara kekal terjamin. Hal ini jelas apabila Kementerian Pertanian dan Industri Makanan (MAFI) telah mengenal pasti beberapa intervensi yang bertujuan untuk memastikan bekalan makanan mencukupi dalam usaha mengurangkan kebergantungan terhadap import makanan serta memastikan harga kekal stabil.

Antara strategi jangka pendek dalam pelaksanaan adalah:

- (i) melaksanakan sekatan eksport ayam bulat berkuat kuasa 1 Jun 2022 melibatkan bekalan ayam sebanyak 3.6 juta ekor sebulan sehingga bekalan ayam kembali stabil;
- (ii) mewujudkan stokpail ikan melibatkan 1,000 tan metrik untuk menstabilkan bekalan ikan oleh Lembaga Kemajuan Ikan Malaysia;
- (iii) memberi subsidi kepada pengeluar bagi membantu mengurangkan kos pengeluaran di ladang yang turut mempengaruhi harga jualan kepada pengguna;
- (iv) Memberi moratorium penguatkuasaan bagi pengambilan pekerja asing dalam industri agromakanan supaya produktiviti di tahap optimum;
- (v) melaksanakan advokasi berteraskan kehilangan lepas tuai dan pembaziran makanan secara berterusan; dan

- (vi) bantuan melalui “Baucar Keluarga Malaysia” sebanyak RM100 kepada golongan B40 dan RM50 kepada golongan bujang.

Manakala intervensi langkah sederhana dan panjang merangkumi usaha untuk:

- (i) mengkaji mekanisme untuk mengurangkan kos minyak sawit mentah kepada syarikat pengilangan makanan ternakan sebagai salah satu daripada inisiatif untuk mengurangkan kos makanan ternakan;
- (ii) melaksanakan semakan semula ke atas tarif elektrik sektor pertanian yang lebih tinggi berbanding tarif perindustrian untuk mengurangkan bebanan kos utiliti oleh pengeluar makanan;
- (iii) memberi galakan insentif cukai bersasar kepada 1,000 syarikat yang terlibat dalam aktiviti pertanian melalui cadangan pelanjutan tempoh pelepasan cukai pendapatan daripada 10 tahun kepada 15 tahun;
- (iv) menggalakkan aktiviti pertanian bandar melalui pemerkasaan Program Kebuniti Keluarga Malaysia dengan dana tambahan sebanyak RM30 juta; dan
- (v) memperkukuhkan industri input pertanian menerusi penggantian sumber protein yang diimport, pembangunan aditif makanan ternakan, penambahbaikan formulasi makanan ternakan dan pembangunan jagung bijian.

MAFI yakin intervensi yang diambil mampu menjamin tahap sekuriti makanan negara berada di dalam keadaan yang mencukupi dengan harga yang berpatutan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN NGA KOR MING [TELUK INTAN]
TARIKH : 04 OGOS 2022 (KHAMIS)

SOALAN

TUAN NGA KOR MING [TELUK INTAN] minta **MENTERI KEWANGAN** menyatakan secara terperinci setakat hari ini berapa jumlah hutang 1MDB yang masih perlu dibayar dan berapa jumlah dana 1MDB yang berjaya dituntut balik demi menjaga kepentingan rakyat dan negara kita.

JAWAPAN

Tuan Yang di-Pertua,

Setakat 30 Jun 2022, dengan andaian kadar tukaran wang asing USD1.00 bersamaan dengan RM4.50, baki komitmen hutang 1Malaysia Development Bhd (1MDB) adalah sebanyak **RM32.08 bilion** seperti berikut:

Bil.	Hutang	Prinsipal (RM Juta)	Faedah (RM Juta)	Jumlah (RM Juta)
1.	Sukuk IMTN terbitan 1MDB [P:RM5b, i:5.75%, M: 27 Mei 2039]	5,000	4,888	9,888
2.	Bon terbitan 1MDB Global Investment Limited (1MDG GIL) [P:USD3b, i:4.4%, M: 9 Mac 2023]	13,500	594	14,094

3.	Bon terbitan 1MDB Energy (Langat) Limited (1MELL) [P:USD1.75b, i:5.75%, M: 18 Okt 2022]	7,875	226	8,101
		26,375	5,708	32,083

Nota: P - Prinsipal, i - Faedah, M - Tahun Matang

Jumlah dana pemulihan aset 1MDB yang telah berjaya didapatkan kembali setakat 30 Jun 2022 adalah sebanyak **RM19.28 bilion** daripada beberapa mata wang asing termasuk dolar AS, dolar Singapura dan dolar Australia. Dana ini telah dan akan digunakan bagi tujuan pembayaran hutang 1MDB di mana setakat 30 Jun 2022, sebanyak **RM10.84 bilion** telah digunakan untuk tujuan pelunasan hutang 1MDB.

Tuan Yang di-Pertua,

Proses untuk mendapatkan semula dana 1MDB sedang berjalan dan ia merupakan suatu proses yang rumit dan panjang yang boleh memakan masa bertahun lamanya. Ini kerana ia bukan sahaja melibatkan kerjasama di antara beberapa agensi tempatan dengan agensi asing daripada pelbagai negara, malahan ia turut melibatkan proses perundangan di mahkamah dan proses rundingan penyelesaian.

Namun begitu, Kerajaan tetap komited dalam meneruskan usaha untuk mendapatkan semula semua dana berkaitan 1MDB yang telah diseleweng sama ada melalui tindakan undang-undang mahupun rundingan penyelesaian dengan matlamat utama untuk memaksimumkan pulangan bagi melunaskan hutang 1MDB dan mengurangkan beban kewangan Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI HAJI AHMAD BIN HAJI MASLAN
[PONTIAN]**

TARIKH : 4 OGOS 2022 (KHAMIS)

SOALAN

Minta **MENTERI PENGAJIAN TINGGI** menyatakan langkah-langkah yang diambil serta jumlah peruntukan terlibat bagi membantu siswa-siswi pelajar B40 di semua institusi di bawah Kementerian untuk tahun 2021 dan tahun 2022. Nyatakan juga usaha kebolehpasaran graduan dan kejayaan-kejayaannya.

JAWAPAN

Tan Sri Yang di-Pertua,

Sehingga 31 Mac 2022, secara keseluruhannya, seramai 255,673 orang (57.45 peratus) pelajar B40 di Universiti Awam (UA), Politeknik dan Kolej Komuniti (KK) menerima tajaan/biasiswa dari Kementerian atau Agensi Kerajaan, yayasan, syarikat, Lembaga Zakat/Majlis Agama Negeri dan Unit Zakat IPT. Kerajaan juga telah melaksanakan pelbagai intervensi strategik bagi membantu meringankan beban pelajar di Institusi Pendidikan Tinggi (IPT).

Antara bantuan yang diberikan kepada pelajar golongan B40 pada tahun 2021 dan 2022 termasuklah:

- (i) **Pengurangan Yuran Universiti Awam (UA).** Pengurangan kadar yuran asrama, yuran perkhidmatan atau aktiviti UA sehingga 35 peratus untuk tempoh Semester Akademik 2 2019/2020 hingga Semester 1 2021/2022. Inisiatif ini telah memanfaatkan pelajar warganegara di UA dengan nilai keseluruhan RM309.6 juta;
- (ii) **Penangguhan dan Diskaun Bayaran Balik PTPTN.** Inisiatif ini dilaksanakan sebanyak empat (4) kali untuk peminjam yang terkesan akibat COVID-19 dan bencana banjir dengan amaun kutipan tertangguh berjumlah RM1.17 billion. PTPTN turut memperkenalkan diskaun bayaran balik pinjaman PTPTN bermula 1 November 2021 hingga 30 April 2022 yang telah memberikan manfaat kepada 443,722 peminjam PTPTN. YAB Perdana Menteri turut mengumumkan pada 27 Julai 2022 yang lepas bahawa semua peminjam PTPTN yang menamatkan pengajian bermula 2019 dan mendapat kelas pertama diberikan pengecualian bayaran balik.
- (iii) **Bantuan Kewangan Pelajar Kolej Komuniti (BKPKK).** Pada tahun 2021, seramai 10,238 orang pelajar telah menerima BKPKK, manakala, bagi tahun 2022, iaitu setakat 30 Jun 2022, seramai 6,485 orang pelajar telah menerima bantuan ini.

- (iv) **Dermasiswa B40 TVET.** Bermula tahun 2022, pelajar B40 yang melanjutkan pelajaran dalam bidang teknikal dan vokasional di Politeknik dan Kolej Komuniti layak memohon Dermasiswa B40 TVET. Program ini melibatkan implikasi kewangan berjumlah RM36.41 juta bagi setiap pengambilan.
- (v) **Bantuan Komputer Riba, Pelan Data B40 dan PerantiSiswa Keluarga Malaysia.** Lebih 10 ribu unit komputer riba telah diagihkan kepada para pelajar B40 secara bersasar sejak pandemik melanda. Malah, seramai 320,296 orang pelajar telah menerima manfaat Bantuan Pelan Data B40 dengan peruntukan sebanyak RM24 juta. KPT turut bekerjasama dengan Kementerian Komunikasi dan Multimedia Malaysia (K-KOMM) dan Kementerian Kewangan Malaysia (MOF) untuk menjayakan inisiatif PerantiSiswa Keluarga Malaysia di bawah Belanjawan 2022.
- (vi) **Program FOOD@CAMPUS Keluarga Malaysia.** Sejumlah RM7 juta telah diperuntukkan pada tahun 2021 untuk program ini melalui pemberian baucar makanan percuma kepada 42,633 orang mahasiswa B40 bersasar di semua IPT. Inisiatif **FOOD@CAMPUS Keluarga Malaysia 2.0** yang telah dilancarkan pada 5 Julai yang lalu juga akan diteruskan dengan peruntukan sebanyak RM6.54 juta, termasuk sumbangan daripada Yayasan Kebajikan Siswa Keluarga Malaysia (YKS) sebanyak RM1juta bagi memastikan kelestarian inisiatif ini.

Tan Sri Yang di-Pertua,

Dalam konteks usaha Kementerian meningkatkan kebolehpasaran graduan pula, antara inisiatif yang telah dan sedang dilaksanakan termasuklah:

- (i) **GETHIRED@KPT pada tahun 2021.** Melalui program ini, KPT telah berjaya mendapatkan penempatan pekerjaan dan penajaan pendapatan kepada seramai 13,610 orang pelajar. Manakala

sehingga Jun 2022, seramai 15,311 lagi pelajar berjaya mendapat pekerjaan dan penjanaan pendapatan.

- (ii) **Program KPT-MEDAC:Siswapreneur** dengan kerjasama TEKUN NASIONAL yang merupakan program pembiayaan mikro khusus untuk pelajar IPT dengan peruntukan sebanyak RM5 juta.
- (iii) **Program-program latihan keusahawanan** di peringkat IPT dan Nasional menerusi Dana Keusahawanan. Sepanjang tahun 2016 hingga sekarang, program latihan ini telah membantu IPT melahirkan lebih 170 ribu usahawan pelajar yang menjalankan perniagaan semasa dalam tempoh pengajian dan daripada jumlah tersebut lebih 29,700 graduan meneruskan aktiviti perniagaan selepas menamatkan pengajian.
- (iv) **MoHE-Shopee: Siswa Mall** telah dilancarkan pada 25 November 2021 dan memanfaatkan seramai 5,000 graduan.
- (v) **PENJANA KPT-CAP dan PENJANA KPT-PACE** – Sehingga Jun 2022, seramai 31,100 orang pelajar telah mendapat manfaat.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK WIRA DR. MOHD HATTA BIN MD.
RAMLI [LUMUT]**

TARIKH : 04 OGOS 2022 (KHAMIS)

SOALAN

DATUK WIRA DR. MOHD HATTA BIN MD. RAMLI [LUMUT] minta **MENTERI KANAN PENDIDIKAN** menyatakan bila pembinaan Sekolah Menengah Sains Manjung yang diluluskan di bawah RMK-12 akan bermula.

JAWAPAN

Tuan Yang di-Pertua,

Untuk makluman Ahli Yang Berhormat, projek pembinaan Sekolah Menengah Sains Manjung, Perak telah diluluskan di bawah Rancangan Malaysia Ke-11 (RMK-11), *Rolling Plan* 1 (RP1) tahun 2016. Skop projek ini meliputi pembinaan 30 bilik darjah, asrama untuk 600 murid, 16 unit rumah guru mengikut piawai dan lain-lain kemudahan. Projek ini telah ditangguhkan selaras dengan saranan oleh agensi pusat supaya pelaksanaan projek ini dikaji semula.

Untuk makluman Ahli Yang Berhormat, pada masa ini terdapat tujuh buah sekolah berasrama penuh (SBP) sedia ada di negeri Perak yang masih boleh menampung keperluan murid cemerlang di negeri berkenaan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN SABRI BIN AZIT [JERAI]

TARIKH : 04 OGOS 2022 (KHAMIS)

SOALAN

TUAN SABRI BIN AZIT [JERAI] minta **MENTERI KANAN PENDIDIKAN** menyatakan mengapa subsidi untuk pengusaha kantin sekolah tidak dinaikkan sedangkan kos bahan mentah sudah naik berkali-kali sehingga merugikan pengusaha kantin sekolah seluruh negara.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) mengambil berat tentang keluhan dan kesusahan yang dihadapi oleh pengusaha kantin sekolah akibat pandemik Covid-19 dan juga kenaikan harga bahan mentah. Dalam hubungan ini, Bantuan Khas Pengusaha Kantin Sekolah Kementerian Pendidikan Malaysia Secara *one off* bawah pakej PEMULIH tahun 2021 sebanyak RM1,000 telah diberikan kepada setiap pengusaha kantin yang mempunyai Perjanjian Penyewaan dan Pengurusan Kantin Sekolah yang sah dan masih berkuat kuasa pada tarikh pembayaran bantuan tersebut.

Selain itu juga, KPM telah memberikan inisiatif pengecualian sewaan kantin sekolah KPM selama 28 bulan iaitu bermula 1 Mac 2020 sehingga 30 Jun 2022. KPM juga telah melanjutkan lagi pengecualian sewaan kantin selama enam bulan bermula 1 Julai 2022 sehingga 31 Disember 2022.

KPM percaya bantuan dan pengecualian ini mampu meringankan beban pengusaha kantin sekolah daripada masalah kewangan serta dapat membantu menstabilkan prestasi perniagaan mereka.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KE EMPAT BELAS**

PERTANYAAN : LISAN

**DARIPADA : TUAN SYED SADDIQ BIN SYED ABDUL
RAHMAN (MUAR)**

TARIKH : 4 OGOS 2022 (KHAMIS)

SOALAN

TUAN SYED SADDIQ BIN SYED ABDUL RAHMAN (MUAR) minta **MENTERI PERTANIAN DAN INDUSTRI MAKANAN** menyatakan sama ada Kerajaan akan memastikan nelayan di sekitar Muar yang terkesan dengan projek pelaksanaan tambak laut Maharani *Energy Gateway* (MEG) akan menerima pampasan yang sewajarnya. Apa jenis dan nilai pampasan yang diberikan kepada nelayan yang terkesan dengan projek MEG ini dan bila pampasan ini akan diberikan memandangkan projek ini sudah bermula dan dijangka siap seawal 2028.

JAWAPAN

Tuan Yang Di Pertua,

Untuk makluman Ahli Yang Berhormat, Kementerian Pertanian dan Industri Makanan (MAFI) dan Jabatan Perikanan Malaysia (DOF) sentiasa mencari alternatif untuk membantu nelayan-nelayan yang terkesan dengan pelaksanaan projek tambak laut. Seramai 1,201 orang nelayan dijangka akan terkesan sekiranya projek tambak laut ini dilaksanakan.

Buat masa ini, projek ini masih belum dimulakan dan kajian-kajian berkaitan sedang dilaksanakan. Syarikat Maharani Energy Gateway Sdn Bhd telah melantik perunding untuk menjalankan kajian Social Impact Assessment (SIA), Environmental Impact Assessment (EIA), Marine Risk Assessment (MRA), kajian hidraulik, kajian batimetri serta cadangan pampasan-pampasan kepada nelayan terkesan.

Maharani Energy Gateway (MEG) turut mencadangkan beberapa pendekatan mitigasi seperti berikut:

- a. mewujudkan peluang-peluang pekerjaan untuk penduduk tempatan;
- b. mewujudkan Tabung Khas Nelayan oleh Kerajaan Johor;
- c. bekalan makanan untuk pekerja projek mestilah dari sumber tempatan; dan
- d. mengutamakan pengambilan pekerja dalam kalangan warga tempatan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN LUKANISMAN BIN AWANG SAUNI
[SIBUTI]**

TARIKH : 04 OGOS 2022 (KHAMIS)

SOALAN

TUAN LUKANISMAN BIN AWANG SAUNI [SIBUTI] minta **MENTERI KANAN PENDIDIKAN** menyatakan apakah status fasa 3 projek gantian penuh sekolah daif bagi Parlimen Sibuti dan berapa jumlah sekolah yang tersenarai dalam fasa tersebut melalui peruntukan bayaran kontra Ringgit Malaysia Satu Bilion Kerajaan Sarawak kepada Kerajaan Persekutuan Malaysia.

JAWAPAN

Tuan Yang di-Pertua,

Kementerian Pendidikan Malaysia (KPM) komited dalam menyediakan infrastruktur pendidikan yang selamat dan kondusif untuk kegunaan murid dan warga sekolah di seluruh negara termasuk negeri Sarawak.

Untuk makluman Ahli Yang Berhormat, KPM telah diluluskan sebanyak 54 projek menaik taraf dan membangunkan semula bangunan daif di sekolah bawah peruntukan RM1billion (Fasa 3) di negeri Sarawak dengan peruntukan sebanyak RM300 juta. Sehingga 31 Julai 2022, kesemua projek adalah di peringkat prabina.

Khusus bagi Parlimen Sibuti, sebanyak tiga projek telah diluluskan untuk dibangunkan semula dan dinaik taraf dengan kos sebanyak RM11.3 juta. Sehingga 31 Julai 2022, kesemua projek adalah di peringkat prabina.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN AKMAL NASRULLAH BIN MOHD. NASIR
[JOHOR BAHRU]**

TARIKH : 3 OGOS 2022 (RABU)

SOALAN:

TUAN AKMAL NASRULLAH BIN MOHD. NASIR [JOHOR BAHRU] minta **MENTERI PENGAJIAN TINGGI** menyatakan langkah dan strategi yang diambil Kementerian selepas mengadakan beberapa sesi libat urus bersama mahasiswa dan kakitangan akademik dalam usaha menambah baik Akta Universiti dan Kolej Universiti (AUKU) 1971 termasuk cadangan memberikan kebebasan menguruskan kewangan kepada persatuan mahasiswa.

JAWAPAN

Tan Sri Yang Di-Pertua,

Kementerian sentiasa terbuka dalam memastikan AUKU kekal relevan dengan keperluan semasa. Secara berperingkat, beberapa sesi libat urus dengan pemegang taruh telah dijalankan. Antaranya libat urus bersama Majlis Perwakilan Pelajar Kebangsaan (MPPK) pada 14 September 2021 dan sesi libat urus susulan bersama MPPK dan Majlis Presiden Persatuan Akademik pada 28 hingga 30 Oktober 2021. Sesi-sesi ini diadakan bagi mendapatkan maklum balas, pandangan dan input terkini daripada wakil pelajar dan wakil kakitangan akademik berkenaan dengan semakan semula kandungan AUKU dan penambahbaikan akta tersebut.

Antara cadangan penambahbaikan yang dikemukakan termasuklah:

- (i) penambahan peruntukan khas definisi bagi pekerja/kakitangan universiti;
- (ii) cadangan untuk mengecualikan Akta 605 melalui pindaan AUKU;
- (iii) melihat semula komposisi keahlian Senat dan Lembaga Pengarah Universiti;
- (iv) memberikan kebenaran kepada persatuan pelajar untuk mengumpul dana;
- (v) memberikan kebebasan dalam menentukan aktiviti pelajar; dan
- (vi) menambah baik Kaedah Tatatertib Pelajar agar lebih relevan dengan keadaan semasa.

Sebahagian daripada isu yang dibangkitkan ini telah pun mempunyai mekanisme pelaksanaan sedia ada di peringkat Universiti Awam, manakala bakinya akan diperhalusi untuk pelaksanaannya.

Pada tahun ini, sesi libat urus diteruskan bersama Timbalan-timbalan Naib Canselor Hal Ehwal Pelajar (HEP), Bendahari dan Penasihat Undang-undang UA pada bulan Februari 2022 serta MPPK pada bulan Mac 2022. Susulan libat urus tersebut, satu pasukan *taskforce* khas telah dibentuk di peringkat Timbalan-timbalan Naib Canselor Hal Ehwal Pelajar (HEP) UA dengan kerjasama Bahagian Mahasiswa Holistik (BMH), JPT untuk melihat mekanisme pelaksanaan sedia ada di peringkat Universiti Awam, khususn dari aspek pengurusan aktiviti pelajar seperti kebenaran untuk mengumpul dana; pembukaan akaun bank bagi maksud pungutan wang aktiviti pelajar; pengwujudan kesatuan pelajar dan kebebasan untuk berpersatuan.

Selaras dengan itu juga, beberapa garis panduan sedang dibangunkan dalam usaha memperkasa dan menghak upaya pelajar UA namun dalam ruang lingkup AUKU, khususnya bagi maksud aktiviti berpersatuan. Antara garis panduan yang dibangunkan adalah:

- (i) Garis Panduan Pengurusan Peruntukan Kewangan Bagi Program Pelajar Di Dalam Negara Dan Luar Negara UA;
- (ii) Garis Panduan Penyertaan Mahasiswa Dalam Kegiatan Politik Di Dalam Dan Luar Kampus;
- (iii) Garis Panduan Pelaksanaan Program Pelajar UA; dan
- (iv) Garis Panduan Pengurusan Dana/Sumbangan Luar.

Garis panduan ini kini sedang dalam fasa pemurnian di peringkat Kementerian dan akan dibawa kepada pihak MPPK pada minggu kedua bulan Ogos bagi melihat kebolehlaksanaan sebelum ia diedarkan untuk pemakaian di setiap UA.

Pada masa yang sama, satu Jawatankuasa Kerja Penambahbaikan AUKU juga telah ditubuhkan pada 24 Jun 2022 dengan keahliannya terdiri daripada pakar perlembagaan, pakar pendidikan tinggi, wakil pengurusan tertinggi universiti awam, wakil persatuan akademik dan wakil pelajar. Jawatankuasa ini berperanan melihat peruntukan spesifik yang boleh dimansuh atau dipinda dalam memberdaya universiti ke arah kecemerlangan. Mesyuarat pertama jawatankuasa telah dijadualkan pada 2 Ogos 2022.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK SERI MOHD REDZUAN
BIN MD YUSOF
[ALOR GAJAH]**

TARIKH : 4 OGOS 2022 (KHAMIS)

SOALAN

DATUK SERI MOHD REDZUAN BIN MD YUSOF [ALOR GAJAH] minta **MENTERI PEMBANGUNAN USAHAWAN DAN KOPERASI** menyatakan usaha serta inisiatif yang dijalankan oleh pihak Kerajaan bagi memastikan usahawan Bumiputera mempertingkatkan ilmu pengetahuan bercorak teknikal untuk bersaing dengan lebih agresif di dalam industri.

JAWAPAN

Tuan Yang di-Pertua,

Kementerian Pembangunan Usahawan dan Koperasi (KUSKOP) sentiasa komited ke arah mempertingkatkan ilmu pengetahuan dan kemahiran kepada semua usahawan PMKS dengan informasi, teknik dan teknologi terkini dunia keusahawanan sejajar dengan perkembangan semasa. Selaras dengan aspirasi tersebut, KUSKOP telah membangunkan pelbagai jenis **program latihan dan pembangunan kapasiti yang bercorak teknikal bagi usahawan Bumiputera** yang dilaksanakan oleh KUSKOP dan Agensi berkaitan. Antara program tersebut adalah:

1. **Program Pembangunan Perniagaan Usahawan Mikro (BizME)** oleh SME Corp. bagi meningkatkan pengetahuan dalam kemahiran sedia ada dan mendapatkan kemahiran baru dalam menjalankan perniagaan. Program ini terbuka kepada usahawan Bumiputera untuk mendapatkan latihan asas, bantuan teknikal serta sokongan bagi mengembangkan perniagaan. Bagi tahun 2021 sehingga Jun 2022, sejumlah **7,312 peserta** telah mendapat manfaat melalui Program ini melibatkan **peruntukan berjumlah RM7.35 juta**.
2. **Program Bimbingan Bisnes Bumiputera (IBBC)** oleh INSKEN bertujuan membimbing usahawan dengan jurulatih industri untuk meningkatkan skala perniagaan melalui lawatan penanda aras, latihan teknikal perniagaan dan sesi bimbingan secara perseorangan. Bagi tahun 2022, seramai **82 peserta** telah mengikuti program ini yang dilaksanakan selama 4 bulan dengan **peruntukan berjumlah RM102,425.77**.
3. **Program Pembangunan Kapasiti dan Keupayaan Vendor (PPKV)** oleh KUSKOP menyediakan program sokongan seperti pensijilan, pemasaran dan penjenamaan, pembungkusan serta pembangunan produk untuk meningkatkan keupayaan dan kemampuan vendor dalam memenuhi keperluan industri. Program ini menyasarkan industri strategik dan berimpak tinggi seperti aeroangkasa, rel, peranti perubatan dan bioteknologi. Bagi tahun 2022 sebanyak **19 syarikat**

SOALAN NO : 43

dengan nilai pembiayaan berjumlah **RM1.9 juta** telah diluluskan.

4. **Skim Anjakan Usahawan (SAU)** oleh SME Bank menyediakan kemudahan pembiayaan dan pembinaan kapasiti perniagaan kepada PKS Bumiputera bagi tujuan pengembangan perniagaan ke peringkat yang lebih tinggi. Kemudahan pembiayaan disediakan oleh SME Bank manakala latihan diberikan oleh *Centre for Entrepreneur Development and Research Sdn Bhd* (CEDAR). Bagi tahun 2021 dan 2022 sebanyak **10 syarikat** dengan nilai pembiayaan berjumlah **RM27.93** juta telah diluluskan.
5. **Penempatan Latihan Kerjaya bagi Graduan TVET (GRACE) 1.0** oleh Protégé bertujuan memberi pendedahan berkaitan keusahawanan dan melahirkan usahawan dari kalangan graduan TVET dan lepasan Sijil Kemahiran. Program ini menempatkan graduan bersama syarikat anchor selama 8 bulan bagi memberikan pengalaman bekerja dan secara tidak langsung meningkatkan kebolehpasaran dan kemahiran keusahawanan graduan. Bagi tahun 2022 seramai **26 peserta** telah mengikuti program ini dengan perbelanjaan peruntukan berjumlah **RM127,909.53**.

Sekian, terima kasih

**PEMBERITAHUAN PERTANYAAN JAWAB LISAN
DEWAN RAKYAT, MESYUARAT KEDUA, PENGGAL YANG KELIMA
PARLIMEN KEEMPAT BELAS, TAHUN 2022**

PERTANYAAN : LISAN

**DARIPADA : YB PUAN NOR AZRINA BINTI SURIP
(MERBOK)**

TARIKH : 04 OGOS 2022 (KHAMIS)

SOALAN

PUAN NOR AZRINA BINTI SURIP (MERBOK) minta **MENTERI PEMBANGUNAN WANITA, KELUARGA DAN MASYARAKAT** menyatakan apakah skop dan status semasa implementasi projek *Alternatives To Detention* (ATD) dan berapa bilangan kanak-kanak yang telah dibebaskan daripada tahanan melalui projek rintis ini.

JAWAPAN

Tuan Yang di-Pertua,

Jemaah Menteri pada mesyuaratnya bertarikh 21 April 2021 telah meluluskan Memorandum Jemaah Menteri Bersama antara Kementerian Dalam Negeri (KDN) dan Kementerian Pembangunan Wanita, Keluarga dan Masyarakat (KPWKM) berkenaan pelaksanaan projek rintis *Alternatives to Detention* (ATD) dijalankan dengan kerjasama Yayasan Chow Kit (YCK) dan SUKA Society. Fasa pertama projek rintis ATD dilaksanakan di depot imigresen seluruh Semenanjung Malaysia bermula suku pertama tahun 2021 hingga suku kedua tahun 2022 selama tempoh 1 tahun. Perluasan skop pelaksanaan bagi Fasa 2 akan dipertimbangkan berdasarkan pencapaian fasa pertama projek rintis dan mengambil kira keputusan dasar Kerajaan sedia ada. Walau bagaimanapun, projek ini telah ditangguhkan akibat pandemik COVID-19 dan telah beroperasi semula pada 14 Februari 2022.

Projek rintis ATD yang dicadangkan untuk pelaksanaan di Malaysia merupakan satu penjagaan alternatif kepada penahanan kanak-kanak di depot imigresen. Kanak-kanak ini akan mendapat perlindungan dan perkhidmatan sokongan melalui pemeliharaan berasaskan keluarga bagi memenuhi keperluan asas seorang kanak-kanak seperti tempat perlindungan, khidmat sokongan seperti kaunseling, pendidikan dan kesihatan. Manakala pengurusan kes ATD akan dibuat oleh SUKA Society yang melibatkan proses mengenal pasti keluarga terdekat sekiranya ada, proses kerjasama dengan organisasi antarabangsa dan syor untuk resolusi kes berdasarkan keperluan kanak-kanak tersebut.

Projek rintis ini akan melibatkan **kanak-kanak terpisah dan tanpa penjaga** (*unaccompanied and separated*) dalam tahanan imigresen yang **berumur 0 hingga 18 tahun**. Kanak-kanak etnik Rohingya dan kanak-kanak yang mempunyai konflik dengan undang-undang selain daripada Akta Imigresen [Akta 155] adalah terkecuali daripada projek rintis buat masa ini.

SOALAN NO. 44

Seramai **5 orang kanak-kanak** pada satu-satu masa dan dipilih berdasarkan saringan kerentanan (*vulnerability*). Kanak-kanak akan ditempatkan dalam jagaan Orang Yang Layak dan Sesuai (OYLS) melalui perintah mahkamah di bawah Akta Kanak-Kanak 2001 [Akta 611] sebelum dihantar balik ke negara asal.

Bagi memastikan projek ini berjalan dengan lancar, satu *Standard Operating Procedure* (SOP) telah dibangunkan menerusi 3 siri bengkel yang telah diadakan iaitu Bengkel 1.0 pada 12 November 2021, Bengkel 2.0 pada 17 November 2021 dan Bengkel 3.0 pada 26 November 2021 bersama semua agensi pelaksana projek rintis ATD ini. SOP tersebut telah diluluskan di Mesyuarat Pre-Council yang telah diadakan pada 11 Januari 2022.

Pada masa kini, agensi pelaksana sedang dalam proses saringan berdasarkan SOP untuk memilih senarai pendek nama kanak-kanak sebelum saringan kerentanan ke atas kanak-kanak dijalankan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : DATO' SRI HAJAH ROHANI BINTI HAJI
ABDUL KARIM (BATANG LUPAR)**

TARIKH : 4 OGOS 2022 (KHAMIS)

SOALAN

DATO' SRI HAJAH ROHANI BINTI HAJI ABDUL KARIM (BATANG LUPAR) minta **MENTERI PERTANIAN DAN INDUSTRI MAKANAN** menyatakan adakah Kementerian merancang untuk menjadikan industri pertanian kembali sebagai industri utama negara bagi menjamin keselamatan makanan supaya Malaysia tidak berdepan dengan situasi kritikal kekurangan bekalan makanan asas.

JAWAPAN:

Tuan Yang di-Pertua,

Untuk makluman Ahli Yang Berhormat, Kerajaan sentiasa komited dalam memastikan sistem makanan negara terus mampan dan terjamin bagi memastikan rakyat tidak berhadapan dengan krisis kekurangan bekalan makanan. Dalam hal ini, Kementerian Pertanian dan Industri Makanan (MAFI) telah mengenal pasti beberapa intervensi yang bertujuan untuk memastikan bekalan makanan kekal terjamin.

Antara strategi jangka pendek dalam pelaksanaan adalah:

1. melaksanakan sekatan eksport ayam berkuat kuasa 1 Jun 2022 melibatkan bekalan ayam sebanyak 3.6 juta ekor sebulan;
2. mewujudkan stokpail ayam melibatkan 4536 tan metrik oleh Lembaga Pertubuhan Peladang untuk menstabilkan bekalan dan harga ayam di pasaran;
3. mewujudkan stokpail ikan melibatkan 1000 tan metrik oleh Lembaga Kemajuan Ikan Malaysia untuk menjamin kesinambungan bekalan ikan semasa musim tengkujuh dan perayaan;
4. mempermudah proses pembayaran tuntutan subsidi harga ayam dengan membenarkan bayaran pendahuluan tuntutan;
5. mudah cara prosedur import (IP) soya, gandum, jagung dan makanan ternakan berasaskan haiwan dan tumbuhan melalui penangguhan fi permit serta mewujudkan *priority lane* bagi proses kemasukan pantas makanan asas;
6. mempercepatkan proses permohonan lesen pengimportan di bawah Jabatan Perkhidmatan Veterinar (DVS) menerusi kelulusan secara interim bermula 1 Julai 2022 dengan proses kelulusan dalam tempoh masa tujuh (7) hari bekerja berbanding 30 hingga 90 hari;
7. mewujudkan insurans tanaman iaitu Skim Takaful Agromakanan yang akan dilancarkan pada suku ketiga 2022 dengan memanfaatkan seramai 189,500 pesawah padi;

8. memberi bantuan tunai tambahan sebanyak RM100 kepada isi rumah kategori B40 dan RM50 kepada golongan bujang;
9. melaksanakan moratorium penguatkuasaan bagi pengambilan pekerja asing dalam industri penternakan ayam supaya produktiviti di tahap optimum; dan
10. melaksanakan advokasi berteraskan kehilangan lepas tuai dan pembaziran makanan secara berterusan untuk mengoptimumkan sumber dalam sistem makanan.

Manakala intervensi langkah sederhana dan panjang merangkumi usaha untuk:

1. mengkaji mekanisme untuk mengurangkan kos minyak sawit mentah kepada syarikat pengilangan makanan ternakan sebagai inisiatif untuk mengurangkan kos makanan ternakan;
2. mempelbagaikan sumber import makanan dengan menambah bilangan loji di luar negara;
3. mewujudkan One Stop Quarantine Centre (OSQC) yang bertujuan untuk menambahbaik pemeriksaan biosekuriti negara melibatkan tujuh (7) perkhidmatan merentasi lapan (8) kementerian;
4. menggalakkan pertanian bandar melalui pemerkasaan Program Kebuniti Keluarga Malaysia; dan
5. memperkukuhkan industri input pertanian menerusi pembangunan aditif makanan ternakan dan penambahbaikan formulasi makanan ternakan.

MAFI yakin intervensi yang diambil ini mampu menjamin sekuriti makanan negara terutamanya dari aspek ketersediaan makanan dalam memastikan bekalan makanan kekal mencukupi kepada rakyat.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN SANISVARA NETHAJI RAYER A/L
RAAJI [JELUTONG]**

TARIKH : 04 OGOS 2022 (KHAMIS)

SOALAN

TUAN SANISVARA NETHAJI RAYER A/L RAAJI [JELUTONG] minta
MENTERI KANAN PENDIDIKAN menyatakan :-

- (a) apakah rancangan Kementerian untuk membantu 70,455 calon Sijil Pelajaran Malaysia yang tercicir supaya masa depan mereka terjamin dan berapa peratus daripada calon yang tercicir ini tergolong dari keluarga B40; dan
- (b) adakah ini menunjukkan bahawa pembelajaran secara talian atau 'online' telah gagal.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam memastikan pengurusan peperiksaan Sijil Pelajaran Malaysia (SPM) berjalan lancar dan teratur, termasuk aspek kehadiran calon berdaftar untuk menduduki peperiksaan.

Bagi SPM tahun 2021, seramai 10,681 calon berdaftar tidak hadir menduduki peperiksaan. Daripada jumlah tersebut, 9,037 orang atau 2.3 peratus adalah terdiri daripada calon sekolah KPM, calon sekolah agensi kerajaan, calon sekolah menengah agama negeri, calon sekolah swasta dan calon sekolah menengah agama rakyat manakala 1,644 orang atau 0.42 peratus lagi adalah calon persendirian.

Walau bagaimanapun, KPM telah mengambil pendekatan dari awal bagi memastikan calon SPM hadir untuk menduduki peperiksaan. Antara pendekatan yang telah diambil adalah seperti berikut:

- i. menyediakan perkhidmatan bimbingan dan sokongan psikososial melalui pelbagai kaedah seperti program motivasi, infografik pendidikan dan video inspirasi untuk meningkatkan motivasi murid untuk terus hadir ke sekolah. Sesi konsultasi antara Guru Bimbingan dan Kaunseling bersama-sama dengan guru mata pelajaran dan guru kelas dilaksanakan untuk mengenal pasti murid yang tidak mengikuti sesi pembelajaran. Intervensi berfokus dijalankan agar murid kembali ke sekolah dan berminat untuk mengikuti pembelajaran;
- ii. mengadakan perbincangan di antara pihak sekolah dengan ibu bapa/penjaga murid untuk mengenal pasti sebab dan langkah-langkah yang boleh diambil bagi menangani isu murid yang kurang berminat untuk belajar. Kerjasama ini penting untuk memastikan ibu bapa/penjaga murid dapat menyokong pembelajaran anak-anak semasa di rumah dan sekolah;

- iii. melaksanakan intervensi murid risiko cicir pengajaran dan pembelajaran di peringkat jabatan pendidikan negeri (JPN) dan pejabat pendidikan daerah (PPD). Intervensi ini melibatkan Sektor Pengurusan Pembelajaran, Sektor Pengurusan Sekolah dan Sektor Pembangunan Murid. Intervensi ini juga melibatkan *focal person*, pelibatan Ibu Bapa, Komuniti dan Swasta (PIBKS) pada peringkat daerah dan negeri melalui aktiviti *outreach*;
- iv. menyediakan Garis Panduan Mengurus Murid Berisiko Cicir di sekolah sebagai rujukan JPN, PPD dan sekolah dalam mengendalikan isu murid cicir dengan sistematik, terancang dan berkesan. KPM telah membangunkan *Dashboard* Murid Berisiko Cicir bagi mengenal pasti murid berisiko cicir; dan
- v. menyediakan Manual Pengurusan Pencegahan dan Intervensi Murid Cicir: Serlahkan Keunggulan Diri (SUDI 2.0). Manual ini digunakan sebagai panduan kepada pihak sekolah untuk merancang dan menyediakan intervensi yang bersesuaian supaya murid kekal bersekolah sehingga tamat Tingkatan 5.

Untuk makluman Ahli Yang Berhormat, di sebalik usaha-usaha yang dilaksanakan oleh KPM, masih terdapat calon sekolah yang tidak menduduki peperiksaan SPM atas pelbagai faktor. Ini termasuk isu seperti tidak berminat untuk meneruskan persekolahan kerana telah bekerja.

Tuan Yang Di-Pertua,

KPM ingin menegaskan bahawa pembelajaran secara dalam talian telah menjadi salah satu kaedah pembelajaran, terutama semasa pandemik COVID-19. KPM menyedari sesi persekolahan secara bersemuka untuk tahun 2020 dan tahun 2021 tidak dapat dilaksanakan seperti mana kebiasaan. Justeru, KPM telah mengambil langkah proaktif dengan melaksanakan pengajaran dan pembelajaran di rumah (PdPR) bagi memastikan tiada murid yang tercicir dalam pembelajaran sepanjang penutupan sekolah disebabkan oleh pandemik COVID-19. PdPR dilaksanakan melalui tiga pendekatan, iaitu secara dalam talian, luar talian dan *off-site* mengikut kesesuaian guru dan murid.

KPM telah membangunkan pelantar *Digital Educational Learning Initiative Malaysia* (DELIMa) yang digunakan sebagai pusat rujukan sehenti yang menawarkan aplikasi dan perkhidmatan *Google Classroom*, *Google Meet*, *Microsoft 365* dan *Apple Resources* serta bahan sokongan pembelajaran seperti buku teks digital, video pendidikan, kuiz dan permainan pendidikan bagi tujuan PdP untuk kegunaan calon, guru dan ibu bapa. Pelantar DELIMa membantu murid melaksanakan pembelajaran aktif secara sendiri melalui akses kepada kandungan pembelajaran dalam pelbagai format yang disediakan. Sepanjang tahun 2021, seramai 321,492 orang murid Tingkatan 5 telah mengakses bahan sokongan yang disediakan bagi membantu mereka meningkatkan pemahaman dan penguasaan dalam pembelajaran.

KPM juga telah memperkukuhkan Program Pemerkasaan Pelaksanaan Kurikulum melalui repositori SumberKU untuk kegunaan guru, murid dan ibu bapa. Platform ini mengandungi pelbagai bahan sokongan digital dari peringkat rendah hingga peringkat menengah yang boleh diakses melalui pelantar DELIMa. Repositori SumberKu merupakan *one stop centre* yang pastinya memudahkan guru, murid dan ibu bapa untuk mengakses pelbagai bentuk bahan pembelajaran secara digital. Bahan ini boleh diakses pada bila-bila masa dan di mana sahaja menggunakan peranti seperti komputer, tablet atau telefon pintar dengan kemudahan internet.

Repositori SumberKU dapat dimanfaatkan sepenuhnya oleh semua pihak bagi memastikan kelangsungan pembelajaran murid khususnya dalam membantu memperkukuhkan penguasaan murid terhadap kandungan kurikulum yang telah dipelajari.

KPM optimis terhadap pembelajaran secara dalam talian sebagai satu kaedah pembelajaran yang boleh dimanfaatkan secara berterusan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : PUAN JUNE LEOW HSIAD HUI
[HULU SELANGOR]**

TARIKH : 4 OGOS 2022 (KHAMIS)

SOALAN

Minta **MENTERI PENGAJIAN TINGGI** menyatakan apakah langkah Kementerian untuk membantu lebih 70 ribu lepasan SPM 2021 yang gagal mendapatkan sijil SPM dan adakah mereka dapat disalurkan ke bidang TVET bagi memenuhi keperluan pasaran buruh semasa.

JAWAPAN

Tan Sri Yang di-Pertua,

Kementerian Pengajian Tinggi (KPT) melalui Jabatan Politeknik dan Kolej Komuniti (JPPKK) komited untuk menyediakan akses yang meluas kepada program TVET yang berkualiti dan diiktiraf di samping memperkasa komuniti melalui Pembelajaran Sepanjang Hayat (PSH), serta melahirkan graduan yang bersifat holistik, berciri keusahawanan dan seimbang.

Dalam hubungan ini, pra-syarat kemasukan ke program pengajian dalam bidang TVET yang ditawarkan di politeknik dan kolej komuniti ialah calon lulus Sijil Pelajaran Malaysia (SPM). Walau bagaimanapun, lepasan SPM yang gagal, masih **berpeluang untuk menyertai kursus pendek atau program PSH** yang ditawarkan di politeknik dan kolej komuniti dalam

pelbagai bidang. Antaranya ialah katering dan sajian, komputer dan teknologi maklumat serta juga perniagaan keusahawanan. Program PSH seperti ini turut terbuka kepada orang awam termasuk pelajar lepasan sekolah, universiti, ibu tunggal, suri rumah dan persatuan-persatuan tertakluk kepada permintaan.

Selain itu, pelajar lepasan SPM turut berpeluang **menyambung pengajian dalam bidang TVET yang ditawarkan oleh agensi penyedia TVET yang lain tanpa memerlukan syarat kelulusan SPM**. Sehingga Jun 2022, lebih 1,000 penyedia TVET awam dan swasta ada menawarkan pelbagai program TVET.

Kementerian turut memperkasa akses pendidikan tinggi dengan menetapkan syarat kemasukan pelajar yang lebih fleksibel untuk menyambung pengajian ke peringkat lebih tinggi. Ini termasuklah memperkenalkan *Accreditation of Prior Experiential Learning* (APEL).

Dengan adanya perluasan syarat-syarat kemasukan ini, lebih ramai lepasan SPM yang gagal atau yang terus bekerja setelah tamat SPM berpeluang untuk menyambung pengajian dan seterusnya meningkatkan kemahiran.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN LOKE SIEW FOOK [SEREMBAN]
TARIKH : 04 OGOS 2022 (KHAMIS)

SOALAN

TUAN LOKE SIEW FOOK [SEREMBAN] minta **MENTERI KEWANGAN** menyatakan jumlah bilangan projek Kerajaan yang dilaksanakan secara rundingan terus serta nilai kontrak yang terbabit pada tahun 2021 dan tahun 2022 (sehingga Jun 30 2022) mengikut pecahan Kementerian dan sama ada Kementerian tidak lagi mengamalkan dasar perolehan secara tender terbuka.

JAWAPAN

Tuan Yang di-Pertua,

Pertimbangan pengecualian kaedah perolehan secara rundingan terus dibuat berdasarkan kriteria seperti melibatkan kesegeraan atas kepentingan awam, bagi maksud penyeragaman, satu punca bekalan/perkhidmatan (pembuat/pemegang francais), melibatkan keselamatan/strategik atau kontrak dengan syarikat pembuat Bumiputera sepertimana yang dinyatakan di bawah PP/PK 7.15: Garis Panduan Permohonan Perolehan Secara Rundingan Terus.

Namun, semua permohonan yang dikemukakan akan melalui satu proses penilaian dan penelitian yang menyeluruh daripada pelbagai aspek bagi memastikan kelulusan rundingan terus yang diberikan tetap melindungi kepentingan Kerajaan serta tidak menjejaskan kerancakan perkembangan ekonomi. Kerajaan juga melaksanakan *due diligence* yang sewajarnya bagi memastikan hanya projek yang benar-benar memenuhi kriteria tersebut boleh dipertimbangkan.

Kementerian Kewangan (MOF) mengambil maklum berhubung perkara yang dibangkitkan oleh YB Seremban berhubung pengecualian kaedah perolehan secara rundingan terus. Namun begitu, MOF masih lagi dalam proses mengkaji semula paparan senarai pengecualian kaedah perolehan secara rundingan terus di Portal MyProcurement untuk tatapan umum.

Secara dasarnya, setiap perolehan Kerajaan yang bernilai melebihi RM500,000 hendaklah dilaksanakan secara tender terbuka selaras peraturan perolehan Kerajaan di bawah Pekeliling Perbendaharaan (PP)/Perolehan Kerajaan (PK) 2.1: Kaedah Perolehan Kerajaan. Pelaksanaan perolehan Kerajaan secara tender terbuka adalah selari dengan amalan peringkat antarabangsa. Peraturan perolehan Kerajaan dikeluarkan oleh Kementerian Kewangan juga telah memastikan Kementerian/Agensi mempunyai garis panduan yang jelas dalam melaksanakan urusan perolehan termasuk peringkat pembuat keputusan bagi satu-satu perolehan berdasarkan prinsip pelaksanaan perolehan Kerajaan secara tidak berpusat (*decentralise*).

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN MUHAMMAD BAKHTIAR BIN WAN CHIK
[BALIK PULAU]**

TARIKH : 04 OGOS 2022 (KHAMIS)

SOALAN

TUAN MUHAMMAD BAKHTIAR BIN WAN CHIK [BALIK PULAU]
minta **MENTERI PELANCONGAN, SENI DAN BUDAYA** menyatakan :-

- (a) apakah dapatan kajian secara terperinci mengenai industri pelancongan yang terkesan sewaktu pandemik dan apakah kesalinghubungannya terhadap Pelan Pemulihan Pelancongan 2.0; dan
- (b) selain daripada fokus galakan terhadap pelancongan domestik, apakah perancangan Kementerian dalam usaha membantu pengusaha di dalam industri tersebut.

JAWAPAN

Tuan Yang di-Pertua,

1. Kementerian Pelancongan, Seni dan Budaya (MOTAC) telah merangka Pelan Pemulihan Pelancongan atau *Tourism Recovery Plan* (TRP) 1.0 semasa Perintah Kawalan Pergerakan (PKP) diumumkan bermula Mac 2020. Pelaksanaan TRP1.0 pada tahun 2020 dan 2021 ini tertumpu pada kelangsungan (*survivability*) dan pembukaan semula (*reopening*) industri pelancongan terutamanya dari segi bantuan dan usaha-usaha untuk membuka sempadan negara melalui pelaksanaan gelembung pelancongan.

2. Demi meneruskan momentum pemulihan, MOTAC telah menilai semula dan menambah baik TRP 1.0 dan melancarkan Rangka Kerja Pemulihan Pelancongan 2.0 atau TRF 2.0 pada 21 Jun 2022. TRF 2.0 menggariskan rangka kerja atau inisiatif jangka pendek dan sederhana MOTAC untuk memperkukuhkan pemulihan dan mengembalikan daya saing global industri pelancongan menerusi strategi-strategi yang boleh meningkatkan kemampanan dan daya tahan industri dalam menghadapi ketidaktentuan masa depan. Rangka kerja ini telah menggariskan lima (5) tonggak strategik iaitu:

- (i) Menyokong pemulihan perniagaan pelancongan dan kebudayaan;
- (ii) Memulihkan keyakinan pelancong dan perjalanan antarabangsa dan intra-rantau yang lancar;
- (iii) Mencipta semula produk/perkhidmatan pelancongan dan kebudayaan bagi memacu daya saing;
- (iv) Menyelaraskan pelancongan dengan kemampanan dan keterangkuman; dan
- (v) Memperkukuh pemulihan dengan ketahanan jangka panjang dan kesediaan menghadapi krisis.

SOALAN NO : 49

3. Selain itu, dalam usaha membantu dan memastikan kelangsungan dan kebangkitan pengusaha-pengusaha pelancongan, antara insentif dan inisiatif yang telah dan sedang dilaksanakan oleh MOTAC termasuklah:

- (i) menyokong pemulihan perniagaan pelancongan dan kebudayaan melalui bantuan fiskal dan bukan fiskal demi meringankan beban penggiat industri dan seterusnya membolehkan mereka beroperasi secara optimum. Antaranya:
 - (a) MOTAC telah menyalurkan sejumlah RM53.67juta bantuan kewangan kepada lebih 18,000 pengusaha pelancongan;
 - (b) menawarkan baucar untuk aktiviti berkaitan pelancongan kepada Keluarga Malaysia. Sehingga Jun 2022, sebanyak RM5.95juta nilai baucar telah ditebus bagi pembelian produk kraf, seni visual, dan buku. Manakala sebanyak RM4.43juta nilai baucar telah ditawarkan bagi pakej pelancongan, minat khas dan pengangkutan darat;
 - (c) telah menyalurkan RM3.73juta bagi lebih 520 permohonan yang telah diluluskan di bawah Geran Padanan Bagi Tujuan Pembaikan Hotel Bajet dan Inap Desa (Homestay) bagi membantu membaikpulih hotel bajet dan inap desa supaya kemudahan yang ditawarkan sentiasa berada di tahap yang berkualiti;
 - (d) meluluskan peruntukan sebanyak RM23.29juta bagi lebih 130 permohonan di bawah Geran Sepadan Sektor Pelancongan dan Kebudayaan bagi penganjuran program/acara/aktiviti berkaitan pelancongan, seni dan budaya; dan
 - (e) melanjutkan tempoh kelonggaran hal-hal berkaitan fi lesen, kompaun dan syarat lesen kepada agensi-agensi pelancongan dan pemandu-pemandu pelancong sehingga 31 Disember 2022.

SOALAN NO : 49

- (ii) menyediakan insentif pembiayaan seperti Skim Infrastruktur Pelancongan (SIP) dan Pembiayaan Pelancongan PENJANA serta insentif Galakan Cukai dan Pendaftaran Projek Pelancongan; dan
- (iii) meningkatkan kualiti perkhidmatan (*service quality*) menerusi:
 - (a) penyediaan kursus dan latihan yang menjadi pra-syarat kepada pengusaha-pengusaha pelancongan untuk mendapatkan lesen dengan MOTAC; dan
 - (b) pelaksanaan kursus-kursus peningkatan kemahiran (*upskilling*) dan pemahiran semula (*reskilling*) kepada pemain industri pelancongan seperti *Kursus City Guide*, *Kursus Regional Specific Tourist Guide (RSTG)*, *Kursus Travel and Tours Enhancement Course (TTEC)*, *Kursus Pemantapan dan Pengendalian Umrah (KPPU)*, *Kursus Mesra Malaysia* serta *Kursus Continuing Tourism Related Education (CTRE)*.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI AHMAD NAZLAN BIN IDRIS
[JERANTUT]**

TARIKH : 4 OGOS 2022 (KHAMIS)

SOALAN

Minta **MENTERI PENGAJIAN TINGGI** menyatakan perancangan Kementerian untuk memperhalusi senarai program dan kursus yang ditawarkan oleh kolej-kolej dan universiti swasta bagi memastikan tahap kebolehpasaran graduan yang lebih tinggi.

JAWAPAN

Tan Sri Yang di-Pertua,

Kementerian Pengajian Tinggi (KPT) sentiasa menggalakkan Institusi Pendidikan Tinggi Swasta (IPTS) untuk menjalinkan **kerjasama dengan pihak industri** bagi melahirkan graduan yang mempunyai kemahiran insaniah (*softskills*) dan kemahiran akademik (*academic skills*) dalam usaha meningkatkan tahap kebolehpasaran graduan IPTS.

Melalui kerjasama ini, pihak industri misalnya boleh menyediakan peluang kepada pelajar untuk menjalani **latihan industri** sebagai pendedahan awal sebelum pelajar bergraduat dan memasuki alam pekerjaan sebenar. Selain itu, pihak industri boleh memberikan ruang dan peluang kepada **kakitangan akademik IPTS meningkatkan pengetahuan berkaitan perkembangan teknologi semasa dan kompetensi dalam bidang yang diajar**. Perkara ini dapat membantu memperkasa kakitangan akademik, seterusnya dapat melahirkan graduan yang berpengetahuan dalam teknologi dan industri semasa. Pihak IPTS juga boleh mendapatkan pengalaman dan pendedahan terhadap teknologi terkini melalui **penglibatan individu dari industri yang dilantik sebagai penasihat industri** terutama bagi kursus-kursus kritikal yang memerlukan input terkini dan pengalaman industri.

KPT juga memberi pendedahan berkenaan **inisiatif *Experiential Learning and Competency Based Landscape (EXCEL)*** kepada IPT di Zon Timur dan Selatan ke arah mentransformasi program akademik dengan menggunakan elemen industri, komuniti, penyelidikan dan fleksibiliti (*personalised*) dalam menghasilkan graduan yang mempunyai atribut dan kemahiran dari pembelajaran berasaskan pengalaman dan pendidikan berasaskan kompetensi. Dalam hubungan ini, **IPTS diberi fleksibiliti membangunkan kurikulum baharu atau menambah baik kurikulum sedia ada**, selaras dengan peruntukan Akta 555 dan Peraturan-Peraturan di bawahnya.

Selain itu, KPT turut menubuhkan **Pasukan Petugas Kebangsaan Pemudahcara IPTS Sebagai Industri (PEMUDAH IPTS)** untuk

melaksanakan pelbagai inisiatif bagi memacu IPTS bergerak maju dan berdaya saing sebagai industri yang kompetitif di tahap global melalui program seperti *Structured Internship Apprenticeship Programmes* (SIAP) *For Integrated Circuit (IC) Design* dan juga *Webinar Guide To Entrepreneurship Integrated Education (EIE) for Higher Education Institutions* (HLIs).

Dari aspek jaminan kualiti, setiap program yang ditawarkan oleh IPTS perlu melalui **proses akreditasi yang merangkumi tiga (3) fasa penilaian** iaitu akreditasi sementara, akreditasi penuh dan audit pematuhan. Penilaian akreditasi mengkehendaki IPT untuk melaksanakan kajian pasaran (*need assessment*) bagi program yang ditawarkan dan memastikan pembangunan kurikulum program memenuhi keperluan bidang serta industri. MQA akan melaksanakan **semakan kualiti terhadap program di IPTS secara berkala antara tiga (3) hingga lima (5) tahun** bagi memastikan program yang ditawarkan sentiasa dikemas kini berdasarkan kepada perkembangan semasa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : PUAN MARIA CHIN BINTI ABDULLAH
[PETALING JAYA]
TARIKH : 04 OGOS 2022 (KHAMIS)

SOALAN

PUAN MARIA CHIN BINTI ABDULLAH [PETALING JAYA] minta **MENTERI KEWANGAN** menyatakan apakah sebab-sebab jumlah bajet ke atas sektor alam sekitar bagi tujuan operasi dan pembangunan makin menurun dari 0.76% (2018) ke 0.66% (2021) berdasarkan kajian ISIS (Bajet 2021) dan adakah Kerajaan mengikuti peralihan ekonomi hijau.

JAWAPAN

Tuan Yang di-Pertua,

Merujuk kepada laporan ISIS Malaysia yang diterbitkan pada 14 November 2020, ianya menunjukkan penurunan ketara peratusan perbelanjaan berkaitan alam sekitar daripada 0.76% pada tahun 2018 kepada 0.66% pada tahun 2021. Berdasarkan data Kerajaan, ianya tidak menunjukkan penurunan ketara sama ada dari segi peratusan perbelanjaan alam sekitar daripada jumlah perbelanjaan atau dari segi nilai perbelanjaan khusus untuk alam sekitar yang kekal sekitar RM1.7 bilion.

Dengan itu, dicadangkan supaya libaturnas diadakan di antara badan pemikir (think tank) dengan Kerajaan untuk menambahbaik mekanisme penandaan peruntukan berkaitan alam sekitar atau *climate budget tagging*. Pada masa yang sama, terdapat projek-projek bersaling hubungan atau *cross-cutting* yang mempunyai elemen alam sekitar tetapi

tidak dilaporkan sebagai sebahagian projek khusus berkaitan alam sekitar.

Selain daripada perbelanjaan dalam bentuk fiskal, Kerajaan juga memberi penekanan kepada kelestarian melalui:

- insentif cukai seperti yang dilaksanakan dalam Bajet 2022 untuk kereta elektrik (EV),
- pinjaman mudah seperti dana peralihan rendah karbon (*Low Carbon Transition Facility*) di bawah Bank Negara Malaysia, dan
- dasar-dasar lain untuk mengutamakan kemampanan termasuk dasar perolehan kerajaan.

Pada masa yang sama, Kerajaan juga sedang menyelaraskan pelaporan penandaan peruntukan dibuat selari dengan 17 matlamat di bawah *Sustainable Development Goals* atau SDGs yang digerakkan melalui penubuhan Majlis SDG Negara dipengerusikan YAB Perdana Menteri.

Dengan kerjasama *The United Nations Development Programme* atau UNDP, Rangka Kerja Pembiayaan Kebangsaan Bersepadu atau INFF telah dibentuk bagi mengenal pasti pembangunan lestari/mampan/hijau/rendah karbon, merangkumi platform pembaharuan dalam pelbagai aspek seperti dasar, peraturan, instrumen kewangan, institusi dan kerjasama awam swasta.

Tuan Yang di-Pertua,

Kerajaan turut mempelbagaikan sumber pembiayaan dan menambah baik mekanisme perolehan Kerajaan bagi menggalakkan pemerkasaan ekonomi hijau. Ini termasuk:

- a) Menerbitkan Sukuk Kelestarian berdaulat bernilai USD800 juta pada April 2021, dengan langganan melebihi 6.4 kali. Permintaan yang tinggi ini juga telah memberikan kadar hasil atau pulangan yang sangat kompetitif, serta mencerminkan keyakinan pelabur global ke atas prospek pertumbuhan ekonomi Malaysia. Bagi 2022, Kerajaan merancang untuk menerbitkan Sukuk Kelestarian

sehingga RM10 bilion untuk disalurkan kepada projek sosial atau mesra alam sekitar mengikut kesesuaian.

- b) Meningkatkan penggunaan kaedah Perolehan Hijau Kerajaan, atau GGP sejak 2013 bagi meningkatkan penggunaan produk dan perkhidmatan yang mesra alam sekitar. Pada tahun 2021, GGP telah dilaksanakan oleh 27 kementerian, dengan anggaran nilai berjumlah RM616.8 juta. Kerajaan akan terus meluaskan inisiatif ini serta menambah baik garis panduan untuk meningkatkan inisiatif hijau sektor awam.
- c) Menubuhkan Yayasan Matlamat Pembangunan Mampan Malaysia atau Yayasan MySDG yang akan bekerjasama dengan Pertubuhan Bangsa-bangsa Bersatu (PBB) di Malaysia dalam membangunkan sebuah Tabung Amanah. Tabung ini akan menjadi platform bagi menyelaraskan geran dan dana berkaitan dengan lebih baik untuk disalurkan kepada usaha-usaha mencapai aspirasi SDG negara yang disumbangkan oleh Kerajaan, sektor swasta, individu serta pihak-pihak dari dalam dan luar negara.
- d) Meluluskan inisiatif-inisiatif peralihan ekonomi hijau menerusi Program Strategik Memperkasa Rakyat dan Ekonomi atau PEMERKASA pada 17 Mac 2021, dengan anggaran kos berjumlah RM145 juta menggunakan dana Kumpulan Wang Amanah COVID-19 atau KWC-19). Antara program/projek yang terlibat adalah seperti Geran Pemangkin Bandar Rendah Karbon atau GeRAK dan Program Pembangunan Denai Sungai Kebangsaan (*National River Trails Program*) yang dipacu KASA. Selain itu, Pembiayaan Perniagaan Kelestarian dan Hijau atau *Sustainable and Green Biz Financing* - SGBF juga diluluskan kepada Kementerian Perdagangan Antarabangsa dan Industri (MITI) melalui MIDF Berhad untuk menggalakkan penggunaan teknologi mesra hijau dan jimat tenaga di kalangan pemain industri.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : DATUK SERI PANGLIMA HAJAH AZIZAH
BINTI DATUK SERI PANGLIMA HAJI
MOHD DUN (BEAUFORT)**

TARIKH : 4 OGOS 2022 (Khamis)

SOALAN

**DATUK SERI PANGLIMA HAJAH AZIZAH BINTI DATUK SERI
PANGLIMA HAJI MOHD DUN (BEAUFORT)** minta **MENTERI
PERTANIAN DAN INDUSTRI MAKANAN** menyatakan apakah langkah
proaktif yang telah diambil bagi memastikan keperluan bekalan makanan
asas dapat menampung permintaan dalam negara.

JAWAPAN:

Tuan Yang di-Pertua,

Untuk makluman Ahli Yang Berhormat, Kerajaan sentiasa komited dalam memastikan sistem makanan negara terus mampan dan terjamin agar rakyat tidak berhadapan dengan krisis kekurangan bekalan makanan. Dalam hal ini, Kementerian Pertanian dan Industri Makanan (MAFI) telah mengenal pasti beberapa intervensi yang bertujuan untuk menjamin sekuriti bekalan makanan.

Antara strategi jangka pendek dalam pelaksanaan adalah:

1. melaksanakan sekatan eksport ayam bulat berkuat kuasa 1 Jun 2022 melibatkan bekalan ayam sebanyak 3.6 juta ekor sebulan sehingga bekalan ayam kembali stabil.
2. mewujudkan stokpail ayam melibatkan 4,536 tan metrik oleh Lembaga Pertubuhan Peladang untuk menstabilkan bekalan dan harga ayam di pasaran;
3. mewujudkan stokpail ikan melibatkan 1,000 tan metrik oleh Lembaga Kemajuan Ikan Malaysia untuk menjamin kesinambungan bekalan ikan semasa musim tengkujuh dan perayaan;
4. memberi subsidi kepada pengeluar bagi membantu mengurangkan kos pengeluaran di ladang untuk meningkatkan kuantum pengeluaran;
5. memudah cara prosedur import (IP) soya, gandum, jagung dan makanan ternakan berasaskan haiwan dan tumbuhan melalui penangguhan fi permit serta mewujudkan *priority lane* bagi proses kemasukan pantas makanan asas;
6. mempercepat proses permohonan lesen pengimportan di bawah Jabatan Perkhidmatan Veterinar (DVS) menerusi kelulusan secara interim bermula 1 Julai 2022 dengan proses kelulusan dalam tempoh masa tujuh (7) hari bekerja berbanding 30 hingga 90 hari;
7. mewujudkan insurans tanaman iaitu Skim Takaful Agromakanan yang akan dilancarkan pada suku ketiga 2022 dengan memanfaatkan seramai 189,500 pesawah padi;

8. memberi bantuan tunai tambahan sebanyak RM100 kepada isi rumah kategori B40 dan RM50 kepada golongan bujang;
9. melaksanakan moratorium penguatkuasaan bagi pengambilan pekerja asing dalam industri agromakanan supaya produktiviti di tahap optimum; dan
10. melaksanakan advokasi berteraskan kehilangan lepas tuai dan pembaziran makanan secara berterusan untuk mengoptimumkan sumber dalam sistem makanan.

Manakala intervensi langkah sederhana dan panjang merangkumi usaha untuk:

1. mengkaji mekanisme untuk mengurangkan kos minyak sawit mentah kepada syarikat pengilangan makanan ternakan sebagai salah satu daripada inisiatif untuk mengurangkan kos makanan ternakan;
2. mempelbagaikan sumber import makanan dengan menambah bilangan loji di luar negara;
3. mewujudkan *One Stop Quarantine Centre* (OSQC) yang bertujuan untuk menambahbaik pemeriksaan biosekuriti negara melibatkan tujuh (7) perkhidmatan merentasi lapan (8) kementerian;
4. menggalakkan aktiviti pertanian bandar melalui pemerkasaan Program Kebuniti Keluarga Malaysia; dan
5. memperkukuhkan industri input pertanian menerusi pembangunan aditif makanan ternakan dan penambahbaikan formulasi makanan ternakan.

MAFI yakin intervensi yang diambil mampu menjamin sekuriti makanan negara terutamanya dari aspek ketersediaan makanan dalam memastikan bekalan makanan kekal mencukupi kepada rakyat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN SIM TZE TZIN [BAYAN BARU]
TARIKH : 04 OGOS 2022 (KHAMIS)

SOALAN

TUAN SIM TZE TZIN [BAYAN BARU] minta **MENTERI KEWANGAN** menyatakan apakah tindakan bank-bank komersial mengatasi *scam* transaksi kewangan tanpa kebenaran yang semakin menjadi-jadi. Apakah jumlah transaksi yang terlibat untuk tahun 2022 dan sama ada mangsa scam akan diberi ganti rugi oleh pihak bank.

JAWAPAN

Tuan Yang di-Pertua,

Untuk makluman Yang Berhormat, jenayah penipuan adalah satu kesalahan yang termaktub dalam Kanun Keseksaan dan siasatannya adalah dalam bidang kuasa pihak Polis Diraja Malaysia (PDRM). Sebarang insiden penipuan haruslah dilaporkan terus kepada pihak PDRM untuk siasatan lanjut. Menurut rekod PDRM, statistik kes jenayah atas talian bagi tahun 2021 hingga 30 Jun 2022 adalah seperti berikut:

TAHUN	JUMLAH
2021	20,701
2022 (sehingga 30 Jun 2022)	10,468

Isu kehilangan wang dalam akaun tanpa pengetahuan / kebenaran pelanggan adalah berpunca terutamanya daripada pelbagai kaedah pemerdayaan oleh sindiket penipuan kewangan untuk mendorong pelanggan institusi kewangan menyerahkan maklumat perbankan sama ada secara sedar atau tidak. Contohnya, tawaran servis pembersih rumah atau penghantaran makanan di mana sindiket penipuan kewangan mengarahkan mangsa memuat turun fail aplikasi APK (*Android Package Kit*) yang boleh membaca sistem pesanan ringkas (SMS) tanpa disedari mangsa, berserta skrin pembayaran atau pemindahan wang yang palsu. Ada masanya, sindiket-sindiket ini turut menyamar sebagai pihak berkuasa atau bank bagi memancing maklumat perbankan dari mangsa-mangsa. Justeru, pihak Bank Negara Malaysia (BNM) dan industri perbankan sentiasa mengingatkan orang ramai supaya berhati-hati dan melindungi maklumat perbankan daripada dikongsi dengan pihak yang tidak bertanggungjawab.

Orang ramai dinasihatkan agar mengambil tindakan berhati-hati bagi mengelakkan daripada terpedaya dan menjadi mangsa penipuan. Antara tindakan yang boleh dipraktikkan adalah:

- Jangan sesekali panik dan mengikut arahan yang diberikan oleh pemanggil termasuk pemindahan wang kepada orang yang tidak

dikenali, tanpa terlebih dahulu menghubungi pihak polis atau institusi kewangan terbabit;

- Jangan hubungi semula nombor telefon yang diterima, sebaliknya dapatkan nombor telefon rasmi syarikat, organisasi atau institusi terbabit melalui laman sesawang rasmi untuk pengesahan lanjut;
- Jangan dedahkan atau kongsi butiran ID pengguna dan kata laluan akaun perbankan atas talian, nombor dan PIN kad ATM atau kad kredit anda kepada orang yang tidak dikenali;
- Jangan memuat turun aplikasi pihak ketiga menggunakan fail APK diberikan oleh orang yang tidak dikenali kerana aplikasi terbabit boleh mengakses maklumat peribadi dalam telefon mangsa; dan
- Sentiasa berwaspada dan tidak mudah terpedaya dengan muslihat atau tipu helah pihak-pihak tertentu.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : DATUK HAJI SHABUDIN BIN YAHAYA
(TASEK GELUGOR)**

TARIKH : 4 OGOS 2022 (KHAMIS)

SOALAN

DATUK HAJI SHABUDIN BIN YAHAYA (TASEK GELUGOR) minta **MENTERI PERTANIAN DAN INDUSTRI MAKANAN** menyatakan sejauh mana kejayaan Dasar Sekuriti Makanan Negara bagi mengurangkan kebergantungan makanan import (makanan ternakan) serta meningkatkan hasil pengeluaran tanaman dalam negara.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan mengambil perhatian yang serius terhadap isu kebergantungan terhadap import makanan yang semakin meningkat setiap tahun. Ini jelas apabila beberapa sumber import makanan menjadi penyumbang utama kepada kecukupan bekalan makanan negara dalam menampung permintaan tempatan.

Pada tahun 2021, import makanan mencatat nilai RM63.6 bilion berbanding RM55.4 bilion pada tahun 2020 bagi memastikan bekalan makanan domestik kekal terjamin. Antara bahan makanan yang menyumbang kepada nilai import yang tinggi termasuk bijirin dan sediaan bijirin; kopi, koko, teh, rempah dan keluaran; keluaran dan sediaan makanan lain; daging; hasil tenusu; sayur-sayuran serta buah-buahan. Selain itu, makanan ternakan turut menyumbang kepada nilai import yang tinggi iaitu RM7.76 bilion pada tahun 2021 berbanding RM6.64 bilion tahun sebelumnya.

Dalam hal ini, Kementerian Pertanian dan Industri Makanan (MAFI) telah mengenal pasti beberapa intervensi yang bertujuan untuk mengurangkan kebergantungan makanan import khususnya makanan ternakan dengan:-

1. mengkaji mekanisme untuk mengurangkan kos minyak sawit mentah kepada syarikat pengilangan makanan ternakan sebagai salah satu daripada inisiatif untuk mengurangkan kos makanan ternakan selain penetapan 10% daripada *Palm Kernel Cake* (PKC) atau *Palm Kernel Expeller* (PKE) untuk kegunaan dalam negara; dan
2. memperkukuhkan industri input pertanian menerusi penggantian sumber protein yang diimport, pembangunan aditif makanan ternakan dan penambahbaikan formulasi makanan ternakan.

Dalam pada itu, MAFI juga telah membangunkan Program Pembangunan Jagung Bijian Negara melalui Pelan Pembangunan

Industri Jagung Bijian bagi tempoh lima belas (15) Tahun bermula tahun 2017-2032 dengan matlamat mengurangkan 30% import jagung bijian negara. Strategi jangka sederhana MAFI bagi penanaman jagung bijian adalah seperti berikut:

1. menjalinkan kerjasama dengan syarikat swasta, GLC, koperasi dan sebagainya yang berminat melabur dalam pembangunan industri jagung bijian; dan
2. mewujudkan ladang kontrak dengan usahawan-usahawan jagung bijian dan syarikat-syarikat pemprosesan jagung bijian.

Kerajaan turut menggalakkan hasil tanaman di dalam negara, dengan MAFI melalui Jabatan dan Agensi telah mengemukakan pelbagai program dan projek di bawah Rancangan Malaysia ke 12 kepada Unit Perancang Ekonomi (EPU), Jabatan Perdana Menteri. Bagi tahun 2021-2025, Jabatan Pertanian telah diluluskan 10 projek pembangunan pertanian melibatkan peruntukan sebanyak RM41.5 juta. Projek ini melibatkan agihan pelbagai insentif dan bantuan dalam bentuk *in-kind* seperti input pertanian (benih, baja dan racun), peralatan kecil pertanian, penyediaan kawasan, penyediaan sistem pengairan dan geran padanan bagi menggalakkan pengeluaran hasil tanaman oleh petani.

MAFI yakin intervensi yang diambil mampu menjamin sekuriti makanan negara khususnya dalam mengurangkan kebergantungan makanan import khususnya makanan ternakan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : TUAN KHOO POAY TIONG (KOTA
MELAKA)**

TARIKH : 4 OGOS 2022 (KHAMIS)

SOALAN

TUAN KHOO POAY TIONG (KOTA MELAKA) minta **MENTERI
PERTANIAN DAN INDUSTRI MAKANAN** menyatakan :-

- (a) jumlah permohonan diterima dan jumlah pembayaran dibuat untuk subsidi penternak ayam untuk bulan Mac, April, Mei dan Jun 2022 (secara berasingan); dan
- (b) apakah sebab dan rasional Kerajaan menghentikan skim subsidi ini.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan telah meluluskan pemberian subsidi ayam dan telur bermula dari 5 Februari 2022 sehingga 30 Jun 2022 dengan peruntukan sebanyak RM730 juta. Pada 29 Jun 2022, Kerajaan bersetuju untuk melanjutkan tempoh pemberian subsidi yang berakhir pada 30 Jun 2022 sehingga 31 Ogos 2022. Jumlah peruntukan tambahan disediakan sebanyak RM369.5 juta dan menjadikan jumlah keseluruhan subsidi untuk penternak ayam sebanyak RM1.1 bilion.

Kadar pemberian subsidi untuk ayam pedaging ialah RM0.60 per kilogram untuk tempoh 5 Februari 2022 hingga 30 Mac 2022. Seterusnya Kerajaan bersetuju untuk meningkatkan kadar subsidi kepada RM1.40 per kilogram bermula 1 April sehingga 30 Jun 2022. Manakala bagi penternak ayam telur pula, kadar pemberian subsidi ialah RM0.05 sebiji bermula 5 Februari hingga 30 Jun 2022 bagi telur gred A, B dan C. Bermula 1 Julai 2022, harga subsidi yang diluluskan ialah RM1.20 per kilogram bagi ayam pedaging dan RM0.03 sebiji bagi telur gred A, B, dan C.

Kementerian Pertanian dan Industri Makanan (MAFI) melalui Jabatan Perkhidmatan Veterinar (DVS) telah memproses permohonan subsidi sejak 28 Februari 2022. Setakat 29 Julai 2022, sebanyak 8,970 permohonan subsidi telah diluluskan berjumlah RM748 juta.

Bagi mendapatkan subsidi ini, Jabatan Perkhidmatan Veterinar (DVS) telah menyediakan tatacara permohonan seperti mekanisme berikut:

- (i) penternak ayam pedaging dan penelur perlu mengemukakan permohonan secara online kepada Jabatan Perkhidmatan Veterinar (DVS) melalui laman sesawang www.unggasdvs.my;
- (ii) semakan dan verifikasi ke atas permohonan tersebut akan dibuat di peringkat DVS Negeri, manakala kelulusan

permohonan akan ditentukan di peringkat ibupejabat menerusi Jawatankuasa Kelulusan Subsidi Ayam dan Telur; dan

- (iii) bagi permohonan yang diluluskan, pembayaran subsidi akan dilaksanakan oleh Agrobank sebagai bank pembayar kepada akaun pemohon dalam tempoh tiga (3) hari bekerja.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' MOHD. NIZAR BIN HAJI ZAKARIA
[PARIT]**

TARIKH : 04 OGOS 2022 (KHAMIS)

SOALAN

DATO' MOHD. NIZAR BIN HAJI ZAKARIA [PARIT] minta **MENTERI KANAN PENDIDIKAN** menyatakan :-

- (a) sejauh manakah Kementerian telah melaksanakan kajian untuk mengenal pasti punca utama para guru membuat pilihan untuk bersara awal; dan
- (b) adakah pendekatan yang akan dilaksanakan oleh Kementerian bagi menangani perkara ini.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa memantau keperluan dan pengisian jawatan Pegawai Perkhidmatan Pendidikan (PPP) di sekolah bawah KPM. Berdasarkan rekod KPM, jumlah guru yang bersara awal pada tahun 2021 adalah seramai 4,389 orang. Ini merupakan 1.06 peratus daripada jumlah keseluruhan pengisian guru pada 1 Januari 2021. Untuk makluman Ahli Yang Berhormat, purata peratusan guru yang bersara pilihan untuk tahun 2017 hingga 2021 adalah 0.99 peratus daripada jumlah keseluruhan pengisian guru pada 1 Januari tahun-tahun tersebut.

Dalam konteks pembangunan kerjaya, KPM menyediakan peluang pembangunan profesionalisme kepada guru bagi memastikan guru sentiasa bersedia serta bermotivasi dalam menjalankan tugas dan berusaha meningkatkan kualiti perkhidmatan masing-masing. Ini termasuk memberi pendedahan tentang deskripsi tugas guru akademik di sekolah serta latihan dan bimbingan yang berterusan kepada guru dalam mendukung pelaksanaan dasar pendidikan semasa, termasuk melengkapkan guru dengan kemahiran dalam aspek pendigitalan pendidikan bagi mendepani sistem pendidikan abad ke-21.

Di samping itu, KPM juga menyediakan latihan dalam meningkatkan kesejahteraan psikologi untuk memberikan kemahiran pengurusan emosi, kawalan diri dan amalan harian yang positif berdasarkan tahap kesejahteraan psikologi yang dinilai melalui Inventori Kesejahteraan Psikologi (IKPsi).

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS, TAHUN 2022**

PERTANYAAN : LISAN

**DARIPADA : PUAN JUNE LEOW HSIAD HUI
(HULU SELANGOR)**

TARIKH : 4 OGOS 2022 (KHAMIS)

SOALAN

PUAN JUNE LEOW HSIAD HUI YB (HULU SELANGOR) minta **MENTERI PEMBANGUNAN WANITA, KELUARGA DAN MASYARAKAT** menyatakan berapa jumlah permohonan yang telah diterima, diluluskan dan ditolak bagi Bantuan Khas Ibu Tunggal dan mengapa inisiatif ini tidak diteruskan.

JAWAPAN

Tuan Yang di-Pertua,

Kementerian Pembangunan Wanita Keluarga dan Masyarakat (KPWKM) pada 5 Jun 2020 telah menerima peruntukan Bantuan Khas Ibu Tunggal di bawah inisiatif Pelan Jana Semula Ekonomi Negara (PENJANA). Bantuan ini bertujuan untuk membantu rakyat yang memerlukan bantuan, terutamanya semasa pandemik COVID-19.

Bantuan Khas Ibu Tunggal diberikan secara *one-off* sebanyak RM300 kepada 150,000 ibu tunggal yang layak. Jumlah permohonan yang telah diterima, diluluskan dan ditolak bagi bantuan ini adalah seperti berikut:

- i. Jumlah permohonan diterima : 270,937
- ii. Jumlah permohonan diluluskan : 150,000
- iii. Jumlah permohonan ditolak : 120,937

Memandangkan peruntukan ini adalah bersifat *one-off*, bantuan ini tidak diteruskan pada tahun-tahun berikutnya. Namun begitu atas dasar keprihatinan Kerajaan terhadap keluarga Malaysia terutamanya ibu tunggal, Kerajaan telah menyediakan pelbagai inisiatif lain seperti bantuan asas modal perniagaan di bawah Program MyKasih Kapital sebanyak RM500, Bantuan Kanak-Kanak kepada keluarga atau penjaga yang memberi jagaan kepada kanak-kanak berjumlah antara RM150 – RM1,000 sebulan, bantuan RM500 sebulan untuk warga emas, Elaun Pekerja Orang Kurang Upaya pada kadar RM450 sebulan, Bantuan Keluarga Malaysia dengan jumlah bantuan sehingga maksimum RM2,500 bagi ibu tunggal yang mempunyai tiga (3) anak atau lebih dan banyak lagi. Rakyat yang terkesan, termasuklah ibu tunggal boleh mengemukakan permohonan bagi mendapatkan bantuan-bantuan berkenaan berdasarkan kelayakan dan syarat-syarat yang telah ditetapkan bagi membantu meringankan kos sara hidup.

Sekian, terima kasih.

**PEMBERITAHUAN PERTANYAAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : TUAN WONG LING BIU [SARIKEI]

TARIKH : 4 OGOS 2022 (KHAMIS)

SOALAN

Tuan Wong Ling Bui [Sarikei] minta **MENTERI KOMUNIKASI DAN MULTIMEDIA** menyatakan apakah yang telah dilakukan dalam memperbaiki sistem telekomunikasi di kawasan Sarikei dan Bintangor setakat ini.

JAWAPAN

Tuan Yang di-Pertua,

Akses kepada internet merupakan perkara yang paling utama dalam perhatian pihak Kerajaan. Segala inisiatif yang dirancang dan dilaksanakan adalah bertujuan untuk menambah baik perkhidmatan komunikasi demi kehidupan rakyat di seluruh negara dari aspek sosio-ekonomi, pendidikan dan gaya hidup digital. Kementerian Komunikasi dan Multimedia (K-KOMM) sedang melipatgandakan usaha dan memberikan tumpuan kepada penambahbaikan perkhidmatan komunikasi tersebut.

Bagi menangani isu akses kepada internet berkualiti di kawasan luar bandar dan pedalaman di Sarawak dan Daerah Sarikei dan Bintagor, perkembangan Pelan Jalinan Digital Negara (JENDELA) Fasa 1, setakat suku pertama 2022 adalah seperti berikut:

Inisiatif	Tapak Menara Baharu		Naik Taraf Stesen Pemancar		Ketersediaan Sambungan Gentian Optik (Premis)		Jalur Lebar Satelit	
	Siap	Dalam Pelaksanaan	Siap	Dalam Pelaksanaan	Siap	Dalam Pelaksanaan	Siap	Dalam Pelaksanaan
Sarawak	85	741	2,933	247	78,262	29,914	523	0
Sarikei	1	22	73	9	3,409	1,364	4	0
Bintagor	0	19	47	5	1,065	0	0	0

Peratusan liputan 4G di kawasan berpenduduk di Sarawak telah meningkat kepada 84.24% pada suku pertama 2022 berbanding 73.67% sebelum pelaksanaan Pelan Jalinan Digital Negara (JENDELA). Manakala di Parlimen Sarikei pula, peratusan liputan 4G telah meningkat kepada 92.93% berbanding 84.37% sebelum pelaksanaan JENDELA.

Pelaksanaan JENDELA akan terus digiatkan bagi memastikan impak pelaksanaannya dapat diterima dengan cepat oleh rakyat. Ini termasuklah mengkaji semula secara berkala sasaran-sasaran awal yang telah ditetapkan sebelum ini seperti bilangan menara baharu yang akan dibina, stesen pemancar yang dinaik taraf serta premis-premis yang mendapat akses gentian optik bagi memastikan keperluan rakyat

sentiasa diutamakan.

Bagi membolehkan ketersediaan dan kebolehcapaian liputan rangkaian sistem telekomunikasi di Malaysia berada pada tahap memberansangkan selain daripada pembinaan menara-menara telekomunikasi dan satelit, Kerajaan juga turut melaksanakan penyediaan infrastruktur jalur lebar menggunakan kaedah *Point of Presence* (PoP) hab gentian optik yang merupakan salah satu alternatif dalam memastikan jaringan dan liputan infrastruktur jalur lebar dapat diperluaskan ke kawasan sekitar sekolah dan berpenduduk dengan lebih baik.

Pelaksanaan ini akan menjadikan lokasi berhampiran sekolah luar bandar sebagai hub untuk menyediakan infrastruktur jalur lebar gentian optik untuk kegunaan sekolah, kawasan perindustrian, premis-premis kerajaan berhampiran dan masyarakat sekelilingnya. Secara keseluruhannya, Fasa 1 bagi projek PoP ini akan melibatkan 630 lokasi berhampiran sekolah dan Fasa 2 pula akan melibatkan 3693 lokasi berhampiran sekolah di kawasan luar bandar di seluruh negara. Manakala jumlah PoP secara keseluruhan di Sarawak adalah sebanyak 741 dan daripada jumlah tersebut pula sebanyak 6 kawasan berhampiran sekolah luar bandar di Parlimen Sarikei akan terlibat dengan pelaksanaan PoP Fasa 1 manakala bagi Fasa 2 pula sebanyak 14.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : DATO' SYED ABU HUSSIN BIN HAFIZ SYED
ABDUL FASAL (BUKIT GANTANG)**

TARIKH : 4 OGOS 2022 (KHAMIS)

SOALAN

DATO' SYED ABU HUSSIN BIN HAFIZ SYED ABDUL FASAL (BUKIT GANTANG) minta **MENTERI PERTANIAN DAN INDUSTRI MAKANAN** menyatakan apakah hukuman paling berat yang boleh dikenakan kepada pengusaha ternakan ayam secara ladang dan pengusaha ternakan udang kolam yang membuang sisa najis ternakan ke dalam sungai dan laut hingga tercemar dan menjejaskan mata pencarian para nelayan. Tarikh 29 Januari 2022, kes yang sama masih berulang membangkitkan rasa marah nelayan dan penduduk di Sungai Limau, Trong, sungai yang jernih bertukar menjadi hijau kesan pembuangan sisa najis dan air kumbahan ternakan udang kolam.

JAWAPAN

Tuan Yang di-Pertua,

Untuk makluman Ahli Yang Berhormat, Dasar Agromakanan Negara (DAN 2.0) dibangunkan berdasarkan 5 teras dasar dan salah satunya ialah meningkatkan amalan pertanian dan sistem makanan yang mampan. Oleh itu Kementerian Pertanian dan Industri Makanan (MAFI) sentiasa memandang serius sebarang isu pencemaran alam sekitar yang berpunca daripada industri penternakan.

Bagi penternakan ayam di negeri Perak, penternak yang didapati bersalah mencemarkan alam sekitar boleh dikenakan tindakan

tegas di bawah Enakmen Perladangan Unggas 2005 Negeri Perak seperti berikut:

- (i) denda maksima sebanyak RM10,000 atau penjara 1 tahun atau kedua-duanya; atau
- (ii) pembatalan lesen beroperasi boleh dikeluarkan kepada ladang tersebut jika masih mengulangi kesalahan; atau
- (iii) penutupan ladang unggas.

Bagi sektor akuakultur, bermula 28 Februari 2017, Kaedah-kaedah Perikanan (Akuakultur Perikanan Darat) (Wilayah Persekutuan Kuala Lumpur dan Wilayah Persekutuan Labuan) telah diwartakan. Di dalam kaedah ini telah termaktub klausa berkaitan pelepasan efluen terawat kaedah 27(1) di mana pemegang lesen yang melanggar kaedah 27(1) adalah melakukan suatu kesalahan dan boleh dikenakan tindakan penggantungan, pembatalan dan penyerahan balik lesen yang dikeluarkan. Pada masa kini, negeri-negeri yang telah menerima pakai kaedah ini mengikut kesesuaian adalah Johor, Melaka dan Terengganu. Manakala negeri-negeri lain masih di dalam tindakan memuktamadkan kaedah tersebut.

Kementerian melalui agensi di peringkat Persekutuan dan Negeri dari semasa ke semasa memberi bimbingan dan khidmat nasihat kepada penternak-penternak ayam tentang keperluan amalan penternakan yang baik (GAHP) demi mencapai kelestarian persekitaran yang sihat di samping produktiviti ternakan yang optimum.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DR. ONG KIAN MING
[BANGI]**

TARIKH : 4 OGOS 2022 (KHAMIS)

SOALAN

Minta **MENTERI PENGAJIAN TINGGI** menyatakan bilangan pemohon yang berjaya untuk program Skim Latihan Akademik Bumiputera (SLAB) dan program Skim Latihan Akademik IPTA (SLAI) di setiap universiti penyelidikan awam di Malaysia bagi tahun 2020 dan 2021.

JAWAPAN

Tan Sri Yang di-Pertua,

Dalam usaha meningkatkan mutu pendidikan di Universiti Awam (UA) melalui pewujudan tenaga akademik yang berpendidikan tinggi, Kerajaan menerusi Kementerian Pengajian Tinggi (KPT) secara konsisten melaksanakan **program-program penajaan seperti Skim Latihan Akademik Bumiputera (SLAB) dan Skim Latihan Akademik IPTA (SLAI) yang membolehkan para pensyarah yang sedang berkhidmat di UA melanjutkan pelajaran di peringkat Ijazah Kedoktoran, pasca-kedoktoran dan program lain yang setaraf.**

Di bawah program **SLAB**, KPT telah menaja seramai **445 orang** pensyarah UA pada tahun 2020 dan 2021 dengan pecahan mengikut tahun adalah seramai 242 pensyarah pada tahun 2020 (*Research University*, RU: 59, Bukan RU: 183); dan 203 pensyarah pada tahun 2021 (RU: 32, Bukan RU: 171).

Manakala bagi program **SLAI**, jumlah pensyarah yang telah menerima penajaan pada tahun 2020 dan 2021 adalah seramai **147 orang** dengan pecahan mengikut tahun seramai 59 orang pensyarah pada tahun 2020 (RU: 14, Bukan RU: 45) dan 88 pensyarah pada tahun 2021 (RU: 28, Bukan RU: 119).

Pelaksanaan program-program penajaan ini adalah antara usaha KPT mencapai objektif penambahan keperluan tenaga pengajar serta menyokong pelaksanaan rancangan latihan oleh UA. Di samping itu, program-program latihan ini juga menjadi strategi untuk memperkasakan pengajian tinggi negara bagi menjadikan Malaysia sebagai pusat pengajian tinggi serantau.

Sekian, terima kasih.

**Petunjuk: RU – Universiti Penyelidikan
NRU – Universiti Bukan Penyelidikan**

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

DARIPADA : TUAN LARRY SOON @ LARRY SNG WEI SHIEN [JULAU]

TARIKH : 4 OGOS 2022 (ISNIN)

SOALAN

TUAN LARRY SOON @ LARRY SNG WEI SHIEN [JULAU] minta **MENTERI PERTANIAN DAN INDUSTRI MAKANAN** menyatakan strategi Kementerian dalam memastikan ekosistem sekuriti makanan negara terus mampan dan terjamin dalam memastikan rakyat tidak berhadapan ancaman krisis kekurangan bekalan makanan ekoran berlakunya hentian eksport bahan mentah oleh beberapa negara pengeluar utama.

JAWAPAN:

Tuan Yang Di Pertua,

Untuk makluman Ahli Yang Berhormat, Kerajaan sentiasa komited dalam memastikan sistem makanan negara terus mampan dan terjamin bagi memastikan rakyat tidak berhadapan dengan krisis kekurangan bekalan makanan. Dalam hal ini, Kementerian Pertanian dan Industri Makanan (MAFI) telah mengenal pasti beberapa intervensi yang bertujuan untuk memastikan bekalan makanan kekal terjamin.

Antara strategi jangka pendek dalam pelaksanaan adalah:

1. melaksanakan sekatan eksport ayam bulat berkuat kuasa 1 Jun 2022 melibatkan bekalan ayam sebanyak 3.6 juta ekor sebulan sehingga bekalan ayam kembali stabil;
2. mewujudkan stokpail ayam melibatkan 4,536 tan metrik oleh Lembaga Pertubuhan Peladang untuk menstabilkan bekalan dan harga ayam di pasaran;
3. mewujudkan stokpail ikan melibatkan 1,000 tan metrik oleh Lembaga Kemajuan Ikan Malaysia untuk menjamin kesinambungan bekalan ikan semasa musim tengkujuh dan perayaan;
4. memberi subsidi kepada pengeluar bagi membantu mengurangkan kos pengeluaran di ladang untuk meningkatkan kuantum pengeluaran;
5. memudah cara prosedur import (IP) soya, gandum, jagung dan makanan ternakan berasaskan haiwan dan tumbuhan melalui penangguhan fi permit serta mewujudkan *priority lane* bagi proses kemasukan pantas makanan asas;
6. mempercepatkan proses permohonan lesen pengimportan di bawah Jabatan Perkhidmatan Veterinar (DVS) menerusi kelulusan secara interim bermula 1 Julai 2022 dengan proses kelulusan dalam tempoh masa tujuh (7) hari bekerja berbanding 30 hingga 90 hari;
7. mewujudkan insurans tanaman iaitu Skim Takaful Agromakanan yang akan dilancarkan pada suku ketiga 2022 dengan memanfaatkan seramai 189,500 pesawah padi;

8. bantuan melalui “Baucar Keluarga Malaysia” sebanyak RM100 kepada golongan B40 dan RM50 kepada golongan bujang;
9. melaksanakan moratorium penguatkuasaan bagi pengambilan pekerja asing dalam industri agromakanan supaya produktiviti di tahap optimum; dan
10. melaksanakan advokasi berteraskan kehilangan lepas tuai dan pembaziran makanan secara berterusan untuk mengoptimumkan sumber dalam sistem makanan.

Manakala intervensi langkah sederhana dan panjang merangkumi usaha untuk:

1. mengkaji mekanisme untuk mengurangkan kos minyak sawit mentah kepada syarikat pengilangan makanan ternakan sebagai salah satu daripada inisiatif untuk mengurangkan kos makanan ternakan;
2. mempelbagaikan sumber import makanan dengan menambah bilangan loji di luar negara;
3. mewujudkan *One Stop Quarantine Centre* (OSQC) yang bertujuan untuk menambahbaik pemeriksaan biosekuriti negara melibatkan tujuh (7) perkhidmatan merentasi lapan (8) kementerian;
4. menggalakkan aktiviti pertanian bandar melalui pemerkasaan Program Kebuniti Keluarga Malaysia dengan dana tambahan sebanyak RM 30 Juta; dan
5. memperkukuhkan industri input pertanian menerusi pembangunan aditif makanan ternakan, penambahbaikan formulasi makanan ternakan dan pembangunan jagung bijian.

MAFI yakin intervensi yang diambil mampu menjamin sekuriti makanan negara terutamanya dari aspek ketersediaan makanan dalam memastikan bekalan makanan kekal mencukupi kepada rakyat.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN MORDI BIMOL [MAS GADING]

TARIKH : 04 OGOS 2022 (KHAMIS)

SOALAN

TUAN MORDI BIMOL [MAS GADING] minta **MENTERI KANAN PENDIDIKAN** menyatakan berapa jumlah terkini guru Pendidikan Islam dari Semenanjung Malaysia dan anak tempatan yang berkhidmat di Sarawak dan apakah usaha Kementerian bagi menggalakkan anak tempatan Sarawak bagi mengatasi kekurangan tersebut.

JAWAPAN

Tuan Yang di-Pertua,

Kementerian Pendidikan Malaysia (KPM) melaksanakan penempatan guru baharu berdasarkan kepada kekosongan perjawatan dan keperluan opsyen di sesebuah negeri. KPM juga berusaha untuk memastikan guru kelahiran Sarawak diberikan keutamaan untuk ditempatkan di negeri kelahiran mereka berdasarkan kekosongan perjawatan dan keperluan opsyen.

Untuk makluman Ahli Yang Berhormat, sehingga 30 Jun 2022, jumlah guru Pendidikan Islam (PI) bagi sekolah rendah dan menengah yang berasal dari Semenanjung dan bertugas di negeri Sarawak adalah seramai 1,220 guru. Guru PI kelahiran Sarawak bagi sekolah rendah dan menengah negeri Sarawak adalah seramai 1,413 guru.

Pelbagai pendekatan telah dan sedang dilaksanakan oleh KPM bagi memastikan semua sekolah di seluruh negara mendapat bekalan guru yang mencukupi. Terkini, KPM telah selesai melaksanakan pengambilan khas guru secara *one-off* pada tahun 2021.

KPM juga melantik graduan siswazah tanpa ikhtisas pendidikan sebagai guru *Contract of Service* (COS) untuk mengisi kekosongan jawatan. Keutamaan lantikan diberikan kepada anak tempatan untuk berkhidmat di Sarawak. Guru COS ini perlu mengikuti kursus yang dianjurkan oleh Institut Pendidikan Guru Malaysia bagi mendapatkan ikhtisas pendidikan.

KPM turut melaksanakan pengambilan guru berdasarkan kluster opsyen iaitu pemetaan bidang kelulusan akademik di institusi pengajian yang dipadankan dengan opsyen mata pelajaran bagi meningkatkan jumlah lantikan guru PI.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN CHANG LIH KANG [TANJONG
MALIM]
TARIKH : 04 OGOS 2022 (KHAMIS)

SOALAN

TUAN CHANG LIH KANG [TANJONG MALIM] minta **MENTERI KEWANGAN** menyatakan cara Kerajaan untuk membiayai kos projek MRT 3. Berapa hutang DanaInfra yang dijamin oleh Kerajaan termasuk projek MRT 3.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan telah bersetuju untuk melaksanakan Projek MRT Laluan 3 (MRT 3) dengan kos keseluruhan dianggarkan sebanyak RM50.2 bilion yang akan dibiayai melalui terbitan sukuk secara berperingkat bermula tahun 2022 sehingga 2032 oleh Danainfra Nasional Bhd (DINB).

Sehingga 30 Jun 2022, jumlah hutang DINB yang dijamin oleh Kerajaan adalah sebanyak RM127.975 bilion merangkumi bayaran balik prinsipal dan keuntungan (*profit*) bagi Projek MRT Laluan Kajang, MRT Laluan Putrajaya, Projek Lebuhraya Pan Borneo Sarawak (Fasa 1) dan LRT 3. Bagi Projek MRT 3, DINB masih dalam proses merangka program pembiayaan bagi projek berkenaan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN PRABAKARAN A/L M PARAMESWARAN
[BATU]**

TARIKH : 04 OGOS 2022 (KHAMIS)

SOALAN

TUAN PRABAKARAN A/L M PARAMESWARAN [BATU] minta **MENTERI PELANCONGAN, SENI DAN BUDAYA** menyatakan langkah Kementerian dalam menjadikan seni sebagai salah satu sumber pendapatan negara dan bagaimana Kementerian ini dapat membantu sektor pelancongan andai berlaku gelombang ke-3 pandemik COVID-19 akan datang.

JAWAPAN

Tuan Yang di-Pertua,

1. Merujuk kepada Dasar Kebudayaan Negara 2021 (DAKEN), bidang seni yang diletakkan di bawah tanggungjawab Kementerian Pelancongan, Seni dan Budaya (MOTAC) adalah dalam lingkungan seni budaya yang merangkumi seni berbentuk visual dan persembahan termasuklah seni persembahan tradisional dan kontemporari.

2. Dalam usaha menjadikan seni sebagai salah satu sumber pendapatan negara, pelbagai program dan aktiviti seni budaya dilaksanakan bagi menyokong matlamat ini. Antara program seni budaya yang telah diadakan dan berjaya menjana pendapatan termasuklah:

- (i) Festival Seni Hidup @ *Living Arts Cultural Festival* - Program bertaraf antarabangsa ini mempromosi dan mengetengahkan kesenian masyarakat pelbagai negara yang telah diiktiraf oleh *United Nations Educational, Scientific and Cultural Organization* (UNESCO) dan kesenian yang mendapat pengiktirafan Warisan Kebangsaan. Pengisian program yang mengangkat kesenian tradisional pelbagai masyarakat yang unik dan autentik ini menjadi salah satu daya tarikan pelancong yang menjadikan Malaysia sebagai destinasi pelancongan yang turut menyumbang kepada penjaan ekonomi kepada masyarakat dan negara. Pelaksanaan program ini sejak 2018 hingga 2021 menjana nilai publisiti lebih RM8juta;
- (ii) Panggung Seni Tradisional (PST) yang merupakan persembahan kesenian tradisional yang terdiri daripada muzik, tarian dan teater. Hasil penjualan tiket daripada penganjuran program ini disalurkan kepada kumpulan yang terlibat sebagai sumber pendapatan. PST yang dianjurkan sejak 2017 telah berjaya menjana pendapatan lebih RM180,000. Hasil yang lebih tinggi pastinya boleh dicapai sekiranya negara tidak melalui tempoh pelaksanaan Perintah Kawalan Pergerakan bagi membendung penularan COVID-19;

- (iii) Menganjurkan Program Pelancongan Budaya (*Culture Based Tourism*) yang berbentuk menyemarakkan seni budaya secara maya bagi tahun 2021. Ini telah memberi ruang dan peluang kepada masyarakat setempat untuk terus menjana pendapatan melalui aktiviti jualan produk seni budaya walaupun semasa tempoh pelaksanaan PKP. Antara pengisian program yang dilaksanakan dengan kerjasama dan penglibatan pelbagai pihak serta NGO seni budaya ini adalah seperti pameran, demonstrasi produk, pameran, jualan, bengkel/ latihan/ *masterclass*, pertandingan mencungkil bakat, aktiviti kesenian, kebudayaan dan sukan rakyat. Sebanyak lebih RM15juta telah dijana daripada program ini dengan nilai publisiti mencecah lebih RM250juta; dan
- (iv) JKKN TV adalah sebuah platform penyiaran digital untuk menyebarkan info seni budaya dan memberi peluang kepada NGO dan penggiat seni budaya untuk menguar-uarkan aktiviti/program seni budaya yang dilaksanakan kepada khalayak masyarakat. Pelbagai pengisian di dalam slot JKKN TV turut dijadikan platform penjana pendapatan seperti Jualan Produk Usahawan Seni Negeri dan Produk Jualan Usahawan Seni berkonsep Go Shop.

3. Selain itu, seni kraf tangan juga turut memberi sumbangan kepada pendapatan negara. Sehingga Jun 2022, jualan hasil kraf pada tahun 2022 melebihi RM140juta. Pelbagai langkah telah diambil oleh MOTAC melalui Kraftangan Malaysia bagi menjadikan kraf sebagai sumber pendapatan. Antara program yang dilaksanakan termasuklah:

- (i) Program Pembangunan Perantisan Komuniti (PPPK) - Program ini menawarkan latihan tenaga kerja baharu selama 6 bulan yang berkonsepkan '*Place & Train*' di bawah bimbingan usahawan kraf bagi membantu meningkatkan bilangan tenaga kerja mahir;
- (ii) Program Pembangunan Kemahiran Komuniti (PPKK) yang bertujuan membangun dan memperkasakan komuniti kraf bagi melibatkan diri secara langsung dalam perusahaan kraf untuk

menjana pendapatan utama mahupun sampingan. Komuniti diberi latihan dan kemahiran untuk menghasilkan produk kraf berkualiti yang boleh dikomersialkan dan dipasarkan. Pada tahun 2021, sebanyak 104 projek, melalui 212 aktiviti dengan 2,676 penyertaan peserta dijalankan merangkumi pelbagai bidang kraf. Program ini diteruskan bagi tahun 2022;

- (iii) Program Perantisan Warisan Kraf (PEWARIS) - Program ini juga dilaksanakan secara '*Place & Train*' di mana peserta akan ditempatkan di bengkel Adiguru Kraf di bawah bimbingan dan pengawasan langsung Adiguru bagi menguasai teknik pembuatan, reka bentuk dan motif yang merupakan identiti unik Adiguru tersebut. Sehingga Jun 2022, seramai enam orang Adiguru Kraf terlibat iaitu Adiguru Kraf Seramik, Anyaman Mengkuang, Ukiran Halus, Songket, Tenunan Pua dan Anyaman Rotan dengan penyertaan seramai 12 orang perantis; dan
- (iv) Menganjurkan Kursus Jangka Pendek dan Video-video DIY - iaitu kursus kraf jangka pendek untuk meningkatkan minat masyarakat terhadap produk kraf seterusnya menggalakkan mereka untuk bergiat aktif sepenuhnya sebagai usahawan kraf. Di samping itu, video-video kreatif pembuatan produk kraf turut dihasilkan sebagai panduan dalam penghasilan produk kraf yang boleh ditonton secara percuma di platform Youtube mycraftshoppe dan kraftv.

4. Selain itu, MOTAC melalui Lembaga Pembangunan Seni Visual Negara (LPSVN) sentiasa proaktif dalam menyokong usaha menjadikan seni sebagai sumber pendapatan negara melalui perancangan beberapa pameran dan festival seni berskala besar. Pelaksanaan *Malaysia Art Ecosystem Festival* (MAEF) yang melibatkan 73 penyertaan terdiri daripada 20 buah galeri, 10 buah syarikat yang menawarkan perkhidmatan berkaitan seni dan 37 orang penggiat seni telah berjaya memperolehi jumlah jualan karya seni sebanyak RM188,546. Manakala itu, Program Art Decor yang melibatkan 120 orang peserta telah meraih jumlah jualan karya seni sebanyak RM2,000,000.

5. LPSVN juga telah melaksanakan Program *Young Art Entrepreneurs* (YAE!) bermula tahun 2017. Sehingga 2022, program ini telah berjaya melahirkan seramai 110 orang usahawan seni dengan penjana pendapatan lebih RM1.7juta sejak program ini dilaksanakan.

6. Selain itu, LPSVN turut membangunkan platform atas talian pada pertengahan tahun 2020 iaitu portal *gogallery.my*. yang dibangunkan sebagai platform atas talian bertujuan menghimpunkan penggiat seni visual negara. Ia dijadikan sebagai '*One Stop Centre*' / Pusat Pengumpulan maklumat seni visual di Malaysia untuk menjana pendapatan pasif melalui hasil seni. Keahlian terkini pendaftaran penggiat seni adalah seramai 673 orang. Jumlah penggiat seni yang telah menerima bantuan khas kewangan dengan penyertaan video tutorial seni adalah seramai 321 orang. Sebanyak 357 video tutorial telah dimuat naik ke dalam portal ini.

7. Sementara itu, di bawah tonggak 5, Pelan Pemulihan Pelancongan 2.0, MOTAC bersama-sama penggiat industri telah merangka pelbagai inisiatif bagi memperkukuhkan pemulihan dengan ketahanan jangka panjang dan kesediaan menghadapi krisis. Antara inisiatif di bawah strategi ini termasuklah:

- (i) menyemak dan memperhalusi garis panduan krisis pelancongan sedia ada;
- (ii) menggalakkan penggiat industri mempromosikan pakej-pakej pelancongan melalui laman web *www.malaysia.travel*; dan
- (iii) menggalakkan usahawan kraf mengaplikasikan teknologi digital dalam mempromosi dan memasarkan produk mereka dalam aplikasi yang telah dibangunkan MOTAC seperti *E-Kraf Bazaar*, *My CraftShoppe* serta *CraftOnTheGO*.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN KARUPAIYA A/L MUTUSAMI
[PADANG SERAI]**

ARIKH : 04 OGOS 2022 (KHAMIS)

SOALAN

TUAN KARUPAIYA A/L MUTUSAMI [PADANG SERAI] minta **MENTERI KANAN PENDIDIKAN** menyatakan apakah tindakan pihak Kementerian Pendidikan terhadap guru-guru yang kerap kali mengambil cuti sakit (MC) dan apakah imbuhan yang akan diberi kepada guru-guru yang rajin dan sentiasa menggantikan tempat guru-guru yang mengambil cuti sakit.

JAWAPAN

Tuan Yang di-Pertua,

Berdasarkan Perintah Am 15 Bab C berkaitan Kemudahan Cuti, Ketua Jabatan boleh menggunakan budi bicaranya untuk menerima sijil sakit yang dikeluarkan oleh pegawai perubatan kerajaan atau swasta bagi tujuan kelulusan. Jumlah cuti sakit sama ada sijil sakit kerajaan mahupun swasta yang boleh diberikan adalah tidak melebihi 180 hari dalam suatu tahun kalendar. Sehubungan dengan itu, mana-mana guru yang diberikan sijil sakit oleh pegawai perubatan di bawah jumlah kelayakan, kementerian tiada halangan untuk menerima sijil sakit tersebut.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : DATO' NGEH KOO HAM [BERUAS]

TARIKH : 04 OGOS 2022 (KHAMIS)

SOALAN

DATO' NGEH KOO HAM [BERUAS] minta **MENTERI KANAN PENDIDIKAN** menyatakan apakah tugas perkeranian dan juga aktiviti-aktiviti tidak berkaitan dengan tugas mendidik murid-murid yang masih diperlu dilaksanakan oleh guru-guru. Bilakah mereka akan dimansuhkan supaya guru-guru boleh menumpukan perhatian mereka mendidik murid-murid.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa mengambil langkah proaktif dalam usaha mencari penyelesaian terbaik bagi mengurangkan kerja-kerja perkeranian yang dilakukan oleh guru agar mereka dapat menumpukan sepenuh perhatian mendidik murid-murid.

Untuk Makluman Ahli Yang Berhormat, KPM telah melaksanakan penambahbaikan ke atas fungsi pengurusan di sekolah melalui pewujudan Modul Tadbir Urus Sekolah (MySG) yang diperkenalkan pada tahun 2021. MySG menjelaskan dengan lebih terperinci empat komponen pengurusan sekolah, iaitu Pengurusan dan Pentadbiran, Kurikulum, Hal Ehwal Murid dan Kokurikulum.

Selain itu, KPM melaksanakan pelbagai inisiatif yang merangkumi intervensi seperti berikut:

- i. memudahkan pengurusan fail dan dokumentasi;
- ii. pengurusan data dan sistem dalam talian;
- iii. penyeragaman borang dan proses pemantauan; dan
- iv. Sistem Rekod Kesihatan Murid secara dalam talian (e-RKM).

Untuk makluman Ahli Yang Berhormat, KPM turut melaksanakan Bengkel Kerja Berkaitan Beban Tugas Guru melibatkan wakil guru dari seluruh negara. Bengkel tersebut bertujuan untuk mendapatkan input secara lebih berfokus daripada guru berkaitan beban tugas mereka pada masa kini. Hasil daripada bengkel tersebut, KPM sedang meneliti beberapa inisiatif berkaitan sistem perekodan data secara bersepadu, modul jadual waktu serta pengurusan takwim aktiviti kurikulum dan kokurikulum secara berpusat.

KPM akan terus komited dalam memastikan semua guru dapat memberi fokus kepada peningkatan profesionalisme guru dan program peningkatan prestasi murid.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN SIM CHEE KEONG
[BUKIT MERTAJAM]**

TARIKH : 04 OGOS 2022 (KHAMIS)

SOALAN

TUAN SIM CHEE KEONG [BUKIT MERTAJAM] minta **MENTERI KANAN PENDIDIKAN** menyatakan tentang isu guru CoS yang dijanjikan 4000 penempatan kemudian dikurangkan kepada 2400 tetapi akhirnya gagal dilaksanakan serta penyelesaian kepada isu ini. Berapa orang guru CoS telah diberi penempatan pada tahun ini.

JAWAPAN

Tuan Yang di-Pertua,

Kementerian Pendidikan Malaysia (KPM) telah mengumumkan Pengambilan Khas seramai 18,702 orang Pegawai Perkhidmatan Pendidikan (PPP) Gred DG41 secara *one-off* pada 20 Jun 2021 bagi mengisi kekosongan guru di sekolah KPM seluruh negara. Ini merupakan inisiatif yang diambil oleh KPM bagi mengatasi isu kekosongan guru yang telah berlarutan sekian lama.

Untuk makluman Ahli Yang Berhormat, urusan pengambilan khas guru baharu ini, termasuk lantikan secara *Contract of Service* (CoS) telah selesai dilaksanakan sepenuhnya oleh Suruhanjaya Perkhidmatan Pendidikan (SPP). Keutamaan dalam pengambilan khas ini diberikan kepada graduan yang mempunyai ikhtisas pendidikan untuk lantikan secara tetap terlebih dahulu. Kemudian, baki kekosongan hanya akan diisi oleh graduan bukan ikhtisas pendidikan melalui kaedah lantikan CoS. Dalam hal ini, SPP tidak menetapkan sebarang kuota untuk melantik guru secara CoS dalam urusan pengambilan tersebut. Sebaliknya, jumlah calon yang dilantik secara CoS adalah bergantung kepada jumlah yang diperlukan untuk mata pelajaran tertentu selepas semua calon ikhtisas pendidikan yang layak telah dilantik.

Berdasarkan rekod KPM, seramai 18,043 calon telah ditemuduga untuk lantikan secara CoS. Daripada jumlah tersebut, seramai 2,349 orang telah dilantik sebagai guru secara lantikan CoS.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK DR. HASAN BIN BAHROM
(TAMPIN)**

TARIKH : 4 OGOS 2022 (KHAMIS)

SOALAN

DATUK DR. HASAN BIN BAHROM (TAMPIN) minta **MENTERI PERTANIAN DAN INDUSTRI MAKANAN** menyatakan berkaitan dengan jumlah taburan tanah pertanian yang tidak diusahakan di seluruh negara mengikut negeri, apakah ada usaha yang dilakukan oleh Kementerian dalam memastikan kelestarian tanah pertanian terbiar dan bagaimana ia dapat dilaksanakan.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pertanian dan Industri Makanan melalui Jabatan Pertanian telah mengenalpasti seluas 103,563 hektar (ha) tanah terbiar melibatkan sebanyak 46,382 lot tanah di seluruh negara, iaitu di Pahang (29,361 ha), Johor (10,098 ha), Perak (11,013 ha), Selangor (20,058 ha), Negeri Sembilan (11,324 ha), Terengganu (7,862 ha), Pulau Pinang (92,622 ha), Melaka (2,332), Kelantan (4,815 ha), Kedah (2,655 ha), Perlis (12 ha), dan Wilayah Persekutuan Labuan (1,381 ha).

Bagi memastikan kelestarian kawasan tanah pertanian terbiar, pihak Kementerian telah menyediakan insentif dalam bentuk *inkind* menerusi pelaksanaan beberapa projek seperti Projek Pembangunan Tanaman Buah-Buahan Jangka Panjang, Projek Pembangunan Tanaman Buah-Buahan Jangka Pendek dan Projek Pembangunan Tanaman Sayuran. Bantuan yang diberikan ini termasuklah, pembersihan kawasan, kemudahan infrastruktur, peralatan, baja, racun dan bantuan perkhidmatan pengembangan oleh pegawai pertanian yang terlatih.

Beberapa inisiatif melibatkan kerjasama Kerajaan Negeri juga telah diperhalusi dan dicadangkan dalam Mesyuarat Menteri Besar dan Ketua Menteri Ke-139 bagi tujuan kelestarian tanah pertanian. Dalam mesyuarat ini Kerajaan Negeri juga bersetuju antara lain untuk melaksanakan inisiatif- inisiatif berikut:

- (i) Meningkatkan keluasan tanah yang sesuai khususnya tanah milik negeri untuk aktiviti pertanian dengan:
 - a. Mewartakan kawasan tanah pertanian sebagai tanah rizab di bawah Seksyen 62 Kanun Tanah Negara (KTN) dan kemudiannya memajakkan tanah rizab berikut di bawah Seksyen 63 KTN untuk tempoh sekurang-kurangnya 10 sehingga 21 tahun.

- b. Memperkasakan pemberian tanah milik negeri kepada anak syarikat Kerajaan Negeri berkaitan pertanian yang kemudiannya akan memajakkan tanah tersebut kepada usahawan tani untuk tempoh 30 tahun.
 - c. Pihak berkuasa negeri boleh, tertakluk kepada kaedah-kaedah tanah negeri meluluskan tempoh sekurang-kurangnya tiga tahun dan boleh dilanjutkan seterusnya bagi setiap Lesen Pendudukan Sementara (TOL).
- (ii) Mengekalkan pengezonan kawasan jelapang padi.
- (iii) Pewartaan Taman Kekal Pengeluaran Makanan (TKPM) dan membangunkan TKPM yang terbengkalai serta yang belum dimajukan.
- (iv) Menubuhkan Jawatankuasa Pembangunan Tanah Pertanian Peringkat Daerah bagi memudah cara urusan membangunkan tanah pertanian milik persendirian yang tidak diusahakan.

Sekian, terima kasih,.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN AHMAD BIN HASSAN [PAPAR]

TARIKH : 04 OGOS 2022 (KHAMIS)

SOALAN

TUAN AHMAD BIN HASSAN [PAPAR] minta **MENTERI KANAN PENDIDIKAN** menyatakan :-

- (a) kesan kepada guru dan murid (komunikasi, pemikiran kritis, kreativiti dan nilai murni serta etika) melalui tindakan Kementerian membuat perubahan kepada kaedah pengajaran dan pembelajaran termasuk memansuhkan peperiksaan awam; dan
- (b) menyatakan demografi, latar belakang sosial dan ekonomi 70,455 calon yang dikategorikan sebagai cicir SPM 2021 dan langkah bagi membantu mereka.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa melaksanakan penambahbaikan kepada sistem pentaksiran dan penilaian murid seiring dengan keperluan semasa. Dalam Sistem Pentaksiran Pendidikan Kebangsaan, murid ditaksir melalui Pentaksiran Berasaskan Sekolah (PBS) dan Peperiksaan Pusat.

Berikutan pemansuhan Ujian Pencapaian Sekolah Rendah (UPSR) mulai tahun 2021 dan Pentaksiran Tingkatan Tiga (PT3) mulai tahun 2022, KPM memberi tumpuan kepada pemeraksanaan PBS, melibatkan komponen Pentaksiran Bilik Darjah (PBD), Pentaksiran Aktiviti Jasmani, Sukan dan Kokurikulum (PAJSK) serta Pentaksiran Psikometrik (PPsi).

Untuk makluman Ahli Yang Berhormat, PBS telah diperkenalkan lebih 10 tahun yang lalu, iaitu mulai tahun 2011 di peringkat sekolah rendah dan tahun 2012 di peringkat sekolah menengah. Pentaksiran ini bertujuan untuk menilai aspek intelek, emosi, rohani, jasmani dan sosial selaras dengan Falsafah Pendidikan Kebangsaan.

Dalam konteks PBD, guru memantau perkembangan, kemajuan dan penguasaan setiap murid dalam proses pembelajaran mereka termasuk kemahiran asas membaca, menulis dan mengira (3M). Dengan ini, guru boleh merancang dan mengubah suai kaedah Pengajaran dan Pembelajaran (PdP) bagi membantu setiap murid meningkatkan tahap penguasaan pembelajaran mereka. Pelaksanaan PBD secara berterusan dapat mempersiapkan murid dengan pengetahuan, kemahiran dan nilai sebagai asas yang kukuh untuk mengikuti pembelajaran di peringkat seterusnya.

Antara pendekatan dalam pengukuhan PBD bagi murid Tahun 4 hingga Tingkatan 3 mulai tahun 2022 adalah dengan menambah baik pengurusan ujian akhir sesi akademik melalui penyediaan soalan yang setara standardnya oleh KPM. Soalan tersebut disediakan oleh guru yang berkepakaran dalam pembinaan item dan disimpan dalam sistem bank soalan yang dibangunkan oleh KPM.

Untuk tujuan pelaksanaan ujian akhir sesi akademik, pihak sekolah akan menjana set soalan daripada sistem tersebut dan ditadbir di sekolah seperti mana ujian akhir tahun sebelum ini. Panduan penskoran juga akan disediakan untuk kemudahan guru.

Penambahbaikan kepada ujian akhir sesi akademik ini adalah bagi membolehkan guru dan ibu bapa bersama-sama membantu membangunkan potensi murid bermula daripada peringkat sekolah rendah. Dalam mencapai hasrat ini, pelaporan ujian akhir sesi akademik akan digunakan untuk membolehkan intervensi awal dilakukan bagi mengoptimumkan potensi murid. Pelaporan ini bukan untuk tujuan perbandingan pencapaian antara murid atau sekolah.

Untuk makluman Ahli Yang Berhormat, kejayaan dan kemenjadian murid haruslah dilihat secara holistik dan bukan semata-mata berdasarkan

prestasi dalam bidang akademik sahaja. Justeru, pentaksiran melalui PAJSK dan PPSi juga diperkukuh bagi menilai perkembangan murid dalam aspek sukan, kokurikulum, nilai murni, minat dan kecenderungan serta pembentukan sahsiah.

KPM juga akan menambah baik dan memantapkan kaedah pelaporan PBD. Melalui kaedah ini, pencapaian murid dilaporkan secara menyeluruh sebanyak dua kali setahun iaitu pada pertengahan sesi akademik dan akhir sesi akademik dengan menggunakan deskriptor tahap penguasaan yang komprehensif dan jelas. Pelaporan ini juga menilai tahap usaha murid dalam pembelajaran. Di samping itu, guru kelas dan guru mata pelajaran akan memberi ulasan dan cadangan intervensi bagi mengoptimumkan potensi murid.

Selain daripada pelaporan PBD, laporan akhir sesi akademik akan turut disertakan dengan pelaporan PAJSK dan PPSi. Secara keseluruhan, penambahbaikan pelaporan PBS dapat memberi gambaran mengenai kemenjadian murid secara menyeluruh, komprehensif dan bermakna. Pemerkasaan PBS merupakan antara pendekatan KPM untuk beralih daripada pembelajaran berorientasi peperiksaan kepada pembelajaran yang lebih menyeronokkan untuk murid.

Selain itu, KPM juga mempergiatkan program latihan untuk pentadbir dan guru bagi meningkatkan kemahiran serta memantapkan pelaksanaan pentaksiran berterusan di sekolah. Guru juga akan terus dilatih untuk meningkatkan inovasi dan kreativiti dalam PdP, termasuk penggunaan teknologi digital.

Untuk makluman Ahli Yang Berhormat, peperiksaan Sijil Pelajaran Malaysia (SPM) adalah peperiksaan kebangsaan yang utama dan ditadbir secara berpusat pada akhir pendidikan peringkat menengah bagi tujuan pensijilan. Berdasarkan Kurikulum Standard Sekolah Menengah (KSSM), calon SPM perlu menduduki Ujian Lisan Bahasa Melayu dan Ujian Lisan Bahasa Inggeris. Bagi ujian Lisan Bahasa Inggeris, pentaksiran ini dijaikarkan dengan *Common European Framework of Reference for Languages* (CEFR), iaitu piawaian antarabangsa yang menunjukkan tahap

penguasaan bahasa. Pencapaian calon dilaporkan melalui gred SPM dan tahap CEFR.

Selain itu, Ujian Amali Sains (UAS) bagi mata pelajaran Fizik, Kimia, Biologi dan Sains Tambahan turut dilaksanakan dalam peperiksaan SPM. Pelaksanaan semula UAS secara peperiksaan pusat ini merupakan satu usaha KPM untuk mengukur penguasaan kemahiran proses sains dan kemahiran manipulatif murid aliran sains.

Untuk maklumat Ahli Yang Berhormat, bagi tujuan penandaarasan dan penjaminan kualiti pada peringkat antarabangsa, KPM turut melibatkan khidmat pakar pentaksiran dari luar negara iaitu *Cambridge Assessment English* (CAE), *Cambridge Assessment International Education* (CAIE), dan *Pearson*, United Kingdom dalam pengendalian peperiksaan SPM.

Dalam hal ini, sijil SPM yang merekodkan pencapaian akademik murid boleh digunakan untuk menyambung pengajian, memohon biasiswa dan menceburi bidang pekerjaan. Sijil SPM juga diiktiraf oleh badan pentaksiran antarabangsa bagi tujuan melanjutkan pengajian di luar negara.

Secara keseluruhan, KPM yakin pemerkasaan PBS melalui pelbagai pendekatan berupaya meningkatkan minat murid untuk terus belajar walaupun PT3 telah dimansuhkan. SPM akan terus kekal sebagai peperiksaan utama kebangsaan pada penghujung pendidikan menengah.

Tuan Yang di-Pertua,

Bagi SPM tahun 2021, seramai 10,681 calon berdaftar tidak hadir menduduki peperiksaan. Daripada jumlah tersebut, 9,037 orang atau 2.3 peratus adalah terdiri daripada calon sekolah KPM, calon sekolah agensi kerajaan, calon sekolah menengah agama negeri, calon sekolah swasta dan calon sekolah menengah agama rakyat manakala 1,644 orang atau 0.42 peratus lagi adalah calon persendirian.

Walau bagaimanapun, KPM telah mengambil pendekatan dari awal bagi memastikan calon SPM hadir untuk menduduki peperiksaan. Antara pendekatan yang telah diambil adalah seperti berikut:

- i. menyediakan perkhidmatan bimbingan dan sokongan psikososial melalui pelbagai kaedah seperti program motivasi, infografik pendidikan dan video inspirasi untuk meningkatkan motivasi murid untuk terus hadir ke sekolah. Sesi konsultasi antara Guru Bimbingan dan Kaunseling bersama-sama dengan guru mata pelajaran dan guru kelas dilaksanakan untuk mengenal pasti murid yang tidak mengikuti sesi pembelajaran. Intervensi berfokus dijalankan agar murid kembali ke sekolah dan berminat untuk mengikuti pembelajaran;
- ii. mengadakan perbincangan di antara pihak sekolah dengan ibu bapa/penjaga murid untuk mengenal pasti sebab dan langkah-langkah yang boleh diambil bagi menangani isu murid yang kurang berminat untuk belajar. Kerjasama ini penting untuk memastikan ibu bapa/penjaga murid dapat menyokong pembelajaran anak-anak semasa di rumah dan sekolah;
- iii. melaksanakan intervensi murid risiko cicir pengajaran dan pembelajaran di peringkat jabatan pendidikan negeri (JPN) dan pejabat pendidikan daerah (PPD). Intervensi ini melibatkan Sektor Pengurusan Pembelajaran, Sektor Pengurusan Sekolah dan Sektor Pembangunan Murid. Intervensi ini juga melibatkan *focal person*, pelibatan Ibu Bapa, Komuniti dan Swasta (PIBKS) pada peringkat daerah dan negeri melalui aktiviti *outreach*;
- iv. menyediakan Garis Panduan Mengurus Murid Berisiko Cicir di sekolah sebagai rujukan JPN, PPD dan sekolah dalam mengendalikan isu murid cicir dengan sistematik, terancang dan berkesan. KPM telah membangunkan *Dashboard* Murid Berisiko Cicir bagi mengenal pasti murid berisiko cicir; dan
- v. menyediakan Manual Pengurusan Pencegahan dan Intervensi Murid Cicir: Serlahkan Keunggulan Diri (SUDI 2.0). Manual ini digunakan sebagai panduan kepada pihak sekolah untuk merancang dan menyediakan intervensi yang bersesuaian supaya murid kekal bersekolah sehingga tamat Tingkatan 5.

Untuk makluman Ahli Yang Berhormat, di sebalik usaha-usaha yang dilaksanakan oleh KPM, masih terdapat calon sekolah yang tidak menduduki peperiksaan SPM atas pelbagai faktor. Ini termasuk isu seperti tidak berminat untuk meneruskan persekolahan kerana telah bekerja.

KPM juga prihatin terhadap isu calon yang tidak layak menerima Sijil Pelajaran Malaysia (SPM). Bagi SPM tahun 2021, seramai 45,526 orang calon kerana tidak layak menerima sijil SPM. Sebagai usaha membantu calon tersebut, KPM menyediakan peluang kepada mereka untuk menduduki peperiksaan SPM Ulangan (SPMU) yang akan dilaksanakan pada bulan September 2022. SPMU menawarkan tiga mata pelajaran, iaitu Bahasa Melayu, Sejarah dan Matematik.

Calon juga boleh mendaftar untuk menduduki semula peperiksaan SPM tahun 2022 sebagai calon persendirian. Dengan cara ini, calon masih berpeluang untuk mendapatkan sijil SPM bagi melanjutkan pelajaran ke peringkat yang lebih tinggi atau memasuki alam pekerjaan.

KPM turut menawarkan perkhidmatan *patching* sijil peperiksaan SPM bagi memberi peluang kepada calon untuk menggabungkan beberapa keputusan terbaik bagi 12 mata pelajaran ke dalam satu sijil peperiksaan. Dengan ini, calon berpeluang memperbaiki keputusan peperiksaan SPM masing-masing.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : DATO' NGEH KOO HAM [BERUAS]
TARIKH : 04 OGOS 2022 (KHAMIS)

SOALAN

DATO' NGEH KOO HAM [BERUAS] minta **MENTERI KEWANGAN** menyatakan sama ada Perintah Levi Keuntungan Luar Biasa (Buah Kelapa Sawit) 2008 seperti yang dipinda oleh Perintah Levi Keuntungan Luar Biasa (Buah Kelapa Sawit) (Pindaan) (No. 2) 2009 adalah tidak sah kerana melanggar Perkara 8 Perlembagaan Persekutuan yang menetapkan bahawa semua orang adalah sama rata di sisi undang-undang.

JAWAPAN

Tuan Yang di-Pertua,

Untuk makluman Ahli Yang Berhormat, Fasal (1) Perkara 8 Perlembagaan Persekutuan memperuntukkan bahawa semua orang adalah sama rata di sisi undang-undang dan berhak mendapat perlindungan yang sama rata di sisi undang-undang. Fasal (2) Perkara 8 pula memperuntukkan bahawa tidak boleh ada diskriminasi terhadap warganegara kecuali sebagaimana yang dibenarkan dengan nyata oleh Perlembagaan Persekutuan.

Suatu undang-undang yang digubal adalah sah selagi mana ia tidak bercanggah dengan prinsip kesamarataan yang termaktub di bawah Perkara 8 Perlembagaan Persekutuan. Bagi menentukan sama ada diskriminasi adalah dibenarkan atau sebaliknya di sisi undang-undang, perkara-perkara berikut hendaklah dipatuhi:

- i. tiada pelanggaran kepada Perkara 8 Perlembagaan Persekutuan sekiranya faktor yang diguna pakai oleh badan perundangan dalam menggubal sesuatu undang-undang mempunyai hubungan yang munasabah antara tujuan undang-undang tersebut dengan pemakaiannya, tidak dibuat dengan sewenang-wenangnya (*arbitrary*); dan
- ii. digubal berdasarkan kepada klasifikasi yang munasabah atau klasifikasi yang dibenarkan.

Perintah Levi Keuntungan Luar Biasa (Buah Kelapa Sawit) (Pindaan) (No.2) 2009 [P.U.(A)134/2009] dibuat oleh Menteri Kewangan menurut seksyen 6 Akta Levi Keuntungan Luar Biasa 1998 [Akta 592] bagi pengenaan levi keuntungan luar biasa yang melebihi apa-apa amaun untung yang ditetapkan dalam perintah itu.

Pengenaan pembayaran levi kelapa sawit telah diperluaskan kepada tuan punya kebun kelapa sawit berbanding hanya pengeluar buah kelapa sawit yang mengusahakan kebun kelapa sawit seperti yang

diperuntukkan dalam **Perintah Levi Keuntungan Luar Biasa (Buah Kelapa Sawit) 2008 [P.U.(A)250/2008]**.

P.U.(A)134/2009 memperuntukkan tuan punya kebun kelapa sawit yang mempunyai kebun kelapa sawit dengan keluasan tidak kurang daripada 40.46 hektar (100 ekar); tuan punya kebun yang mengusahakan kebun kelapa sawit masing-masing keluasannya tidak kurang daripada 40.46 hektar (100 ekar); dan pengeluar buah kelapa sawit yang mengusahakan kebun kelapa sawit dengan keluasan yang sama, hendaklah membayar suatu levi keuntungan luar biasa buah kelapa sawit.

Penentuan kadar pembayaran levi pada 0.03 peratus dan nilai ambang (*threshold*) di Semenanjung Malaysia sebanyak RM3,000 per tan dan RM3,500 per tan di Sabah dan Sarawak ditetapkan dengan mengambil kira kos-kos yang terlibat dalam mengusahakan ladang kelapa sawit termasuk logistik, geografi serta bentuk muka bumi yang berbeza di Semenanjung Malaysia, Sabah dan Sarawak. Oleh yang demikian, isu [P.U.A 134/2009] adalah tidak sah kerana melanggar Perkara 8 Perlembagaan Persekutuan tidak berbangkit memandangkan penentuan kadar dan *threshold* tersebut adalah dibuat berdasarkan klasifikasi yang munasabah, dan tidak dibuat dengan sewenang-wenangnya.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : PUAN NOORITA BINTI SUAL [TENOM]

TARIKH : 04 OGOS 2022 (KHAMIS)

SOALAN

PUAN NOORITA BINTI SUAL [TENOM] minta **MENTERI KANAN PENDIDIKAN** menyatakan apakah betul dakwaan bahawa atas bebanan kerja dan takut dengan pihak atasan “ramai” guru-guru yang terpaksa menipu semasa membuat laporan penilaian penguasaan murid dengan “lebih cantik” sepertimana yang dikongsikan oleh seorang bekas guru Bahasa Inggeris bernama Pn. Wan Maizura Kamaruddin yang tular baru-baru ini, sejauh mana kebenaran dakwaan ini dan apakah langkah-langkah yang telah diambil Kementerian untuk mengatasi masalah ini.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam memastikan guru melaksanakan Pentaksiran Bilik Darjah (PBD) mengikut garis panduan yang telah ditetapkan.

Untuk makluman Ahli Yang Berhormat, elemen kurikulum merangkumi aspek kandungan, pedagogi dan pentaksiran. Pentaksiran adalah kaedah yang digunakan untuk menentukan objektif pembelajaran tercapai dan murid menguasai pembelajaran. Tahap Penguasaan (TP) murid ditentukan mengikut kriteria yang telah ditetapkan berdasarkan Standard Prestasi dalam Dokumen Standard Kurikulum dan Pentaksiran (DSKP) bagi mentaksir perkembangan pembelajaran murid.

KPM telah mengambil inisiatif menerbitkan Buku Panduan Pelaksanaan Pentaksiran Bilik Darjah Edisi Ke-2, video penerangan dan infografik berkenaan pelaksanaan PBD dan boleh diakses oleh guru melalui portal *Digital Educational Learning Initiative Malaysia* (DELIMa). KPM juga mengadakan penerangan berhubung pelaksanaan PBD dari semasa ke semasa bagi memastikan guru dapat memberi pertimbangan secara profesional dalam penetapan TP murid.

Sehubungan itu, bagi memperkasa pelaksanaan PBD dalam kalangan guru, KPM sedang melaksanakan Jerayawara dan Sesi Libat Urus Pemeraksanaan PBS ke seluruh negara. Dalam program ini, terdapat sesi yang membugarkan semula konsep PBD dan isu-isu berkaitan PBD bagi memberi penjelasan dan pencerahan kepada guru berkaitan pelaksanaan PBD.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : LISAN

DARIPADA : TUAN AHMAD BIN HASSAN [PAPAR]

TARIKH : 4 OGOS 2022 (KHAMIS)

SOALAN

Tuan Ahmad bin Hassan [Papar] minta **MENTERI KANAN PENDIDIKAN** menyatakan jumlah pelajar tercicir di sekolah rendah dan sekolah menengah di Sabah bagi tempoh 10 tahun, puncanya dan tindakan yang diambil oleh Kementerian.

JAWAPAN

Tuan Yang di-Pertua,

Kementerian Pendidikan Malaysia (KPM) merujuk kepada definisi keciciran sebagai murid warganegara Malaysia yang berada dalam sistem pendidikan tetapi keluar daripada sistem sebelum tamat tempoh pendidikan.

KPM mula mengumpul data keciciran pada tahun 2016 bagi menentukan kadar keciciran murid pada peringkat sekolah rendah dan sekolah menengah. Berdasarkan statistik KPM kadar keciciran murid peringkat rendah di Sabah meningkat daripada 0.59 peratus pada tahun 2016 kepada 0.61 peratus pada tahun 2021. Walau bagaimanapun, pada peringkat menengah kadar keciciran menurun 2.31 peratus pada tahun 2016 kepada 0.87 peratus pada tahun 2021.

Untuk makluman Ahli Yang Berhormat, antara faktor utama keciciran murid adalah kerana masalah keluarga dan tidak berminat ke sekolah. Walau bagaimanapun, pihak KPM telah menjalankan pelbagai aktiviti bagi mengurangkan kadar keciciran murid termasuk menambah baik kemudahan asas, memperbanyakkan program motivasi, meningkatkan kesedaran ibu bapa, memperluas program-program bantuan seperti menyediakan Biasiswa Kecil Persekutuan, Rancangan Makanan Tambahan (RMT) dan Kumpulan Wang Amanah Pelajar Miskin (KWAPM). Selain itu, pelbagai bantuan seperti pemberian buku teks secara percuma, serta menyediakan khidmat guru kaunselor dan guru pemulihan turut disediakan bagi meningkatkan minat murid untuk meneruskan persekolahan. KPM juga melaksanakan Sekolah Model Khas Komprehensif 9 (K9) dan pembinaan asrama sekolah supaya semua kanak-kanak dapat kekal bersekolah terutamanya bagi murid di kawasan luar bandar dan pedalaman.

KPM juga telah menyediakan Garis Panduan Mengurus Murid Berisiko Cicir di Sekolah (GPMBC). Objektif GPMBC ini adalah untuk membantu pihak sekolah mengenal pasti murid berisiko cicir serta mengurus murid berisiko cicir secara berkesan dan sistematik. GPMBC ini juga bertujuan untuk memastikan pemantauan murid khususnya murid berisiko cicir dapat

dilaksanakan oleh pihak jabatan pendidikan negeri (JPN), pejabat pendidikan daerah (PPD) dan sekolah secara berterusan agar murid kekal bersekolah sehingga tamat tingkatan 5.

KPM turut menyediakan modul Serlahkan Keunggulan Diri (SUDI) sebagai panduan untuk melaksanakan intervensi dalam menangani keciciran murid. Melalui modul ini, aktiviti sokongan yang sistematik dapat dilaksanakan secara berterusan bagi memastikan murid kekal bersekolah sehingga tamat persekolahan.

KPM juga mengadakan kerjasama dengan pelbagai pihak, agensi dan komuniti setempat bagi membantu murid yang tercicir meneruskan persekolahan sehingga tamat Tingkatan 5. KPM telah menyediakan *Dashboard* Murid Berisiko Cicir KPM sebagai langkah pencegahan murid agar tidak tercicir daripada sistem pendidikan. *Dashboard* ini juga boleh memantau murid yang berisiko cicir di seluruh negara termasuk sekolah-sekolah kerajaan dan bantuan kerajaan. Selain itu, KPM telah menjalankan Program Sifar Murid Cicir (PSMC) di semua PPD sejak tahun 2019. Objektif program ini adalah memberi intervensi berfokus bagi membantu murid cicir untuk kembali bersekolah.

KPM yakin semua usaha dan inisiatif dirancang dan dilaksanakan ini dapat menangani keciciran murid dan memastikan mereka kekal dalam sistem pendidikan negara sehingga tamat persekolahan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DR. MASZLEE BIN MALIK
[SIMPANG RENGAM]**

TARIKH : 4 OGOS 2022 (KHAMIS)

SOALAN

Minta **MENTERI PENGAJIAN TINGGI** menyatakan usaha memperkenalkan kursus-kursus baharu di IPTA selari dengan tuntutan pasaran kerja di masa hadapan yang lebih berasaskan *Industrial Revolution 4.0* (IR 4.0) dan apakah usaha Kementerian untuk mengarusperdanakan kursus-kursus TVET demi mengelakkan pengangguran di kalangan graduan terutamanya di kalangan bangsa Melayu dan India.

JAWAPAN

Tan Sri Yang di-Pertua,

Dalam upaya melahirkan *Future Proof Graduates*, Kementerian Pengajian Tinggi (KPT) sentiasa komited dan berusaha memastikan kurikulum yang dibangunkan oleh Institusi Pendidikan Tinggi (IPT) memberikan penekanan kepada kaedah pengajaran yang memenuhi keperluan industri dan memberikan impak tinggi kepada masyarakat serta negara.

Antara usaha untuk mencapai perkara ini adalah dengan memperkenalkan ***Experiential Learning and Competency-Based Education Landscape (EXCEL)***. EXCEL memfokuskan kepada kaedah pembelajaran berasaskan pengalaman dan kompetensi yang diterapkan dalam empat (4) teras utamanya, iaitu:

- (i) *Industry Driven Experiential Learning (IDEAL)*,
- (ii) *Community Resilience Experiential Learning (CARE)*,
- (iii) *Research Infused Experiential Learning (REAL)*, dan
- (iv) *Personalised Experiential Learning (POISE)*.

Satu daripada program yang menggunakan kerangka EXCEL ialah Program *Apprenticeship*, yang merupakan pendidikan serta latihan berstruktur melibatkan latihan di tempat kerja secara intensif dan dilengkapi dengan pendidikan formal di universiti dengan mengutamakan konsep '*earn and learn*'.

Selain itu, **program TVET yang kompetitif turut diperkasa bagi mendukung Dasar Pendigitalan Pendidikan dan Dasar Industri 4WRD**. Antara tawaran program TVET yang bersifat kompetitif oleh KPT sejajar dengan ledakan IR4.0 ialah *Industrial & Production Professional, Software Development, Computer Network, Aircraft Maintenance, Cybersecurity, Games Development, Games Art* dan *Professional Creative Content*.

Pelaksanaan inisiatif perkongsian pintar dengan pihak berkepentingan juga sedang dirangka melalui **program 4IR Flagships** dengan lapan projek yang merangkumi pelbagai bidang iaitu: *Autonomous Vehicle, Wearables, Retail, Logistics, Agriculture/ Aquaculture, Cyber Security, Building and Construction*, dan *Halal Hub*. Tujuan utama projek ini adalah untuk melengkapkan ekosistem yang holistik dalam mengaplikasi teknologi 4IR merangkumi latihan pensyarah, penyediaan infrastruktur dan infostruktur berasaskan 4IR.

Seterusnya Jabatan Pendidikan Politeknik dan Kolej Komuniti (JPPKK) turut menawarkan program TVET yang berkualiti tinggi dan menepati keperluan industri melalui inisiatif ***Talent Enhancement Programme (TEP)*** yang dilaksanakan melalui ***Structured Internship Programme (SIP)***. Sebanyak 21 industri telah menawarkan SIP kepada 2,188 pelajar tahun akhir untuk menjalani latihan industri dan sekaligus menawarkan penempatan pekerjaan. JPPKK turut melaksanakan pendekatan pembelajaran *industry-led training* seperti *Work-Based Learning (WBL)* dan program 2u2i. Melalui inisiatif ini, graduan berpeluang mendapat pekerjaan sekaligus membantu mengurangkan graduan menganggur.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK SERI HAJI SALAHUDDIN BIN AYUB
[PULAI]**

TARIKH : 04 OGOS 2022 (KHAMIS)

SOALAN

DATUK SERI HAJI SALAHUDDIN BIN AYUB [PULAI] minta **MENTERI KANAN PENDIDIKAN** menyatakan perincian dari segi latar belakang, status sosioekonomi keluarga, jantina, serta lokasi spesifik/negeri yang tertinggi kadarnya berhubung anggaran 70,000 jumlah bilangan pelajar yang keciciran dalam SPM 2021.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam memastikan pengurusan peperiksaan Sijil Pelajaran Malaysia (SPM) berjalan lancar dan teratur, termasuk aspek kehadiran calon berdaftar untuk menduduki peperiksaan.

Bagi SPM tahun 2021, seramai 10,681 calon berdaftar tidak hadir menduduki peperiksaan. Daripada jumlah tersebut, 9,037 orang atau 2.3 peratus adalah terdiri daripada calon sekolah KPM, calon sekolah agensi kerajaan, calon sekolah menengah agama negeri, calon sekolah swasta dan calon sekolah menengah agama rakyat manakala 1,644 orang atau 0.42 peratus lagi adalah calon persendirian.

Maklumat calon yang tidak hadir menduduki peperiksaan SPM 2021

mengikut negeri adalah seperti jadual berikut:

Negeri	Bil. Calon
Johor	1,114
Kedah	810
Kelantan	666
Melaka	244
Negeri Sembilan	343
Pahang	582
Perak	732
Perlis	90
Pulau Pinang	491
Sabah	983
Sarawak	1,199
Selangor	2,294
Terengganu	596
W.P. Kuala Lumpur	501
W.P. Labuan	7
W.P. Putrajaya	29
JUMLAH	10,681

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : PUAN ISNARAISSAH MUNIRAH MAJILIS
[KOTA BELUD]**

TARIKH : 04 OGOS 2022 (KHAMIS)

SOALAN

PUAN ISNARAISSAH MUNIRAH MAJILIS [KOTA BELUD] minta
MENTERI PELANCONGAN, SENI DAN menyatakan :-

- (a) adakah Arkib Negara Malaysia menyimpan segala dokumen berkaitan proses pembentukan Malaysia bermula daripada cadangan, sesi perbincangan dan rundingan sehinggalah Perjanjian Malaysia 1963 ditandatangani di London United Kingdom; dan
- (b) tindakan yang diambil oleh Arkib Negara Malaysia setelah semua dokumen rahsia berkaitan Pembentukan Malaysia dan Perjanjian Malaysia 1963 telah dinyah rahsiakan oleh Kerajaan United Kingdom dan disimpan di The National Archive (TNA) London pada tahun 2013.

JAWAPAN

Tuan Yang di-Pertua,

1. Arkib Negara Malaysia ada menyimpan sebahagian dokumen berkaitan proses pembentukan Malaysia. Arkib Negara Malaysia akan terus menjalankan penyelidikan berkaitan perkara ini di *The National Archives* (TNA) dan merancang untuk membuat pembelian salinan rekod-rekod yang berkenaan.

2. Pembelian salinan rekod-rekod di TNA memerlukan perancangan rapi, lebih-lebih lagi kerana ia membabitkan kos yang tinggi. Arkib Negara Malaysia akan terus berusaha untuk mendapatkan peruntukan khusus untuk menjalankan penyelidikan dan pembelian salinan rekod berkaitan Pembentukan Malaysia dan Penjanjian Malaysia 1963 yang disimpan di TNA. Kumpulan rekod ini akan dapat mengisi jurang maklumat dan bahan sedia ada yang disimpan di Arkib Negara Malaysia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA, PARLIMEN KEEMPAT
BELAS TAHUN 2022**

PERTANYAAN : LISAN

**DARIPADA : PUAN MARIA CHIN BINTI ABDULLAH
(PETALING JAYA)**

TARIKH : 4 OGOS 2022 (KHAMIS)

SOALAN

PUAN MARIA CHIN BINTI ABDULLAH (PETALING JAYA) minta **MENTERI PERTANIAN DAN INDUSTRI MAKANAN** menyatakan apakah strategi dan pelan jangka masa panjang Kementerian bagi menangani keselamatan bekalan makanan seperti kemerosotan tanah yang subur, kehilangan biodiversiti dan peningkatan risiko pengeluaran pertanian tempatan akibat kesan perubahan iklim.

JAWAPAN

Tuan Yang di-Pertua,

Untuk makluman Ahli Yang Berhormat, sektor pertanian dan agromakanan memainkan peranan yang penting dalam memastikan sekuriti makanan negara terjamin. Walau bagaimanapun, terdapat beberapa isu dan cabaran yang dihadapi oleh sektor ini seperti kekurangan sumber asli yang melibatkan isu kemerosotan tanah, kehilangan biodiversiti serta perubahan iklim.

Kementerian Pertanian dan Industri Makanan (MAFI) melalui Dasar Agromakanan Negara 2021-2030 (DAN 2.0) telah merangka inisiatif dan pelan strategi dalam menghadapi isu dan cabaran tersebut di samping meningkatkan produktiviti pertanian seperti berikut:

- i. menggalakkan pemuliharaan biodiversiti dan sumber asli termasuk sumber air melalui pemerkasaan perancangan bagi pembangunan projek agromakanan di kawasan sensitif alam sekitar dan pengurusan perosak secara bersepadu atau dengan izin *Integrated Pest Management* (IPM), iaitu kawalan perosak secara biologi dengan penggunaan bahan kimia yang minimum;
- ii. memacu penerimgunaan amalan pertanian mampan yang lebih meluas dengan biosumber merentasi rantai nilai pengeluaran makanan, khususnya tanah pertanian, bagi tujuan menambah baik keselamatan makanan dan mengurangkan pencemaran alam sekitar dengan cara meningkatkan penerimgunaan pensijilan Skim Amalan Pertanian Baik Malaysia (MyGAP) dan Skim Pensijilan Organik Malaysia (myOrganic) bagi sektor tanaman, perikanan dan ternakan;
- iii. meningkatkan penggunaan teknologi dalam program pertanian bandar atau kebun komuniti di kalangan masyarakat yang dapat menghidupkan persekitaran dengan tanaman makanan menggunakan kaedah fertigasi atau dengan izin *Nutrient Film*

Technique (NFT) secara menegak (*vertical*) bagi memanfaatkan ruang;

- iv. melaksanakan penanaman dalam persekitaran terkawal (*Controlled Environment Farming*) seperti kilang tanaman (*plant factory*) di dalam bangunan dengan kawalan cahaya, suhu, kelembapan dan sebagainya mengikut keperluan tanaman;
- v. penggunaan baja organik dan mikroorganisma berfaedah (*effective microorganism*) yang lebih mesra alam dan bersifat semulajadi serta melaksanakan pengurusan *nutrient* lokasi spesifik (*soil profiling*) di kawasan jelapang padi bagi mengenal pasti dan membuat pengesyoran pembajaan mengikut status kesuburan tanah;
- vi. menggalakkan aktiviti mengkompos sisa tanaman untuk dijadikan baja organik dan digunakan semula untuk penanaman bagi mengurangkan pencemaran udara dan pelepasan karbon akibat daripada pembakaran sisa pertanian; dan
- vii. penggunaan sistem reban tertutup bagi industri unggas untuk mengurangkan masalah pencemaran bau dan air serta kaedah penternakan babi secara moden atau *Modern Pig Farming* (MPF) di mana aktiviti penternakan mestilah secara kandang tertutup dan mengamalkan pengurusan sisa kumbahan sifar.

Strategi-strategi ini turut disokong dengan penyediaan Pelan Tindakan Dasar Sekuriti Makanan Negara (DSMN) 2021-2025 yang memfokuskan kepada pengukuhan akta dan peraturan bagi menjamin kemampanan dan ketersediaan sumber semula jadi seperti tanah dan air yang memainkan peranan penting dalam aktiviti pertanian dan pengeluaran makanan negara.

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT, MESYUARAT KEDUA, PENGGAL KELIMA,
PARLIMEN KEEMPAT BELAS, TAHUN 2022**

PERTANYAAN : LISAN

**DARIPADA : TUAN CHARLES ANTHONY SANTIAGO
(KLANG)**

TARIKH : 4 OGOS 2022

SOALAN

TUAN CHARLES ANTHONY SANTIAGO (KLANG) minta **MENTERI PEMBANGUNAN WANITA, KELUARGA DAN MASYARAKAT** menyatakan apakah perancangan untuk mewujudkan undang-undang gangguan seksual yang lebih lengkap dan inklusif. Kementerian perlu memasukkan definisi komprehensif gangguan seksual, perlindungan terhadap penganiayaan, dan kewajipan organisasi untuk mencegah gangguan seksual.

JAWAPAN

Tuan Yang di-Pertua,

Kementerian Pembangunan Wanita, Keluarga dan Masyarakat (KPWKM) telah mengambil inisiatif untuk menggubal Rang Undang-Undang Antigangguan Seksual (RUU AGS) sebagai usaha menangani serta menghapuskan diskriminasi berasaskan gender terutamanya dalam soal gangguan seksual. RUU ini telah diluluskan di Dewan Rakyat pada 20 Julai 2022.

Penggubalan RUU AGS sebagai akta khusus berkaitan gangguan seksual adalah penting kerana ia dapat memberi mesej yang jelas bahawa Kerajaan amat prihatin terhadap isu gangguan seksual dan serius dalam menangani masalah ini. RUU AGS ini bertujuan untuk melengkapi perundangan dan polisi sedia ada berkenaan gangguan seksual di Malaysia. Tribunal bagi Antigangguan Seksual ditubuhkan sebagai forum alternatif untuk menyelesaikan aduan gangguan seksual secara sivil yang berfokuskan kepada pemberian remedi khusus (tebus rugi) kepada mangsa dengan murah, mudah dan cepat. Namun, bagi gangguan seksual yang bersifat jenayah seksual, kes boleh diadukan menerusi tatacara perundangan jenayah contohnya di bawah Kanun Keseksaan [Akta 574].

Takrifan yang digunakan di dalam RUU AGS ini diseragamkan dengan definisi yang digunakan di bawah Akta Kerja 1955 [Akta 265]. Sekiranya takrifan gangguan seksual ini diperluaskan sehingga *over define* (dengan izin) perkara ini dikhuatiri akan menyebabkan penyalahgunaan serta menyukarkan pelaksanaan RUU kelak.

Seperti mana yang dinyatakan di bawah peruntukan Fasal 2 RUU AGS, definisi gangguan seksual merangkumkan 3 elemen penting dan komprehensif iaitu:

- (i) apa-apa kelakuan tidak diingini yang bersifat seksual;
- (ii) dalam apa-apa bentuk, sama ada secara lisan, bukan lisan, visual, isyarat atau fizikal, yang ditujukan kepada seseorang;

- (iii) yang secara munasabahnya menyinggung atau menghina atau merupakan suatu ancaman kepada kesejahteraannya.

Elemen penganiayaan melibatkan skop yang sangat luas dan di luar bidang kuasa Tribunal. Hal ini kerana bidang kuasa Tribunal adalah spesifik iaitu untuk mendengar dan menentukan aduan gangguan seksual sahaja. Sekiranya elemen penganiayaan berlaku, ia boleh ditangani menerusi perundangan sedia ada, contohnya dalam konteks pekerjaan, ianya boleh ditangani di bawah Mahkamah Perusahaan atau sekiranya melibatkan ancaman atau ugutan yang bersifat jenayah, ianya boleh dirujuk kepada Kanun Keseksan [*Akta 574*].

Manakala bagi kewajipan organisasi pula, Fasal 25(1)(a) RUU AGS telah menyatakan suatu garis panduan berhubung pencegahan dan kesedaran mengenai gangguan seksual akan diwujudkan di bawah kuasa Pentadbir Antigangguan Seksual. Garis panduan ini akan menyatakan langkah khusus yang mesti diambil dalam usaha mencegah atau menangani gangguan seksual di organisasi masing-masing contohnya majikan, universiti, pengendali pengangkutan awam dan pentadbir organisasi lain. Selain itu, Pentadbir Antigangguan Seksual akan menjalankan aktiviti/program yang menggalakkan pencegahan atau kesedaran berhubung dengan gangguan seksual.

Saya mewakili Kementerian juga ingin mengucapkan terima kasih kepada Yang Berhormat sekalian atas sokongan ke atas RUU AGS ini dan semoga setiap niat dan tugas kita yang menjaga kumpulan sasar ini mendapat keberkatan dan balasan baik di sisi Allah SWT.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN CHONG CHIENG JEN [STAMPIN]

TARIKH : 04 OGOS 2022 (KHAMIS)

SOALAN

TUAN CHONG CHIENG JEN [STAMPIN] minta **MENTERI PELANCONGAN, SENI DAN BUDAYA** menyatakan bilangan pelancong dari negara asing yang melancong selepas pembukaan sempadan dan jumlah ini berbanding dengan tempoh yang sama dalam tahun 2019. Berikan jumlah dan negara asal pelancong-pelancong tersebut.

JAWAPAN

Tuan Yang di-Pertua,

1. Bagi suku pertama tahun 2022, Malaysia telah mencatatkan ketibaan seramai 98,053 orang pelancong asing dengan perbelanjaan pelancong asing sebanyak RM359.66juta. Untuk makluman, Malaysia telah menerima kehadiran seramai 6,696,230 orang pelancong asing dalam tempoh yang sama pada tahun 2019, iaitu sebelum penularan COVID-19 di seluruh dunia.

2. Sebagai perbandingan, pada suku pertama tahun 2022, negara-negara di seluruh dunia telah mencatatkan peningkatan ketibaan pelancong antarabangsa, dengan pergerakan seramai 76 juta orang pelancong antarabangsa, di mana 47 juta daripadanya dicatatkan pada bulan Mac 2022 sahaja. Walau bagaimanapun prestasi ini masih lagi pengurangan sebanyak 61% jika dibandingkan dengan prestasi paras pra-pandemik pada tahun 2019. Prestasi ini dijangka akan bertambah baik pada tahun hadapan berdasarkan laporan Pertubuhan Pelancongan Dunia (*United Nation World Tourism Organisation* - UNWTO) yang meramalkan bahawa industri pelancongan bagi negara-negara di rantau Asia Pasifik dijangka akan bertambah pulih pada tahun 2023.

3. Statistik lima (5) negara teratas yang menyumbang kepada kehadiran bilangan pelancong asing ke Malaysia bagi suku pertama tahun 2022 ialah Singapura dengan 29,130 orang, Thailand dengan 23,045 orang, Indonesia dengan 6,945 orang, China dengan 3,624 orang dan Pakistan dengan 3,845 orang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : DATUK SERI PANGlima HAJI MOHD
SHAFIE BIN HAJI APDAL [SEMPORNA]
TARIKH : 04 OGOS 2022 (KHAMIS)

SOALAN

DATUK SERI PANGlima HAJI MOHD SHAFIE BIN HAJI APDAL [SEMPORNA] minta **MENTERI KEWANGAN** menyatakan :-

- (a) adakah sasaran inflasi 2.3-3.3 peratus pada tahun ini masih relevan apabila Kerajaan memulakan langkah rasionalisasi subsidi atau subsidi bersasar; dan
- (b) nyatakan mekanisme subsidi bersasar yang akan dilaksanakan kelak.

JAWAPAN

Tuan Yang di-Pertua,

Jangkaan kadar inflasi Malaysia bagi tahun 2022 kekal di antara 2.2 peratus hingga 3.2 peratus. Sebagai makluman, kadar inflasi bagi tempoh Januari hingga Jun 2022 adalah pada 2.5 peratus.

Negara Malaysia masih menikmati kadar inflasi yang jauh lebih rendah berbanding negara lain kerana Kerajaan masih kekal pelaksanaan subsidi serta kawalan harga barangan asas. Kerajaan komited untuk memastikan rakyat Malaysia dilindungi daripada kesan penuh kenaikan harga komoditi dan makanan di peringkat global dan tidak menghadapi kenaikan harga secara mendadak. Dengan itu, jika dilaksanakan rasionalisasi subsidi, ianya akan dilaksanakan dengan berperingkat dan tidak akan menjejaskan jangkaan inflasi bagi tahun 2022.

Tuan Yang di-Pertua,

Kerajaan sedang mengkaji pelaksanaan subsidi secara bersasar bagi membantu golongan yang benar-benar memerlukan serta mengurangkan ketirisan yang berlaku. Kerajaan akan mengkaji semula mekanisme pemberian subsidi petrol, diesel dan LPG supaya dapat dilaksanakan dengan lebih bersasar serta menumpukan bantuan dan subsidi kepada golongan mudah terjejas dan mereka yang benar-benar memerlukan bantuan. Pelaksanaan subsidi secara bersasar dijangka dapat mengoptimumkan sumber kewangan Kerajaan dan penjimatan yang dicapai dapat diagihkan semula untuk program yang menyumbang kepada kesejahteraan rakyat.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : PUAN KASTHURIRAANI A/P PATTO
[BATU KAWAN]**

TARIKH : 04 OGOS 2022 (KHAMIS)

SOALAN

PUAN KASTHURIRAANI A/P PATTO [BATU KAWAN] minta **MENTERI KANAN PENDIDIKAN** menyatakan senarai nama dan status semua Sekolah Jenis Kebangsaan Tamil (SJKT) di bawah Pakej Pembangunan - Rangsangan Khas, Pelan Sekolah Baharu dan Pelan “Rolling/Development Expenditure” sejak tahun 2013, kos pembangunan serta apakah jalan penyelesaian agar sekolah-sekolah ini siap dibina untuk keselamatan dan keselesaan pelajar dan guru dan apakah status pembinaan sekolah SJKT Sungai Bakap di Pulau Pinang yang sudah tergendala masa ini.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam menyediakan ruang yang selesa dan kondusif bagi tujuan pengajaran dan pembelajaran (PdP) di semua jenis sekolah bawah KPM, termasuk di sekolah jenis kebangsaan Tamil (SJKT) berstatus sekolah kerajaan (SK).

Untuk makluman Ahli Yang Berhormat, di bawah Pakej Rangsangan Khas (PRK) tahun 2012, sebanyak 37 buah SJKT berstatus sekolah bantuan kerajaan (SBK) telah diluluskan dengan kos asal projek sebanyak RM150 juta untuk membina sekolah baharu dan blok tambahan. Walau

bagaimanapun, Kementerian Kewangan (MoF) telah menambah peruntukan sebanyak RM50.6 juta pada Januari 2018, menjadikan jumlah keseluruhan projek adalah RM200.6 juta.

Memandangkan peruntukan untuk menyiapkan projek yang telah diluluskan tidak mencukupi, KPM telah mengemukakan permohonan kepada MoF untuk penambahan peruntukan berjumlah RM17.1 juta pada 1 Mac 2019, dan telah diluluskan oleh MoF pada 25 Mac 2019. Ini menjadikan jumlah keseluruhan peruntukan pelaksanaan projek di bawah PRK 2012 adalah berjumlah RM217.7 juta.

Daripada jumlah 37 buah SJKT tersebut, sebanyak 21 buah sekolah telah siap dan telah dikeluarkan Sijil Perakuan Siap Kerja (Certificate of Practical Completion - CPC). Manakala, lima buah sekolah lagi telah siap pembinaan dan dalam peringkat pembaikan kecacatan oleh kontraktor sebelum sijil CPC boleh dikeluarkan. Seterusnya, lapan buah sekolah lagi berada dalam peringkat akhir pembinaan dengan kemajuan kerja di antara 97 peratus hingga 99 peratus.

Baki lagi tiga buah sekolah yang melibatkan sebuah sekolah dalam proses penamatan khidmat kontraktor kerana gagal menjalankan kerja di tapak dan dua buah sekolah dibatalkan kerana lembaga pengelola sekolah (LPS) gagal menyelesaikan isu tanah. Di bawah peruntukan pembangunan (DE) pula telah diluluskan sebanyak 13 projek pembinaan baharu serta tambahan dan gantian blok dengan kos projek sebanyak RM214.84 juta. Sehingga 6 Julai 2022, sebanyak tujuh projek telah siap pembinaan, empat projek dalam peringkat pembinaan dan dua projek lagi dalam peringkat pra bina.

Berhubung SJKT Sungai Bakap di Pulau Pinang yang berstatus SBK, KPM telah menyalurkan waran peruntukan berjumlah RM3.5 juta pada 16 Disember 2015 sebagai bantuan pembinaan sekolah seperti mana yang telah diluluskan. Pembangunan dan pembinaan projek di sekolah ini adalah di bawah tanggungjawab pihak lembaga pengelola sekolah (LPS) termasuk aspek pelantikan kontraktor dan pemantauan pelaksanaan projek.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN KHOO POAY TIONG [KOTA MELAKA]

TARIKH : 04 OGOS 2022 (KHAMIS)

SOALAN

TUAN KHOO POAY TIONG [KOTA MELAKA] minta **MENTERI PELANCONGAN, SENI DAN BUDAYA** menyatakan :-

- (a) apakah status terkini pelaksanaan dan perbelanjaan Pelan Pemulihan Pelancongan sepertimana yang telah diperuntukkan dalam Belanjawan 2022; dan
- (b) apakah intipati dan rasional Rangka Kerja Pemulihan Pelancongan 2.0 yang dilancarkan oleh Kementerian baru-baru ini.

JAWAPAN

Tuan Yang di-Pertua,

1. Di bawah Pelan Pemulihan Pelancongan 2022, Kementerian Pelancongan, Seni dan Budaya (MOTAC) telah diperuntukkan RM230juta bagi melaksanakan insentif dan inisiatif seperti bantuan khas tunai, geran padanan bagi tujuan pembaikan hotel bajet dan inap desa (*homestay*), geran padanan sektor pelancongan dan kebudayaan, dana galakan bagi aktiviti promosi dan pelancongan domestik. Daripada jumlah tersebut, sehingga Julai 2022, sebanyak RM130.46juta telah dibelanjakan. Antara peruntukan yang telah disalurkan adalah:

- (i) penyaluran Bantuan Khas Tunai sebanyak RM53.67juta kepada lebih 18 ribu pengusaha pelancongan dan kebudayaan yang berlesen dan berdaftar dengan MOTAC bertujuan meringankan

beban kewangan dan memastikan kelangsungan pengoperasian perniagaan mereka;

- (ii) penawaran Geran Padanan Bagi Tujuan Pembaikan Hotel Bajet dan Inap Desa (Homestay) bertujuan membantu membaik pulih hotel bajet dan inap desa agar kemudahan yang ditawarkan sentiasa berada pada tahap yang berkualiti. Bagi inap desa, lebih 570 permohonan dengan nilai sebanyak RM3.7juta telah diluluskan manakala bagi pembaikan hotel bajet, sebanyak RM1.38juta nilai permohonan telah diluluskan yang bakal memanfaatkan lebih 60 hotel bajet;
- (iii) menawarkan Geran Padanan Sektor Pelancongan dan Kebudayaan. Sehingga Jun 2022, lebih 130 permohonan yang telah diluluskan dengan nilai sebanyak lebih RM23juta bagi penganjuran program/acara/aktiviti berkaitan pelancongan, seni dan budaya;
- (iv) menawarkan baucar diskaun/rebat bagi produk pelancongan dan kebudayaan. Sehingga Julai 2022, lebih RM6.2juta nilai baucar telah ditebus bagi pembelian produk kraf, seni visual, serta buku dan penerbitan dengan nilai jualan produk melebihi RM19juta. Manakala sebanyak RM4.4juta nilai baucar telah ditawarkan bagi pakej pelancongan, minat khas dan pengangkutan darat; dan
- (v) membelanjakan sebanyak RM28.5juta di bawah dana galakan bagi aktiviti promosi dan pengiklanan seperti pengiklanan dan digital, domestik dan acara, pembangunan pakej, produksi serta penganjuran acara-acara menyokong pelancongan Islam.

2. MOTAC telah merangka Pelan Pemulihan Pelancongan atau *Tourism Recovery Plan* (TRP) 1.0 semasa Perintah Kawalan Pergerakan (PKP) diumumkan bermula Mac 2020. Pelaksanaan TRP1.0 pada tahun 2020 dan 2021 ini tertumpu pada kelangsungan (*survivability*) dan pembukaan semula (*reopening*) industri pelancongan terutamanya dari segi bantuan dan usaha-usaha untuk membuka sempadan negara melalui pelaksanaan gelembung pelancongan.

SOALAN NO : 82

3. Demi meneruskan momentum pemulihan, MOTAC telah menilai semula dan menambah baik TRP 1.0 dan melancarkan Rangka Kerja Pemulihan Pelancongan 2.0 atau TRF 2.0 pada 21 Jun 2022. TRF 2.0 menggariskan rangka kerja atau inisiatif jangka pendek dan sederhana MOTAC untuk memperkukuhkan pemulihan dan mengembalikan daya saing global industri pelancongan menerusi strategi-strategi yang boleh meningkatkan kemampanan dan daya tahan industri dalam menghadapi ketidaktentuan masa depan. Rangka kerja ini telah menggariskan lima (5) tonggak strategik iaitu:

- (i) Menyokong pemulihan perniagaan pelancongan dan kebudayaan;
- (ii) Memulihkan keyakinan pelancong dan perjalanan antarabangsa dan intra-rantau yang lancar;
- (iii) Mencipta semula produk/perkhidmatan pelancongan dan kebudayaan bagi memacu daya saing;
- (iv) Menyelaraskan pelancongan dengan kemampanan dan keterangkuman; dan
- (v) Memperkukuh pemulihan dengan ketahanan jangka panjang dan kesediaan menghadapi krisis.

Sekian, terima kasih.

**PEMBERITAHUAN PERTANYAAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : DATO' MASIR KUJAT [SRI AMAN]

TARIKH : 4 OGOS 2022 (KHAMIS)

SOALAN

Dato' Masir Kujat [Sri Aman] minta **MENTERI KOMUNIKASI DAN MULTIMEDIA** menyatakan sama ada Kementerian akan melaksanakan kemudahan asas infrastruktur untuk program 5G/Internet terutama sekali kawasan luar bandar seperti Sri Aman Sarawak selepas pelancaran Measat 3d baru-baru ini.

JAWAPAN

Tuan Yang di-Pertua,

Pelaksanaan pembangunan rangkaian 5G di negeri Sarawak telah bermula pada suku kedua tahun 2022. Sebanyak 339 tapak 5G dirancang untuk dibangunkan di daerah Kuching dan Miri. Sehingga 4 Julai 2022, sebanyak 15 tapak telah siap dibangunkan dan kerja-kerja pembangunan rangkaian 5G sedang giat dijalankan di negeri Sarawak.

MEASAT-3d yang dilancarkan pada 23 Jun 2022 di Kourou, French Guiana, Amerika Selatan merupakan sebuah satelit yang dibangunkan oleh MEASAT bagi tujuan penyiaran dan komunikasi jalur lebar. Perkhidmatan jalur lebar menggunakan teknologi satelit merupakan alternatif bagi kawasan-kawasan yang kurang atau tiada infrastruktur komunikasi sedia ada.

Keupayaan satelit MEASAT-3d tersebut serta sambungan internet jalur lebar berdasarkan satelit akan membantu Kerajaan mencapai matlamat pelan Jalinan Digital Negara (JENDELA) yang bertujuan meningkatkan ketersambungan digital dan mencapai sepenuhnya 100% liputan Internet di Malaysia menjelang penghujung tahun 2025.

Dengan adanya satelit MEASAT-3d, penyedia perkhidmatan komunikasi dapat memanfaatkan keupayaan satelit MEASAT-3d untuk memperkenalkan perkhidmatan baru untuk penduduk yang tidak mempunyai liputan secukupnya. Kerajaan turut akan memperbanyakkan infrastruktur yang membolehkan penduduk di kawasan terpencil meraih manfaat sambungan Internet berkelajuan tinggi.

Walau bagaimanapun, penggunaan teknologi satelit untuk rangkaian 5G masih dalam peringkat penilaian dan belum dimuktamadkan oleh pihak *The 3rd Generation Partnership Project* (3GPP). 3GPP merupakan sebuah organisasi antarabangsa yang membangunkan spesifikasi teknikal standard bagi kegunaan rangkaian 5G.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' DR. XAVIER JAYAKUMAR A/L
ARULANANDAM (KUALA LANGAT)**

TARIKH : 4 OGOS 2022 (KHAMIS)

SOALAN

DATO' DR. XAVIER JAYAKUMAR A/L ARULANANDAM (KUALA LANGAT) minta **MENTERI TENAGA DAN SUMBER ASLI** menyatakan status terkini dalam usaha pengeluaran REE (Unsur Nadir Bumi) dan juga langkah-langkah diambil untuk pembangunan industri REE.

JAWAPAN

Tuan Yang Dipertua,

1. Pada masa ini, pelaksanaan Projek Perintis Perlombongan Unsur Nadir Bumi Bukan Radioaktif (NR-REE) di Mukim Kenering, Daerah Hulu Perak yang merupakan projek perlombongan NR-REE yang pertama di Malaysia telah mendapat kelulusan daripada agensi-agensi teknikal yang terlibat. Kelulusan-kelulusan tersebut adalah seperti Laporan Penilaian Kesan Kepada Alam Sekeliling (EIA) yang diluluskan oleh Jabatan Alam Sekitar (JAS) pada 11 Mei 2022, kelulusan Skim Pengendalian Melombong (OMS) oleh Jabatan Mineral dan Geosains (JMG) pada 26 Mei 2022 dan kelulusan Kebenaran Merancang (KM) oleh Majlis Daerah Gerik pada 7 Jun 2022.
2. Walaupun kelulusan-kelulusan telah diperolehi, sehingga kini projek tersebut masih belum menjalankan sebarang aktiviti perlombongan. Hal ini kerana, pada masa ini pihak pengusaha lombong tersebut masih perlu menjalankan kerja-kerja pembangunan infrastruktur di kawasan tapak tersebut sebelum aktiviti perlombongan NR-REE boleh dijalankan. Berdasarkan perancangan, aktiviti perlombongan secara perintis dijangka dapat dimulakan seawal bulan Ogos 2022 dan hasil pertama dijangka dapat dikeluarkan pada bulan November 2022.
3. Bagi memastikan aktiviti perlombongan khususnya di tapak projek perintis tersebut dijalankan secara bertanggung jawab dan mampan, pihak Kementerian telah menyediakan dokumen Prosedur Operasi Standard (SOP) Perlombongan Unsur Nadir Bumi Bukan Radioaktif (NR-REE) Negeri Perak. Pemakaian SOP ini di peringkat Kerajaan Persekutuan dan Kerajaan Negeri Perak sebagai panduan bagi mengawal selia aktiviti perlombongan NR-REE di Negeri Perak khususnya di tapak projek perintis telah dimuktamadkan.
4. SOP ini telah disemak dan dinilai oleh satu Jawatankuasa Eksekutif yang terdiri daripada individu yang mempunyai pengetahuan dan kepakaran dalam bidang berkaitan. Ia menggariskan aspek-aspek yang perlu dipatuhi di peringkat pra-perlombongan, semasa perlombongan dan

pasca-perlombongan. Sekiranya Kerajaan mendapati SOP ini mampu mengawal selia aktiviti perlombongan dengan baik dan memberikan kesan yang minimum kepada alam sekitar, Kementerian akan memperluaskan pemakaiannya ke negeri-negeri lain bagi membolehkan aktiviti perlombongan NR-REE dijalankan.

5. Mengenai langkah yang diambil bagi membangunkan industri NR-REE ini, saya ingin menegaskan bahawa Kementerian amat komited dalam memastikan pembangunan industri ini dibangunkan secara bertanggungjawab dan mampan. Kementerian mensasarkan industri ini dibangunkan secara menyeluruh melalui pewujudan industri NR-REE di setiap peringkat rantai nilai yang bermula dari peringkat hulu hingga hiliran. Usaha Kerajaan dalam membangunkan peringkat hulu telah dinyatakan sebelum ini dengan memastikan aktiviti perlombongan NR-REE dijalankan mengikut prosedur yang telah ditetapkan dalam dokumen SOP Perlombongan NR-REE.

6. Bagi pembangunan industri NR-REE di peringkat pertengahan, Kementerian telah membentangkan cadangan konseptual pembangunan loji pemprosesan terpusat (*Centralised Processing Plant* - CPP) dalam mesyuarat bersama Kerajaan Negeri Perak pada 18 November 2021. Antara perkara yang diberikan perhatian dalam cadangan tersebut adalah dari aspek skala pelaburan untuk pembangunan CPP, perolehan teknologi pemprosesan, parameter ekonomi dan sokongan penyelidikan dan pembangunan (R&D), yang perlu diberi pertimbangan sekiranya CPP ingin dibangunkan.

7. Di samping itu juga, kementerian turut mengadakan sesi libat urus bersama agensi Lembaga Pembangunan Pelaburan Malaysia (MIDA) dan Bahagian Perancang Ekonomi Negeri Perak (BPEN) berhubung cadangan insentif yang boleh diperkenalkan sekiranya CPP ini dibangunkan.

8. Langkah-langkah ini bertujuan membantu pencapaian objektif Kementerian bagi membangunkan industri NR-REE secara menyeluruh dari peringkat hulu hingga ke peringkat hiliran. Ini juga bagi mengelakkan sumber NR-REE dieksport secara mentah ke luar negara

dan menggalakkan ia diproses bagi mendapatkan nilai tambah yang tinggi. Namun demikian, harus diakui bahawa, pada masa ini kepakaran untuk membangunkan CPP masih belum terdapat di Malaysia.

9. Memandangkan industri NR-REE ini merupakan industri baharu yang bakal dibangunkan di Malaysia, Kementerian sedang berusaha untuk mengumpulkan data dan maklumat yang lengkap berhubung keseluruhan ekosistem pembangunan industri NR-REE ini. Bagi tujuan tersebut, Kementerian telah mengambil inisiatif dengan melantik pihak Akademik Sains Malaysia (ASM) untuk menjalankan kajian cadangan model perniagaan (*business model*) pembangunan industri NR-REE di Malaysia. Kajian ini akan memberi kefahaman yang jelas terhadap keseluruhan ekosistem industri NR-REE yang bakal dibangunkan, di mana penghasilan dokumen ini boleh dijadikan rujukan dan panduan kepada semua pihak khususnya bagi pihak kerajaan dan pemain industri dalam membangunkan industri NR-REE.

Sekian, terima kasih.

**PEMBERITAHUAN PERTANYAAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN SYED IBRAHIM BIN SYED NOH
[LEDANG]**

TARIKH : 4 OGOS 2022 (KHAMIS)

SOALAN

Tuan Syed Ibrahim bin Syed Noh [Ledang] minta **MENTERI KOMUNIKASI DAN MULTIMEDIA** menyatakan secara terperinci berkenaan perkembangan inisiatif 5G dan manfaat kepada sektor ekonomi yang telah dibawa sehingga tahap perkembangan terkini.

JAWAPAN

Tuan Yang di-Pertua,

Pelaksanaan 5G telah dipercepatkan setahun lebih awal dan telah dilancarkan pada bulan Disember 2021. Sehingga 4 Julai 2022, Digital Nasional Berhad (DNB) telah menyiapkan sebanyak 1,506 tapak dan liputan 5G telah mencapai 27% kawasan berpenduduk di seluruh negara. Jumlah langganan perkhidmatan 5G juga dianggarkan telah mencecah 250,000 langganan. DNB menyasarkan kira-kira 4,000 tapak untuk disiapkan menjelang akhir tahun ini dan akan meliputi kawasan Lembah Klang dan bandar-bandar utama di Johor, Melaka, Negeri Sembilan, Perak, Pulau Pinang, Sabah dan Sarawak.

Pelaksanaan 5G merupakan sebahagian daripada Rancangan Malaysia Ke-12 (2021-2025) dan MyDigital, untuk memastikan Malaysia mencapai aspirasi menjadi sebuah negara berpendapatan tinggi yang berpacuan teknologi dan pendigitalan serta sebagai peneraju serantau dalam ekonomi digital.

Berdasarkan hasil dapatan daripada pihak Ernst & Young yang bertajuk *“Estimating economic impact of the Single Wholesale 5G Network in Malaysia”* yang diterbitkan pada November 2021, potensi perkhidmatan 5G terhadap impak ekonomi negara menerusi peningkatan Keluaran Dalam Negara Kasar (KDNK) kumulatif adalah sebanyak RM650 bilion dalam tempoh 10 tahun akan datang, dengan RM150 bilion pada tahun 2031 sahaja. Selain itu, sebanyak 750,000 peluang pekerjaan berkemahiran tinggi baharu akan diwujudkan menjelang 2030 dan akan menjadi satu kelebihan buat Malaysia berbanding negara-negara jiran.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : DATUK DR. HASAN BIN BAHROM [TAMPIN]

TARIKH : 04 OGOS 2022 (KHAMIS)

SOALAN

DATUK DR. HASAN BIN BAHROM [TAMPIN] minta **MENTERI KANAN PENDIDIKAN** menyatakan persediaan para guru mendepani sistem pendidikan yang sering kali berubah-ubah. Apakah Kementerian ada mekanisme yang tuntas dalam menangani permasalahan tersebut dan apakah dalam pengetahuan Kementerian faktor pencen awal dalam kalangan guru kesan dari sistem pendidikan yang selalu berubah.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa cakna akan perubahan persekitaran yang memerlukan penambahbaikan sistem pendidikan bagi memastikan keberhasilan murid untuk menerajui pembangunan ekonomi dan dunia global masa hadapan. KPM sentiasa menambah baik sistem pendidikan berpandukan Pelan Pembangunan Pendidikan Malaysia (PPPM) 2013-2025.

Pelan ini dibangunkan dengan mengambil kira input daripada pelbagai sumber relevan, peningkatan standard pendidikan antarabangsa, aspirasi negara, harapan ibu bapa dan masyarakat terhadap dasar pendidikan serta pakar pendidikan dari *United Nations Educational, Scientific and Cultural Organization* (UNESCO), *Organisation for Economic Co-operation and*

Development (OECD) dan Bank Dunia, berdasarkan Falsafah Pendidikan Kebangsaan yang menjadi teras dalam perancangan pendidikan yang komprehensif dan holistik.

Untuk makluman Ahli Yang Berhormat, berdasarkan rekod KPM, jumlah guru yang bersara awal pada tahun 2021 adalah seramai 4,389 orang atau 1.06 peratus daripada jumlah keseluruhan pengisian guru pada 1 Januari 2021. Manakala bagi tahun 2020, guru bersara awal adalah seramai 4,212 atau 1.01 peratus. Secara purata, peratusan guru yang bersara pilihan untuk tahun 2017 hingga 2021 adalah 0.99 peratus daripada jumlah keseluruhan pengisian guru pada 1 Januari tahun-tahun tersebut.

Dalam konteks pembangunan kerjaya, KPM menyediakan peluang pembangunan profesionalisme kepada guru bagi memastikan guru sentiasa bersedia serta bermotivasi dalam menjalankan tugas dan berusaha meningkatkan kualiti perkhidmatan masing-masing. Ini termasuk memberi pendedahan tentang deskripsi tugas guru akademik di sekolah serta latihan dan bimbingan yang berterusan kepada guru dalam mendukung pelaksanaan dasar pendidikan semasa, termasuk melengkapkan guru dengan kemahiran dalam aspek pendigitalan pendidikan bagi mendepani sistem pendidikan abad ke-21.

Di samping itu, KPM juga menyediakan latihan dalam meningkatkan kesejahteraan psikologi untuk memberikan kemahiran pengurusan emosi, kawalan diri dan amalan harian yang positif berdasarkan tahap kesejahteraan psikologi yang dinilai melalui Inventori Kesejahteraan Psikologi (IKPsi).

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : PUAN TERESA KOK SUH SIM [SEPUTEH]

TARIKH : 04 OGOS 2022 (KHAMIS)

SOALAN

PUAN TERESA KOK SUH SIM [SEPUTEH] minta **MENTERI KANAN PENDIDIKAN** menyatakan apakah status terkini perebutan undang-undang di antara Kementerian Pendidikan dan kontraktor terhadap Sekolah Kebangsaan Danau Perdana di Taman Desa yang telah terbengkalai lebih 17 tahun. Apakah Kementerian mempunyai rancangan untuk menyelesaikan masalah ini di luar mahkamah dan membina semula sekolah ini dalam tempoh terdekat.

JAWAPAN

Tuan Yang di-Pertua,

Untuk makluman Ahli Yang Berhormat, pada April 2015, pihak Jabatan Kerja Raya (JKR) telah mengadakan lawatan pemeriksaan di tapak dan telah membuat analisis bagi menyediakan laporan kajian keretakan bangunan bagi melihat hala tuju dan penyelesaian bagi isu ini. Laporan lengkap telah diperoleh daripada pihak JKR pada 30 Jun 2015.

Berdasarkan laporan tersebut, pada April 2016, KPM telah bersetuju untuk membuat tuntutan ganti rugi kepada pihak kontraktor yang telah dilantik iaitu Dewan Perniagaan Melayu Malaysia Kuala Lumpur (DPMMKL) dan telah melantik penimbang tara (*arbitrator*) untuk tujuan berkenaan. Walau bagaimanapun, prosiding timbang tara berhubung isu tuntutan kuantum ganti rugi tidak dapat dimuktamadkan berikutan isu dokumentasi yang tidak dapat diselesaikan.

Sehubungan itu, pada 14 Ogos 2018, KPM telah mengadakan mesyuarat bersama pihak Jabatan Peguam Negara (AGC) bagi membincangkan isu tuntutan ganti rugi yang layak dituntut oleh KPM terhadap kontraktor DPMMKL. Pada Disember 2020, satu jawatankuasa rundingan bagi menyelesaikan kes ini di luar Tribunal Timbang Tara telah ditubuhkan.

Namun, disebabkan kekangan situasi semasa termasuk pandemik COVID-19 dalam tempoh berkenaan, KPM menghadapi kesukaran untuk mengumpul maklumat dan mengadakan rundingan. Pada 23 November 2021, mesyuarat pra rundingan di peringkat KPM telah diadakan sebagai persediaan kepada jawatankuasa rundingan. Melalui mesyuarat tersebut, terdapat keperluan untuk mengumpul dan menyemak semula fail-fail lama projek daripada projek mula dilaksanakan sebagai bahan dokumentasi rujukan perundangan dan teknikal. Justeru, KPM telah mengadakan mesyuarat pra rundingan kali kedua pada 29 Julai 2022. Jawatankuasa rundingan bersama DPMMKL dijangka akan diadakan pada September 2022.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN LIM GUAN ENG [BAGAN]
TARIKH : 04 OGOS 2022 (KHAMIS)

SOALAN

TUAN LIM GUAN ENG [BAGAN] minta **MENTERI KEWANGAN** menyatakan impak kos sara hidup yang tinggi, pemansuhan import AP untuk makanan, kekurangan pekerja asing yang serius dan rantai bekalan yang terputus ke atas kadar harga naik dan inflasi. Sejauh manakah perbelanjaan suntikan RM45 bilion kepada rakyat dan perniagaan yang dipersetujui dalam MOU di antara Perdana Menteri dan pemimpin PH.

JAWAPAN

Tuan Yang di-Pertua,

Dari sudut kadar inflasi, tekanan inflasi pada tahun 2022 merupakan fenomena global selaras dengan harga minyak mentah Brent yang kekal melebihi USD100 setong semenjak hujung Mac 2022. Gangguan rantai bekalan dunia yang telah menjejaskan bekalan baja dan makanan ternakan juga telah meningkatkan harga makanan dengan mendadak. Sebagai sebuah ekonomi yang terbuka, Malaysia tidak terkecuali daripada tekanan inflasi global. Ini bermakna, kenaikan harga barangan sukar untuk dielakkan sepenuhnya.

Kadar inflasi di Malaysia pada bulan Jun 2022 mencatat 3.4 peratus manakala pada bulan yang sama, kadar inflasi di beberapa negara seperti Amerika Syarikat dan United Kingdom mencecah 9 peratus, Thailand melebihi 7 peratus, serta Singapura dan Filipina melebihi 6 peratus. Kerajaan sentiasa prihatin terhadap peningkatan kadar inflasi yang menimbulkan keresahan di kalangan rakyat dan perniagaan serta terus memantau perkembangan ekonomi global semasa.

Bagi tempoh Januari hingga Jun 2022, kadar inflasi Malaysia hanya pada 2.5% iaitu terkawal dan sederhana berbanding negara lain hasil daripada langkah Kerajaan meneruskan dan menambahbaik subsidi barangan asas bersama dengan langkah kawalan harga. Barangan asas dan perkhidmatan terpilih yang diliputi termasuk pemberian subsidi harga bahan api dan makanan terpilih serta rebat elektrik untuk pengguna domestik.

Tuan Yang di-Pertua,

Pemansuhan *Approved Permit* (AP) iaitu kelulusan kuota import dan kebenaran mengimport bagi komoditi agromakanan tertentu iaitu kubis bulat, kelapa tua biji, ayam (keratan ayam dan ayam bulat) dan susu cair bertujuan untuk membantu memastikan kelangsungan sektor agromakanan di setiap peringkat rantai makanan dan rakyat terus

mendapat bekalan makanan yang mencukupi, selamat dimakan serta berkhasiat. Dalam jangka pendek, langkah ini membantu mengurangkan tekanan ke atas harga semasa melalui peningkatan penawaran bekalan dalam pasaran dan juga dijangka dapat sekaligus mengawal impak peningkatan kos sara hidup terutamanya kepada kumpulan mudah terjejas.

Tuan Yang di-Pertua,

Pekerja asing terus memainkan peranan penting dalam pembangunan ekonomi negara. Namun, Kerajaan juga akan sentiasa memastikan pengambilan pekerja asing khususnya pekerja asing berkemahiran rendah adalah berdasarkan kepada keperluan sebenar sektor ekonomi. Langkah ini bagi memastikan lebih banyak peluang pekerjaan diberikan kepada guna tenaga tempatan selain dapat menggalakkan industri untuk beralih kepada automasi dan nilai ditambah tinggi dalam aktiviti pengeluaran.

Semasa tempoh pandemik, Kerajaan telah memutuskan supaya pengambilan pekerja asing baharu dihentikan buat sementara waktu bagi mengekang penularan COVID-19. Walau bagaimanapun, majikan dalam sektor pembinaan, pembuatan, perladangan dan pertanian dibenarkan untuk menggaji pendatang asing tanpa izin (PATI) di bawah program rekalibrasi bagi memastikan ekonomi dapat terus beroperasi. Selain itu, majikan juga dibenarkan untuk menggaji pekerja asing berdaftar yang sah di bawah program pertukaran majikan untuk memastikan sektor-sektor ekonomi tertentu tidak mengalami masalah kekurangan pekerja.

Selaras dengan peralihan kepada fasa endemik dan pembukaan semula aktiviti ekonomi sepenuhnya serta pembukaan sempadan, Kerajaan mengambil langkah untuk membolehkan pengambilan pekerja asing mengikut keperluan, terutamanya untuk sektor seperti perladangan dan pertanian bagi memastikan momentum pertumbuhan ekonomi disokong dan kelangsungan bekalan makanan.

Tuan Yang di-Pertua,

Kadar inflasi semasa sememangnya memberi tekanan terutamanya kepada kumpulan mudah terjejas. Pelbagai langkah telah dilaksanakan oleh Kerajaan bagi membantu mengawal peningkatan harga barang dan mengurangkan beban kewangan isi rumah. Antara langkah tersebut adalah:

- a. mewajibkan tanda harga barang dan senarai harga pada barang yang dipamerkan untuk jualan;
- b. menerbitkan data mengenai harga barangan tertentu bagi membantu pengguna membuat perbandingan harga sebelum membeli barangan;
- c. melaksanakan Skim Harga Maksimum Musim Perayaan bagi memastikan harga barang keperluan asas tidak naik mendadak semasa musim perayaan; dan
- d. pengenaan harga siling bagi produk makanan tertentu

Selain itu, kebijaksanaan pengguna juga boleh membantu menangani kenaikan kos sara hidup. Pengguna sentiasa boleh membuat perbandingan harga dan membeli di kedai yang menjual barangan padaharga yang berpatutan. Di samping itu, Kerajaan juga boleh mengambil tindakan ke atas peniaga yang melakukan pencatutan harga. Selain itu, usaha untuk meningkatkan pengeluaran dan produktiviti hasil pertanian tempatan akan diteruskan. Antara langkah lain yang telah dan sedang dilaksanakan oleh Kerajaan bagi membantu mengurangkan kesan kenaikan harga ke atas perbelanjaan isi rumah adalah seperti berikut:

- a. meningkatkan liputan dan kualiti pengangkutan awam di bandar mahupun di kawasan luar bandar;
- b. menanggung sebahagian besar kos persekolahan di sekolah Kerajaan dan memberikan pelbagai bantuan persekolahan kepada pelajar sekolah;
- c. menanggung sebahagian besar daripada kos pengajian di institusi pengajian tinggi awam;
- d. memberi pelbagai pinjaman dan biasiswa untuk melanjutkan pelajaran ke institusi pengajian tinggi awam atau swasta;

- e. meningkatkan kualiti perkhidmatan penjagaan kesihatan di hospital dan klinik Kerajaan dengan sebahagian besar kos ditanggung oleh Kerajaan;
- f. meningkatkan bilangan rumah mampu milik; dan
- g. memberi pelbagai pelepasan cukai kepada pembayar cukai individu termasuklah kumpulan M40

Tuan Yang di-Pertua,

Sebagaimana sedia maklum, pindaan kepada Akta 830 Langkah-Langkah Sementara Bagi Pembiayaan Kerajaan (Penyakit Koronavirus 2019 (COVID-19)) 2020 telah diluluskan melalui Akta A1635 Pindaan 2021 untuk meningkatkan peruntukan Kumpulan Wang COVID-19 seperti berikut:

- a. (KWC-19) dari RM65 bilion kepada RM110 bilion;
- b. Daripada keseluruhan RM110 bilion, setakat 30 Jun 2022, sebanyak RM85.2 bilion atau 77.5% telah dibelanjakan dan telah memanfaatkan kira-kira 20 juta rakyat Malaysia serta 2.4 juta perniagaan. Masih terdapat inisiatif yang masih berjalan dan akan tamat pada hujung tahun 2022. Perbelanjaan ini merangkumi perbelanjaan-perbelanjaan utama antaranya:
 - i. Program subsidi upah, insentif pengekalan pekerjaan dan pengambilan pekerja dan latihan kemahiran dan peningkatan kemahiran sebanyak RM24.5 bilion;
 - ii. Bantuan tunai kepada rakyat merangkumi Bantuan Prihatin Nasional (BPN), Bantuan Prihatin Rakyat (BPR), Bantuan Khas COVID-19 (BKC), bantuan eTunai kepada pelajar institusi pengajian tinggi, serta Bantuan Keluarga Malaysia sebanyak RM36.9 bilion;
 - iii. Pelaksanaan projek-projek berskala kecil sebanyak RM5.1 bilion;
 - iv. Kemudahan pinjaman kredit mikro serta Geran Khas Prihatin (GKP) sebanyak RM7.1 bilion;

- v. Perbelanjaan berkaitan COVID-19 termasuk keperluan pengesanan, kuarantin serta mengekang penularan COVID-19 sebanyak RM4.4 bilion;
- vi. Sokongan bantuan kepada golongan mudah terjejas termasuk program Jaringan Prihatin, Bantuan Kehilangan Pendapatan (BKP), diskaun bil elektrik dan subsidi pengangkutan awam sebanyak RM5.4 bilion; dan
- vii. Program sokongan perniagaan termasuk geran automasi pintar, dana jaminan makanan, dana penjana nasional dan pendigitalan perniagaan sebanyak RM1.8 bilion.

Pada masa yang sama, langkah Kerajaan untuk meneruskan dan menambahbaik pemberian subsidi dilaksanakan demi membantu rakyat dan perniagaan. Langkah ini melibatkan tambahan ketara dari segi tanggungan Kerajaan dan diunjurkan perbelanjaan bantuan dan subsidi akan meningkat daripada peruntukan RM31 bilion yang disediakan dalam Bajet 2022 kepada hampir RM80 bilion. Dengan itu, sebahagian daripada ruang fiskal Kerajaan diperlukan untuk perbelanjaan tersebut.

Keseluruhan perbelanjaan di bawah KWC dan juga berkaitan bantuan dan subsidi merangkumi manfaat kepada rakyat dan perniagaan seperti yang dipersetujui dalam MOU di antara Perdana Menteri dan pemimpin PH. Manfaat tersebut antaranya adalah meningkatkan dan menyegerakan usaha menyaring kes COVID-19, menambahbaik bantuan tunai kepada rakyat, inisiatif menjamin pekerjaan serta sokongan dan bantuan kewangan kepada perniagaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN NGA KOR MING [TELUK INTAN]
TARIKH : 04 OGOS 2022 (KHAMIS)

SOALAN

TUAN NGA KOR MING [TELUK INTAN] minta **MENTERI KEWANGAN** menyatakan apakah langkah-langkah strategik segera yang akan diambil oleh Kerajaan untuk memulihkan nilai Ringgit yang semakin merosot berbanding dengan Dolar AS dan Dolar Singapura.

JAWAPAN

Tuan Yang di-Pertua,

Penyusutan nilai ringgit pada tahun 2022 berbanding dolar Amerika Syarikat (AS) bukanlah unik kepada negara Malaysia sahaja, malah trend penyusutan ini turut dialami oleh mata wang utama dan serantau yang lain. Keadaan ini turut mencerminkan pengukuhan dolar AS.

Sehingga 20 Julai 2022, nilai ringgit telah menurun sebanyak -6.4% berbanding dolar Amerika Syarikat (AS) dan merosot sebanyak -3.5% berbanding dengan dolar Singapura (-3.5%). Jika dilihat dari segi peratusan penurunan, penurunan nilai ringgit adalah lebih sederhana berbanding penyusutan mata wang utama dan beberapa negara serantau yang lain. Perkara ini dapat dilihat bagi tempoh Januari sehingga Julai 2022 iaitu nilai matawang utama seperti euro telah menurun sebanyak -10.5% dan yen Jepun menurun sebanyak -16.7% berbanding dolar AS. Penyusutan ini turut dialami oleh mata wang negara serantau dengan kadar di antara -3.2% hingga -9.4% berbanding dolar AS, termasuk rupiah Indonesia (-4.8%), peso Filipina (-9.4%), dolar Singapura (-3.2%), Won Korea (-9.4%), dan baht Thailand (-9.5%).

Kelemahan mata wang utama dan serantau ini kebanyakannya disebabkan oleh faktor luaran, terutamanya peningkatan nilai dolar AS didorong oleh kenaikan kadar faedah AS yang pantas bagi membendung inflasi yang tinggi di AS. Menurut unjuran penganalisis ekonomi dan kewangan, *Federal Reserve* AS dijangka meningkatkan kadar faedah sebanyak 325 mata asas bagi keseluruhan tahun 2022 ke tahap 3.50%. Hal ini menyebabkan pengurus portfolio global mengalih semula pelaburan portfolio mereka ke dalam aset selamat (*safe haven*) yang mempunyai kadar hasil yang lebih tinggi di AS. Faktor luaran lain yang turut menyebabkan sentimen pelabur global bertambah merosot adalah konflik ketenteraan di Ukraine yang berterusan serta kebimbangan terhadap unjuran pertumbuhan ekonomi global yang lebih perlahan terutamanya ekonomi negara China susulan pelaksanaan semula sekatan yang ketat kerana peningkatan semula kes COVID-19.

Namun demikian, secara purata, kadar pertukaran ringgit berbanding mata wang rakan perdagangan Malaysia tidak terlalu terkesan. Kadar pertukaran efektif ringgit secara nominal (*nominal effective exchange rate*, NEER) telah meningkat sebanyak 0.4% bagi tempoh Januari sehingga Julai tahun ini. Dalam tempoh yang sama, ringgit telah meningkat berbanding dengan yen Jepun (+12.4%), paun sterling (+5.4%), won Korea (+3.3%) dan baht Thailand (+3.5%).

Tuan Yang di-Pertua,

Kadar pertukaran ringgit yang fleksibel akan terus memainkan peranan yang penting sebagai penyerap kejutan luaran tanpa menjejaskan aktiviti ekonomi domestik meskipun sedang berdepan dengan keadaan pasaran kewangan dan kadar pertumbuhan ekonomi global yang tidak menentu.

Sebagai pelan jangka panjang Kerajaan untuk menangani trend kejatuhan nilai Ringgit, Kerajaan menerusi Bank Negara Malaysia (BNM) akan terus menguruskan risiko-risiko yang wujud dalam pasaran pertukaran asing menerusi tiga (3) langkah berikut:

- i. **Langkah Pertama: Menggunakan instrumen dasar operasi bagi memastikan keadaan yang teratur dalam pasaran pertukaran asing.**

Walaupun BNM tidak menyasarkan sebarang paras kadar pertukaran, BNM akan memastikan tiada perubahan secara drastik atau melampau dalam nilai ringgit. Tindakan ini akan membantu perniagaan merancang dan melaksanakan keputusan dan pelaburan dengan lebih baik;

- ii. **Langkah Kedua: Memastikan institusi perbankan dan syarikat korporat di Malaysia mengambil langkah-langkah kehematan dalam menghadapi risiko pertukaran asing dan melindungi ringgit daripada aktiviti spekulatif.**

Langkah ini dapat mengurangkan risiko perubahan kadar ringgit yang berlebihan. Sebagai contoh, BNM memperkenalkan instrumen pelindung nilai seperti *dynamic hedging* bagi menyediakan

fleksibiliti agar peserta pasaran kewangan dan sektor perniagaan boleh melaksanakan pengurusan risiko pendedahan mata wang asing dengan lebih baik; dan

- iii. **Langkah Ketiga: Melaksanakan beberapa inisiatif untuk meningkatkan akses dan menarik pelabur asing dalam pasaran bon domestik, termasuk usaha menambah baik mudah tunai bon pasaran sekunder serta memperkukuh struktur dan mudah tunai pasaran pertukaran asing.**

Inisiatif tersebut telah membantu mengekalkan Malaysia dalam senarai Indeks Bon Kerajaan Dunia (*World Government Bond Index*, WGBI) FTSE Russell.

Kerajaan juga akan menggiatkan usaha untuk mengukuhkan sentimen pelabur asing terhadap Malaysia menerusi pelaksanaan dasar-dasar yang berupaya meningkatkan daya tarikan Malaysia sebagai destinasi pelaburan yang menarik. Usaha ini dijangka dapat meningkatkan kemasukan Pelaburan langsung asing (FDI) dan portfolio ke Malaysia seterusnya berpotensi untuk mengukuhkan ringgit dengan cara yang mampan.

Kementerian Kewangan juga telah mengeluarkan Pekeliling Perbendaharaan 3.1 pada 14 Julai 2022 mengenai langkah penjimatan untuk dilaksanakan di peringkat semua Kementerian dan agensi Kerajaan. Usaha untuk mengenal pasti penjimatan perbelanjaan bagi menampung sebahagian daripada keperluan subsidi tambahan ini turut mengandungi langkah yang boleh membantu mengawal aliran keluar ringgit. Antara langkah kawalan perbelanjaan yang berkaitan termasuk kawalan ke atas lawatan ke luar negara serta perolehan barangan dan bahan import. Di samping itu, sebarang pelaburan Badan Berkanun dan syarikat subsidiari yang melibatkan aliran wang ke luar negara perlu mendapat kelulusan Kementerian Kewangan terlebih dahulu.

Sekian, terima kasih.

**PEMBERITAHUAN PERTANYAAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN PRABAKARAN A/L M PARAMESWARAN [BATU]

TARIKH : 4 OGOS 2022 (KHAMIS)

SOALAN

Tuan Prabakaran A/L M Parameswaran [Batu] minta **MENTERI KOMUNIKASI DAN MULTIMEDIA** menyatakan status Akta Anti Buli Siber dan di peringkat manakah akta tersebut telah dikaji setakat ini.

JAWAPAN

Tuan Yang di-Pertua,

Kementerian Komunikasi dan Multimedia (K-KOMM) menerusi kolaborasi dengan Pasukan Penyelidik Universiti Multimedia (MMU) telah selesai melaksanakan Kajian Keperluan Pewujudan Akta Anti Buli Siber di Malaysia pada Julai 2021. Sebanyak tiga kali sesi libat urus telah dilaksanakan pada fasa tersebut yang melibatkan penyertaan daripada pelbagai kementerian/jabatan/agensi Kerajaan seperti Kementerian Dalam Negeri (KDN), Kementerian Pembangunan Wanita, Keluarga dan Masyarakat (KPWKM), Kementerian Pendidikan Malaysia (KPM) dan Polis Diraja Malaysia (PDRM) serta badan bukan Kerajaan (NGO) seperti Malaysian Cyber Consumers Association (MCCA) dan UNICEF Malaysia.

Hasil laporan Fasa Pertama mendapati terdapat keperluan kepada pembuktian bahawa cadangan pewujudan Akta ini boleh menangani masalah perundangan berkaitan kes buli yang tidak boleh diselesaikan dengan perundangan sedia ada. Oleh itu, kajian ini diteruskan ke Fasa Kedua yang bermula dengan pelaksanaan Bengkel Pembangunan Definisi Buli Siber pada 19 Ogos 2021 yang melibatkan penyertaan

daripada pelbagai kementerian/jabatan/agensi Kerajaan, NGO dan juga wakil daripada Ahli Parlimen dalam usaha untuk membangunkan kerangka perundangan dan ekosistem penguatkuasaan Akta tersebut.

Selain itu, sesi pengumpulan maklumat (*fact findings*) daripada beberapa buah negara yang telah menguatkuasakan akta berkaitan anti buli siber seperti Australia dan New Zealand sedang diadakan bagi mendapatkan input mengenai pendekatan penguatkuasaan yang digunakan, bidang kuasa badan penguatkuasaan, pengalaman dan cabaran yang dihadapi semasa membangunkan undang-undang anti buli siber serta impak kepada rakyat.

Kementerian juga akan mengadakan sesi libat urus dengan pihak-pihak berkepentingan terutama dengan kementerian/agensi yang mempunyai perundangan berkaitan buli bagi mengenal pasti dengan lebih teliti jurang perundangan sedia ada serta memastikan tiada pertindanan dengan perundangan sedia ada di Malaysia. Sesi libat urus dengan orang awam (*public consultation*) akan dilaksanakan bagi mendapatkan maklum balas daripada semua pihak.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DR. MASZLEE BIN MALIK
[SIMPANG RENGAM]**

TARIKH : 04 OGOS 2022 (KHAMIS)

SOALAN

DR. MASZLEE BIN MALIK [SIMPANG RENGAM] minta **MENTERI KANAN PENDIDIKAN** menyatakan mengapa KPM enggan menghadiri sesi bersama Jawatankuasa Pilihan Khas Pendidikan Parlimen di kala Kementerian Pengajian Tinggi akur dan hadir apabila diundang.

JAWAPAN

Tuan Yang di-Pertua,

Seperti mana yang diperuntukkan dalam Peraturan 83(2) Peraturan-Peraturan Mesyuarat Dewan Rakyat (PMDR), Jawatankuasa Pilihan berkuasa memanggil orang untuk hadir di hadapannya atau meminta dikeluarkan surat-surat dan boleh mengeluarkan penyata kepada Majlis mengandungi fikiran dan pandangannya serta dengan butir-butir keterangan yang telah diberi di hadapannya. Selanjutnya, Peraturan 83(4) PMDR memperuntukkan bahawa perbincangan Jawatankuasa Pilihan hendaklah dihadkan kepada perkara yang diserahkan oleh Majlis kepadanya dan juga kepada apa-apa yang berkenaan dengan perkara itu seperti yang ditambah atau dihadkan oleh Majlis.

Selain itu, merujuk kepada Terma Rujukan (ToR) yang dinyatakan dalam Jawatankuasa dan Terma Rujukan bagi Jawatankuasa Pilihan Khas Pendidikan, didapati bahawa Jawatankuasa Pilihan Khas Pendidikan berfungsi untuk meneliti Rang Undang-Undang, menyiasat dan melaporkan

apa-apa perkara yang dirujuk kepadanya oleh Dewan atau Menteri, termasuk apa-apa cadangan, usul, petisyen, laporan atau dokumen-dokumen lain yang berkaitan dengan pendidikan di bawah tanggungjawab Kementerian Pendidikan dan Kementerian Pendidikan Tinggi serta agensi-agensi di bawahnya.

Berdasarkan Peraturan dan ToR di atas, didapati bahawa Jawatankuasa Pilihan Khas Pendidikan di Parlimen mempunyai kuasa untuk memanggil orang hadir di hadapannya namun, perbincangan oleh Jawatankuasa Pilihan Khas Pendidikan tersebut adalah terhad kepada perkara yang diserahkan atau dirujuk oleh Dewan atau Menteri kepadanya.

Sehubungan dengan itu, KPM boleh untuk tidak hadir ke sesi bersama Jawatankuasa Pilihan Khas Pendidikan Parlimen sekiranya isu yang dipanggil tersebut bukanlah isu yang telah diserahkan atau dirujuk oleh Dewan atau Menteri kepada Jawatankuasa Pilihan Khas Pendidikan tetapi merupakan isu yang ditentukan oleh Jawatankuasa tersebut sendiri.

Sekiranya isu tersebut telah diserahkan atau dirujuk oleh Dewan atau Menteri untuk disiasat maka KPM akan hadir ke sesi tersebut. Setakat ini KPM mendapati tiada isu telah dirujuk oleh Dewan atau Menteri maka KPM mempunyai budi bicara untuk tidak hadir ke sesi tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN OSCAR LING CHAI YEW [SIBU]
TARIKH : 04 OGOS 2022 (KHAMIS)

SOALAN

TUAN OSCAR LING CHAI YEW [SIBU] minta **MENTERI KEWANGAN** menyatakan cadangan untuk mengurangkan hutang negara, adakah mengurangkan subsidi merupakan cadangan yang baik apabila kita mengalami masalah inflasi dan nyatakan langkah jangka panjang yang akan diambil oleh Kementerian untuk mengatasi masalah inflasi yang semakin serius ini.

JAWAPAN

Tuan Yang di-Pertua,

Kerajaan sentiasa komited dalam memastikan kedudukan kewangan dan hutang Kerajaan kekal stabil dan kembali terus mengambail kira pengukuhan dan pemulihan kembali ekonomi pasca-krisis. Oleh itu, Kerajaan Persekutuan akan memastikan setiap perbelanjaan akan memberi impak berganda kepada ekonomi dan rakyat serta hasil Kerajaan juga akan kembali meningkat.

Tuan Yang di-Pertua,

Berikutan fenomena global yang tidak menentu yang telah menjejaskan ekonomi dunia dan menyebabkan berlaku gangguan rangkaian bekalan dan logistik, ekonomi negara Malaysia turut terkesan khususnya yang melibatkan kenaikan harga barangan yang memberi tekanan kepada kadar inflasi negara. Selain itu, kenaikan harga juga berlaku berikutan tarikan permintaan bagi barangan dan perkhidmatan apabila ekonomi mula beroperasi seperti biasa dengan pembukaan

semula sempadan negara serta permintaan di musim perayaan di samping kekurangan bekalan khususnya bekalan makanan. Walau bagaimanapun, kadar inflasi Malaysia masih dalam keadaan terkawal berikutan kawalan harga yang dibuat oleh Kerajaan ke atas barangan dan perkhidmatan terpilih khususnya melalui pemberian subsidi harga bahan api dan makanan terpilih serta rebat elektrik untuk pengguna domestik.

Namun demikian, bagi memastikan kedudukan fiskal negara yang mampan untuk jangka masa panjang, pemberian subsidi yang lebih bersasar perlu dilaksanakan supaya sumber kewangan Kerajaan digunakan secara cekap dan berkesan. Kedudukan kewangan Kerajaan yang kekal kukuh juga dapat menyediakan ruang fiskal yang mencukupi dan seterusnya akan mengurangkan kadar keberhutangan Kerajaan kepada paras yang lebih terurus.

Di samping itu, langkah jangka panjang turut dilaksanakan bagi memastikan inflasi negara sentiasa stabil dan terkawal. Kerajaan akan terus menumpukan usaha untuk meningkatkan produktiviti pengeluaran bagi memastikan pengeluar mempunyai keupayaan dan daya saing untuk menghasilkan produk mereka dalam pasaran tempatan. Antaranya, sektor pertanian akan terus dipergiat di bawah Dasar Agromakanan Negara 2021-2030 (DAN 2.0) dan Pelan Tindakan Dasar Sekuriti Makanan 2021-2025 bagi memperkukuh sekuriti makanan negara serta adaptasi kepada teknologi dan mekanisasi pertanian.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN SIVAKUMAR VARATHARAJU NAIDU
[BATU GAJAH]**

TARIKH : 04 OGOS 2022 (KHAMIS)

SOALAN

TUAN SIVAKUMAR VARATHARAJU NAIDU [BATU GAJAH] minta **MENTERI KANAN PENDIDIKAN** menyatakan rasional pemansuhan PT3. Mengapa tindakan ini dilaksanakan secara tergesa-gesa tanpa berunding dengan semua pihak yang mempunyai kepentingan seperti guru-guru, ibubapa, pakar-pakar pendidikan termasuk Jawatankuasa Pilihan Khas Pendidikan Dewan Rakyat.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa melaksanakan penambahbaikan kepada sistem pentaksiran dan penilaian murid seiring dengan keperluan semasa. Dalam Sistem Pentaksiran Pendidikan Kebangsaan, murid ditaksir melalui Pentaksiran Berasaskan Sekolah (PBS) dan Peperiksaan Pusat.

Berikutan pemansuhan Ujian Pencapaian Sekolah Rendah (UPSR) mulai tahun 2021 dan Pentaksiran Tingkatan Tiga (PT3) mulai tahun 2022, KPM memberi tumpuan kepada pemerkasaan PBS, melibatkan komponen Pentaksiran Bilik Darjah (PBD), Pentaksiran Aktiviti Jasmani, Sukan dan Kokurikulum (PAJSK) serta Pentaksiran Psikometrik (PPsi).

Untuk makluman Ahli Yang Berhormat, PBS telah diperkenalkan lebih 10 tahun yang lalu, iaitu mulai tahun 2011 di peringkat sekolah rendah dan

tahun 2012 di peringkat sekolah menengah. Pentaksiran ini bertujuan untuk menilai aspek intelek, emosi, rohani, jasmani dan sosial selaras dengan Falsafah Pendidikan Kebangsaan.

Dalam konteks PBD, guru memantau perkembangan, kemajuan dan penguasaan setiap murid dalam proses pembelajaran mereka termasuk kemahiran asas membaca, menulis dan mengira (3M). Dengan ini, guru boleh merancang dan mengubah suai kaedah Pengajaran dan Pembelajaran (PdP) bagi membantu setiap murid meningkatkan tahap penguasaan pembelajaran mereka. Pelaksanaan PBD secara berterusan dapat mempersiapkan murid dengan pengetahuan, kemahiran dan nilai sebagai asas yang kukuh untuk mengikuti pembelajaran di peringkat seterusnya.

Antara pendekatan dalam pengukuhan PBD bagi murid Tahun 4 hingga Tingkatan 3 mulai tahun 2022 adalah dengan menambah baik pengurusan ujian akhir sesi akademik melalui penyediaan soalan yang setara standardnya oleh KPM. Soalan tersebut disediakan oleh guru yang berkepakaran dalam pembinaan item dan disimpan dalam sistem bank soalan yang dibangunkan oleh KPM.

Untuk tujuan pelaksanaan ujian akhir sesi akademik, pihak sekolah akan menjana set soalan daripada sistem tersebut dan ditadbir di sekolah seperti mana ujian akhir tahun sebelum ini. Panduan penskoran juga akan disediakan untuk kemudahan guru.

Penambahbaikan kepada ujian akhir sesi akademik ini adalah bagi membolehkan guru dan ibu bapa bersama-sama membantu membangunkan potensi murid bermula daripada peringkat sekolah rendah. Dalam mencapai hasrat ini, pelaporan ujian akhir sesi akademik akan digunakan untuk membolehkan intervensi awal dilakukan bagi mengoptimumkan potensi murid. Pelaporan ini bukan untuk tujuan perbandingan pencapaian antara murid atau sekolah.

Untuk makluman Ahli Yang Berhormat, kejayaan dan kemenjadian murid haruslah dilihat secara holistik dan bukan semata-mata berdasarkan prestasi dalam bidang akademik sahaja. Justeru, pentaksiran melalui

PAJSK dan PPSi juga diperkukuh bagi menilai perkembangan murid dalam aspek sukan, kokurikulum, nilai murni, minat dan kecenderungan serta pembentukan sahsiah.

KPM juga akan menambah baik dan memantapkan kaedah pelaporan PBD. Melalui kaedah ini, pencapaian murid dilaporkan secara menyeluruh sebanyak dua kali setahun iaitu pada pertengahan sesi akademik dan akhir sesi akademik dengan menggunakan deskriptor tahap penguasaan yang komprehensif dan jelas. Pelaporan ini juga menilai tahap usaha murid dalam pembelajaran. Di samping itu, guru kelas dan guru mata pelajaran akan memberi ulasan dan cadangan intervensi bagi mengoptimumkan potensi murid.

Selain daripada pelaporan PBD, laporan akhir sesi akademik akan turut disertakan dengan pelaporan PAJSK dan PPSi. Secara keseluruhan, penambahbaikan pelaporan PBS dapat memberi gambaran mengenai kemenjadian murid secara menyeluruh, komprehensif dan bermakna. Pemerkasaan PBS merupakan antara pendekatan KPM untuk beralih daripada pembelajaran berorientasi peperiksaan kepada pembelajaran yang lebih menyeronokkan untuk murid.

Selain itu, KPM juga mempergiatkan program latihan untuk pentadbir dan guru bagi meningkatkan kemahiran serta memantapkan pelaksanaan pentaksiran berterusan di sekolah. Guru juga akan terus dilatih untuk meningkatkan inovasi dan kreativiti dalam pengajaran dan pembelajaran termasuk penggunaan teknologi digital.

KPM yakin bahawa pentaksiran yang bersifat holistik dan berterusan melalui PBS merupakan pendekatan terbaik bagi mengoptimumkan potensi murid secara menyeluruh dan bersepadu.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATUK WIRA DR. MOHD HATTA BIN MD.
RAMLI [LUMUT]**

TARIKH : 4 OGOS 2022 (KHAMIS)

SOALAN

Minta **MENTERI PENGAJIAN TINGGI** menyatakan tindakan yang diambil bagi menangani isu kebocoran soalan dalam peperiksaan di IPT.

JAWAPAN

Tan Sri Yang di-Pertua,

Soalan-soalan peperiksaan di Institusi Pendidikan Tinggi (IPT) telah melalui proses jaminan kualiti yang ketat dengan kawal selia berterusan oleh Pejabat Timbalan Naib Canselor Akademik dan Antarabangsa, Unit Peperiksaan serta bahagian atau seksyen bertanggungjawab yang diberi kuasa penuh untuk mentadbir hal-hal berkaitan peperiksaan.

Di peringkat Universiti Awam (UA), sistem pemantauan khusus secara dalaman dilaksanakan bagi memastikan tiada sebarang kebocoran kertas peperiksaan. Semua pegawai yang terlibat perlu mematuhi peraturan yang ditetapkan selari dengan Akta Badan-Badan Berkanun (Tatatertib dan Surcay) 2000 [AKTA 605]. Akta 605 adalah berkaitan tatatertib dan pengenaan surcay ke atas pegawai-pegawai badan berkanun yang diperbadankan oleh undang-undang Persekutuan dan bagi perkara yang berkaitan dengannya. Dalam perkara ini, sekiranya mana-mana pegawai badan berkanun yang didapati melanggar mana-

mana perkara dalam Akta ini, maka pegawai tersebut boleh dikenakan tindakan tatatertib.

Mengikut prosedur, dari mula kertas soalan peperiksaan dirangka, para pensyarah yang terlibat dikehendaki untuk menandatangani akuan sumpah bertulis untuk menjamin integriti soalan. Soalan-soalan terpilih pula akan dimasukkan ke bank soalan selepas disaring dan diselaraskan. Akses ke bank-bank soalan peperiksaan dikawal dengan rapi dengan hanya sebilangan kecil pensyarah kanan serta pihak pengurusan universiti boleh mendapat akses.

Kertas peperiksaan yang siap dicetak akan dibungkus, dilakri dan/atau ditandatangani oleh pihak penyedia kemudian disimpan dalam bilik kebal atau peti besi sebelum dikeluarkan pada hari peperiksaan. Soalan-soalan yang sudah dipakai akan dikeluarkan pula dari bank soalan, dan begitulah seterusnya kitaran pengurusan peperiksaan yang sentiasa melalui proses audit dalaman dan luaran demi memastikan integriti, keselamatan serta kesahihan kertas-kertas soalan peperiksaan.

Di peringkat Jabatan Pendidikan Politeknik dan Kolej Komuniti (JPPPKK) pula, satu Standard Kaedah Pengoperasian Pengurusan Peperiksaan telah disediakan sebagai panduan kepada pengendali atau pengawas peperiksaan sepanjang proses peperiksaan berlangsung. Tindakan yang diambil apabila berlaku kebocoran soalan adalah tertakluk di bawah pelanggaran peraturan, arahan-arahan am peperiksaan akhir dan penyelewengan akademik. Sekiranya berlaku kebocoran soalan, calon-calon perlu menduduki semula peperiksaan akhir seperti yang ditetapkan dalam panduan ini.

Prosedur penilaian dan peperiksaan **di Institut Pendidikan Tinggi Swasta (IPTS)** juga telah ditetapkan di bawah Akta Institusi Pendidikan Tinggi Swasta 1996 [*Akta 555*]. Dalam perkara ini, sekiranya berlaku isu kebocoran soalan, isu tersebut hendaklah diurus secara tegas melalui perlembagaan yang diluluskan oleh Ketua Pendaftar IPTS. Antara yang digariskan dalam perlembagaan adalah mengenai integriti pengurusan dan pelaksanaan berkaitan hal ehwal akademik termasuk prosedur penilaian dan peperiksaan. Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : PUAN RUSNAH BINTI ALUAI
[TANGGA BATU]**

TARIKH : 04 OGOS 2022 (KHAMIS)

SOALAN

PUAN RUSNAH BINTI ALUAI [TANGGA BATU] minta **MENTERI KANAN PENDIDIKAN** menyatakan adakah Kementerian mempunyai perancangan untuk mengkaji semula hala tuju pelajar tingkatan 1 memilih aliran yang mereka minati dari peringkat awal memandangkan peperiksaan PT3 sudah dimansuhkan.

JAWAPAN

Tuan Yang di-Pertua,

Kementerian Pendidikan Malaysia (KPM) telah melaksanakan pelbagai perubahan kepada sistem pentaksiran dan penilaian murid seiring dengan keperluan arus semasa. Dalam Sistem Pentaksiran Pendidikan Kebangsaan, murid ditaksir melalui Pentaksiran Berasaskan Sekolah (PBS) dan Peperiksaan Pusat.

Untuk makluman Ahli Yang Berhormat, pendidikan pada peringkat menengah rendah adalah kesinambungan pendidikan rendah dengan pendidikan menengah dan merupakan pendidikan umum untuk semua murid. Pada peringkat ini, murid disediakan program pendidikan yang sama untuk memberi mereka peluang yang luas bagi mendapatkan ilmu pengetahuan yang menyeluruh dan seimbang. Murid berpeluang mengikuti mata pelajaran yang sama bagi memupuk minat terhadap ilmu pengetahuan dan kemahiran belajar. Dalam tempoh tiga tahun, murid membina sikap

yang positif terhadap ilmu, mempunyai pengalaman dan kemahiran yang mencukupi serta bersedia memilih bidang yang diminati pada peringkat menengah atas.

Untuk makluman Ahli Yang Berhormat, Berikutan pemansuhan Pentaksiran Tingkatan Tiga (PT3) mulai tahun 2022, KPM memberi tumpuan kepada pemeraksanaan PBS, melibatkan komponen Pentaksiran Bilik Darjah (PBD), Pentaksiran Aktiviti Jasmani, Sukan dan Kokurikulum (PAJSK) serta Pentaksiran Psikometrik (PPsi). PBD melibatkan pentaksiran formatif dan sumatif yang turut diperkasakan dengan ujian akhir sesi akademik bagi Tingkatan 1 hingga 3 di sekolah menengah. Melalui pelaporan PBD, prestasi murid dalam bidang akademik dapat dinilai seawal Tingkatan 1 dan berterusan ke Tingkatan 3. Selain itu, melalui pelaporan PAJSK dan Psikometrik juga guru boleh membimbing murid untuk memilih aliran pada peringkat menengah atas berdasarkan aspek akademik dan kecenderungan murid.

Selain itu, melalui pelaksanaan PPsi, guru boleh mempelbagaikan kaedah pengajaran dan pembelajaran berdasarkan kecenderungan, kebolehan semula jadi murid, personaliti, bakat dan minat murid dapat dikembangkan melalui aktiviti pembelajaran di sekolah. Guru juga dapat memberi kesedaran kepada murid tentang kecenderungan dan kebolehannya bagi mempelajari ilmu dan melakukan sesuatu kemahiran.

Sehubungan dengan itu, KPM berpandangan murid perlu diberi ruang dan peluang ketika di peringkat menengah rendah untuk meneroka kecenderungan, kebolehan semula jadi, personaliti, bakat, minat dan potensi mereka sebagai persediaan memilih bidang yang diminati.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN MOKTAR RADIN
[KINABATANGAN]**

TARIKH : 4 OGOS 2022 (KHAMIS)

SOALAN

Minta **MENTERI PENGAJIAN TINGGI** menyatakan apakah Kementerian berhasrat untuk mengkaji semula dan memberikan sedikit kelonggaran terhadap syarat-syarat kemasukan ke pusat pengajian tinggi awam memandangkan calon Sijil Pelajaran Malaysia (SPM) Tahun 2021 merupakan kohort pertama yang mengikuti Kurikulum Standard Sekolah Menengah (KSSM) serta pelajar juga terkesan dengan pembelajaran secara bersemuka yang terhad.

JAWAPAN

Tan Sri Yang di-Pertua,

Kementerian Pengajian Tinggi (KPT) peka dan prihatin berkenaan perubahan Kurikulum Bersepadu Sekolah Menengah (KBSM) kepada Kurikulum Standard Sekolah Menengah (KSSM), yang menjadikan Lulusan SPM 2021 sebagai kohort pertama mengikuti kurikulum berkenaan. Pelajar Lulusan SPM 2021 ini merupakan calon yang akan menyambung pengajian ke Institusi Pendidikan Tinggi Awam (IPTA) dan Institusi Latihan Kemahiran Awam (ILKA) bagi Sesi Akademik 2022/2023 yang bermula pada bulan Ogos 2022.

KPT melalui Bahagian Kemasukan Pelajar IPTA, Jabatan Pendidikan Tinggi (BKPA JPT) berperanan untuk menyelaras kemasukan pelajar ke

IPTA dan ILKA. Justeru, KPT bersama Kementerian Pendidikan Malaysia (KPM) telah membuat persediaan awal dengan mengadakan sesi libat urus bermula pada tahun 2018 bagi memastikan IPTA dan ILKA bersedia menerima kemasukan calon-calon ini bermula Sesi Akademik 2022/2023.

Beberapa siri mesyuarat penyelarasan sejak November 2021 hingga Mac 2022 bersama 20 Universiti Awam, Jabatan Pendidikan Politeknik dan Kolej Komuniti (JPPKK) serta 4 ILKA telah diadakan bagi menyesuaikan syarat kemasukan agar selari dengan kurikulum KSSM. Hasil daripada mesyuarat berkenaan, **semua IPTA dan ILKA telah menyemak semula Syarat Khas kemasukan program pengajian dan telah mendapat kelulusan pindaan daripada Senat Universiti atau Bahagian Pengambilan Pelajar JPPKK/ ILKA** masing-masing.

Antaranya, **kelonggaran Syarat Am untuk kemasukan** program pengajian Diploma di Politeknik Premier, yang sebelum ini adalah *“sekurang-kurangnya TIGA (3) kepujian termasuk Bahasa Melayu dan lulus dalam mata pelajaran Sejarah”* telah ditukar kepada *“sekurang-kurangnya TIGA (3) kepujian dan lulus dalam mata pelajaran Bahasa Melayu dan Sejarah”*.

Namun demikian, walaupun terdapat kelonggaran syarat kemasukan yang diberikan, dasar pengambilan pelajar yang dilaksanakan oleh KPT masih berasaskan kepada prinsip meritokrasi dengan menggunakan pakai 90% markah akademik dan 10% markah kokurikulum. Berdasarkan prinsip ini, semua calon yang layak dengan markah merit tertinggi tanpa mengira kaum, agama, negeri, taraf hidup dan tempat tinggal diberi peluang untuk mengikuti pengajian di IPTA dan ILKA.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : DATUK SERI PANGLIMA ABDUL AZEEZ
BIN ABDUL RAHIM [BALING]
TARIKH : 04 OGOS 2022 (KHAMIS)

SOALAN

DATUK SERI PANGLIMA ABDUL AZEEZ BIN ABDUL RAHIM [BALING] minta **MENTERI KEWANGAN** menyatakan apakah status terkini penyertaan syarikat Bumiputera tidak termasuk GLC/GLIC dalam pembangunan rangkaian sistem 5G oleh Digital Nasional Berhad (DNB) serta apakah langkah yang diambil oleh agensi bermandat Bumiputera seperti TERAJU dalam memastikan usaha ini tercapai.

JAWAPAN

Tuan Yang di-Pertua,

Berhubung penyertaan syarikat Bumiputera, DNB tertakluk kepada arahan, garis panduan dan pekeliling yang dikeluarkan oleh Kerajaan.

Setakat 31 Mac 2022, daripada jumlah keseluruhan RM1.9 bilion kontrak yang telah komited untuk Infrastruktur Rangkaian (tidak termasuk perkakasan khusus rangkaian 5G yang perlu dibeli dari luar negara), kira-kira 70% atau RM1.3 bilion telah dianugerahkan kepada kontraktor Bumiputera. Sebarang tender yang diberikan kepada kontraktor adalah tertakluk kepada keperluan pelaksanaan DNB, pematuhan kepada terma kontrak, aspek komersial dan penilaian teknikal serta kelulusan penilaian dalaman DNB.

Disamping itu, DNB akan mendorong penggunaan syarikat Bumiputera oleh kontraktor utamanya seperti Telekom Malaysia ("TM") dan edotco. Kontraktor utama ini mempunyai senarai kontraktor dan pembekal Bumiputera sedia ada untuk meningkatkan penyertaan Bumiputera dalam pembangunan rangkaian dan ekosistem 5G.

DNB juga telah mengadakan sesi libat urus bersama pihak berkepentingan termasuk TERAJU mengenai peluang dalam bidang pendidikan dan latihan, pembangunan vendor, serta penglibatan dalam pembangunan sistem rangkaian 5G.

Sekian, Tuan Yang Dipertua.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : DATO' SERI DR. WAN AZIZAH WAN
ISMAIL [PANDAN]
TARIKH : 04 OGOS 2022 (KHAMIS)

SOALAN

DATO' SERI DR. WAN AZIZAH WAN ISMAIL [PANDAN] minta
MENTERI KEWANGAN menyatakan :-

- (a)apakah polisi dan dasar Majlis Pekerjaan Negara mengenai kemasukan pekerja asing dalam situasi ekonomi sekarang; dan
- (b)apakah strategi dan program yang akan dilakukan Kerajaan bagi memikat rakyat tempatan yang menganggur supaya berminat bekerja di sektor-sektor yang dipenuhi oleh pekerja asing.

JAWAPAN

Tuan Yang di-Pertua,

Kerajaan komited untuk memastikan rakyat tempatan diutamakan dalam menerima manfaat daripada setiap inisiatif dan program yang dijalankan, termasuk peluang pekerjaan yang merupakan asas kepada punca pendapatan sebahagian besar rakyat.

Justeru, Kerajaan di bawah inisiatif Jamin Kerja Keluarga Malaysia (Jamin Kerja) telah mengambil konsep *job guarantee* dan menjamin penyediaan 600 ribu peluang pekerjaan khas bagi warganegara Malaysia melalui 44 inisiatif Kerajaan dengan peruntukan berjumlah RM4.8 bilion di bawah Bajet 2022 dan dipantau oleh Majlis Pekerjaan Negara.

Melalui inisiatif Jamin Kerja ini, Kerajaan melaksanakan Insentif Penggajian Jamin Kerja dengan peruntukan RM2 bilion yang akan memanfaatkan 300 ribu pencari kerja dari seluruh negara. Di bawah inisiatif ini, insentif tambahan juga disediakan bagi majikan yang menggantikan pekerja asing dengan pekerja dalam kalangan rakyat Malaysia di bawah Program *Malaysianization* di mana 10% daripada gaji kasar pekerja dibayar terus kepada pekerja dan 20% di bayar kepada majikan untuk 6 bulan yang pertama manakala 30% disediakan 6 bulan seterusnya.

Di samping itu, program Malaysia Short Term Employment Programme (MySTEP) turut diteruskan dengan menyediakan sebanyak 80 ribu peluang penempatan pekerjaan secara kontrak bagi memastikan rakyat terutamanya golongan belia mendapat pekerjaan,. Melalui inisiatif Jamin Kerja ini juga, pelbagai program Latihan dan Peningkatan Kemahiran disediakan khusus kepada Keluarga Malaysia dalam mempertingkatkan kemahiran dan keupayaan para pekerja agar terus relevan dan memenuhi kehendak industri dengan mensasarkan 220 ribu peluang penempatan pekerjaan.

Namun, kebergantungan terhadap pekerja asing terutamanya pekerja tidak berkemahiran masih lagi wujud untuk mengisi kekosongan

tenaga kerja terutamanya dalam pekerjaan 3D (dangerous, dirty & difficult) yang kurang diceburi oleh rakyat. Oleh itu, Kementerian Sumber Manusia menerusi Majlis Perundingan Gaji Negara (MPGN) juga telah menetapkan kadar baharu gaji minimum sebanyak RM1,500 mulai 1 Mei 2022 di mana penguatkuasaan kadar gaji minimum ini dilihat sebagai satu langkah positif untuk menarik minat pekerja tempatan bagi memenuhi kekosongan dalam sektor-sektor yang dimonopoli oleh pekerja asing.

Selain daripada itu, Kerajaan turut merangka strategi dan program yang sedang dan akan dijalankan Kerajaan bagi memikat rakyat tempatan supaya berminat bekerja di sektor-sektor yang didominasi oleh pekerja asing antaranya seperti berikut:

- i. Menerapkan penggunaan teknologi, automasi dan digitalisasi dalam proses pengeluaran;
- ii. Pemerksaan bidang dan pekerjaan berasaskan TVET;
- iii. Pelaksanaan Levi Pelbagai Peringkat atau Multi-Tier Levy;
- iv. Mewajibkan kuota penempatan latihan industri graduan TVET secara mandatori melalui Latihan Industri Berstruktur;
- v. Pengaplikasian Senarai Pekerjaan Kritikal atau *Critical Occupation List* oleh Talent Corp dalam membantu pencari kerja warganegara; dan
- vi. Penerapan kesedaran terhadap majikan/ keperluan sebenar industri.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : PUAN ALICE LAU KIONG YIENG
[LANANG]
TARIKH : 04 OGOS 2022 (KHAMIS)

SOALAN

PUAN ALICE LAU KIONG YIENG [LANANG] minta **MENTERI KEWANGAN** menyatakan langkah-langkah drastik yang telah diambil oleh bank-bank dalam negara susulan trend peningkatan jenayah penipuan dalam talian dan jenayah siber supaya sistem keselamatan perbankan dalam talian yang ditawarkan kepada orang ramai tidak dapat digodam oleh penjenayah siber dan apakah usaha Bank Negara Malaysia untuk mengatasi masalah tersebut.

JAWAPAN

Tuan Yang di-Pertua,

Untuk makluman Yang Berhormat, jenayah penipuan adalah satu kesalahan yang termaktub dalam Kanun Keseksaan dan siasatannya adalah dalam bidang kuasa pihak Polis Diraja Malaysia (PDRM). Sebarang insiden penipuan haruslah dilaporkan terus kepada pihak PDRM untuk siasatan lanjut. Menurut rekod PDRM, statistik kes jenayah atas talian bagi tahun 2021 hingga 30 Jun 2022 adalah seperti berikut:

TAHUN	JUMLAH
2021	20,701
2022 (sehingga 30 Jun 2022)	10,468

Isu kehilangan wang dalam akaun tanpa pengetahuan / kebenaran pelanggan adalah berpunca terutamanya daripada pelbagai kaedah pemerdayaan oleh sindiket penipuan kewangan untuk mendorong pelanggan institusi kewangan menyerahkan maklumat perbankan sama ada secara sedar atau tidak. Contohnya, tawaran servis pembersih rumah atau penghantaran makanan di mana sindiket penipuan kewangan mengarahkan mangsa memuat turun fail aplikasi APK (*Android Package Kit*) yang boleh membaca sistem pesanan ringkas (SMS) tanpa disedari mangsa, berserta skrin pembayaran atau pemindahan wang yang palsu. Ada masanya, sindiket-sindiket ini turut menyamar sebagai pihak berkuasa atau bank bagi memancing maklumat perbankan dari mangsa-mangsa. Justeru, pihak Bank Negara Malaysia (BNM) dan industri perbankan sentiasa mengingatkan orang ramai supaya berhati-hati dan melindungi maklumat perbankan daripada dikongsi dengan pihak yang tidak bertanggungjawab.

Orang ramai dinasihatkan agar mengambil tindakan berhati-hati bagi mengelakkan daripada terpedaya dan menjadi mangsa penipuan. Antara tindakan yang boleh dipraktikkan adalah:

- Jangan sesekali panik dan mengikut arahan yang diberikan oleh pemanggil termasuk pemindahan wang kepada orang yang tidak

dikenali, tanpa terlebih dahulu menghubungi pihak polis atau institusi kewangan terbabit;

- Jangan hubungi semula nombor telefon yang diterima, sebaliknya dapatkan nombor telefon rasmi syarikat, organisasi atau institusi terbabit melalui laman sesawang rasmi untuk pengesahan lanjut;
- Jangan dedahkan atau kongsi butiran ID pengguna dan kata laluan akaun perbankan atas talian, nombor dan PIN kad ATM atau kad kredit anda kepada orang yang tidak dikenali;
- Jangan memuat turun aplikasi pihak ketiga menggunakan fail APK diberikan oleh orang yang tidak dikenali kerana aplikasi terbabit boleh mengakses maklumat peribadi dalam telefon mangsa; dan
- Sentiasa berwaspada dan tidak mudah terpedaya dengan muslihat atau tipu helah pihak-pihak tertentu.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN WONG CHEN [SUBANG]
TARIKH : 04 OGOS 2022 (KHAMIS)

SOALAN

TUAN WONG CHEN [SUBANG] minta **MENTERI KEWANGAN** menyatakan rancangan atau bantuan yang diberikan kepada golongan M40 untuk membantu mengurangkan kesan inflasi harga makanan.

JAWAPAN

Tuan Yang di-Pertua,

Dari sudut kadar inflasi, tekanan inflasi pada tahun 2022 merupakan fenomena global selaras dengan harga minyak mentah Brent yang kekal melebihi USD100 setong semenjak hujung Mac 2022. Gangguan rantai bekalan dunia yang menjejaskan bekalan baja dan makanan ternakan juga telah meningkatkan harga makanan dengan mendadak. Sebagai sebuah ekonomi yang terbuka, Malaysia tidak terkecuali daripada tekanan inflasi global. Ini bermakna, kenaikan harga barangan sukar untuk dielakkan sepenuhnya.

Kadar inflasi di Malaysia pada bulan Mei 2022 mencatat 2.8 peratus dan pada bulan yang sama, kadar inflasi di beberapa negara seperti Amerika Syarikat dan United Kingdom mencecah 9 peratus, Thailand 7 peratus, serta Singapura dan Filipina melebihi 5 peratus. Kadar inflasi yang lebih sederhana berbanding dengan negara lain adalah berikutan langkah Kerajaan melaksanakan subsidi barangan asas dan kawalan harga. Langkah tersebut melibatkan harga subsidi bagi Petrol, Diesel dan LPG dikekalkan harga sementara harga kawalan dikenakan atas barangan seperti pek minyak masak 1kg, gula, tepung serta ayam dan telur. Dengan itu, semua golongan masyarakat bukan sahaja B40 tetapi juga M40 menikmati inflasi pada kadar yang lebih rendah.

Menerusi simulasi oleh Jabatan Perangkaan Malaysia, inflasi 2.8% mungkin menjadi 11.4% pada Mei 2022 tanpa subsidi kepenggunaan yang telah disalurkan. Kerajaan peka kepada kenaikan harga komoditi dan kadar inflasi ekoran gangguan kepada rantai bekalan global dan konflik Ukraine-Rusia, yang telah mengakibatkan impak kenaikan harga barangan asas kepada kebanyakan negara di seluruh dunia, termasuk Malaysia. Dalam usaha membangun semula ekonomi rakyat dan memacu pemulihan negara, Bajet 2022 telah digarap bagi memastikan semua segmen masyarakat dan perniagaan dibantu. Justeru, tumpuan diberikan ke arah pemberian bantuan tunai kepada B40, langkah insentif cukai bagi M40, janaan dan pengekalan pekerjaan serta menyemarakkan perniagaan.

Di atas keprihatinan Kerajaan terhadap kebajikan dan kesejahteraan rakyat terutamanya dalam menangani kenaikan harga barangan keperluan asas, Kerajaan telah meneruskan bahkan meningkatkan bantuan dan subsidi kepada rakyat, bukan sahaja kepada golongan B40 tetapi juga kepada golongan M40 dan T20. Ekoran daripada langkah Kerajaan meneruskan dan menambah tanggungan subsidi, diunjurkan perbelanjaan bantuan dan subsidi akan meningkat daripada peruntukan Bajet 2022 sebanyak RM31 bilion kepada mencecah RM77.7 bilion.

Sebenarnya, golongan M40 yang bakal menerima jumlah manfaat subsidi yang terbesar. Sebagai contoh, berdasarkan Survei Perbelanjaan Isirumah 2019, untuk RON95, satu isirumah B40 berbelanja secara purata RM165 sebulan manakala satu isirumah M40 berbelanja secara purata RM350 sebulan. Berdasarkan perbelanjaan tersebut, dianggarkan kegunaan RON95 adalah 22% oleh golongan B40 tetapi 46% oleh golongan M40. Dengan itu, mengambil kira anggaran subsidi RON95 untuk tahun ini akan mencecah RM20 bilion, ianya bermakna golongan B40 memanfaatkan hampir RM5 bilion sementara M40 memanfaatkan hampir RM10 bilion. Dengan itu, jelas bahawa golongan M40 tidak dipinggirkan oleh Kerajaan.

Kerajaan juga menyediakan pelbagai program peningkatan kemahiran dan latihan semula kepada golongan pekerja termasuk dalam kalangan M40 yang bertujuan untuk meningkatkan kebolehpasaran pekerja dalam mendepani landskap pekerjaan yang semakin kompetitif. Bagi membangun semula ekonomi rakyat, Kerajaan di bawah inisiatif Jamin Kerja Keluarga Malaysia atau JaminKerja akan menjamin penyediaan 600 ribu peluang pekerjaan dengan peruntukan berjumlah 4.8 bilion ringgit. Sehingga Jun 2022, lebih 150,000 rakyat telah mendapat manfaat dan pekerjaan melalui program ini dan kadar pengangguran negara bagi bulan Mei 2022 juga telah mencatatkan penurunan kepada 3.9% hasil dari pelaksanaan inisiatif program JaminKerja Keluarga Malaysia.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DR. KELVIN YII LEE WUEN
[BANDAR KUCHING]**

TARIKH : 04 OGOS 2022 (KHAMIS)

SOALAN:

DR. KELVIN YII LEE WUEN [BANDAR KUCHING] minta **MENTERI KANAN PENDIDIKAN** menyatakan pendirian Kerajaan untuk menggubal akta untuk menghukum mana-mana pihak yang dikatakan “menghina” atau tidak menghormati bahasa kebangsaan seperti yang diumumkan sebelum ini oleh Dewan Bahasa dan Pustaka (DBP).

JAWAPAN

Tuan Yang di-Pertua,

Peruntukan Perkara 152 Perlembagaan Persekutuan meletakkan bahasa Melayu sebagai bahasa kebangsaan yang hendaklah digunakan bagi apa-apa maksud rasmi. Walau bagaimanapun, Perlembagaan Persekutuan juga memberikan perlindungan tertentu kepada apa-apa bahasa lain.

Pada masa ini, DBP sedang memperincikan penambahbaikan kepada Akta Dewan Bahasa dan Pustaka 1959 [*Akta 213*] bagi memastikan ianya mencapai maksud untuk memartabatkan Bahasa Melayu sebagai Bahasa Kebangsaan. Perincian ini akan mengambil kira pelbagai aspek berkaitan termasuk penggunaannya.

Sekian, terima kasih.

**PEMBERITAHUAN PERTANYAAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATUK IGNATIUS DARELL LEIKING
[PENAMPANG]**

TARIKH : 1 OGOS 2022 (ISNIN)

SOALAN

Datuk Ignatius Darell Leiking [Penampang] minta **MENTERI KOMUNIKASI DAN MULTIMEDIA** menyatakan tindakan Kerajaan yang telah, sedang dan akan diambil untuk menangani kes-kes kebocoran data peribadi dan sensitif melalui agensi-agensi Kerajaan dan pihak swasta seperti bank dan syarikat telekomunikasi yang telah menyebabkan peningkatan kepada kes penipuan dan *scam*.

JAWAPAN

Tuan Yang di-Pertua,

Akta Perlindungan Data Peribadi 2010 [Akta 709] digubal untuk mengawal selia pemprosesan data peribadi dalam transaksi komersial. Walaupun Akta 709 hanya terpakai untuk transaksi komersial dan tidak terpakai untuk Kerajaan Persekutuan dan Kerajaan Negeri, Agensi Keselamatan Siber Negara (NACSA) di bawah Majlis Keselamatan Negara (MKN) adalah bertanggungjawab untuk mengawal selia data Kerajaan yang merupakan Infrastruktur Maklumat Kritikal Nasional (*critical national information infrastructure* - CNII) melalui Arahan MKN 26. Dalam hal ini, insiden kebocoran data yang berunsurkan jenayah akan dirujuk kepada NACSA dan Polis Diraja Malaysia (PDRM).

Bagi transaksi komersial, kegagalan mematuhi prinsip-prinsip di bawah Akta Perlindungan Data Peribadi 2010 [Akta 709], jika disabitkan kesalahan, boleh membawa kepada denda tidak melebihi RM500,000 atau hukuman penjara tidak melebihi tiga tahun atau kedua-duanya sekali.

Pelbagai program *outreach* seperti Persidangan Perlindungan Data Peribadi, webinar, sesi konsultasi dan khidmat nasihat serta program kolaborasi di serata negara giat dilaksanakan termasuklah program di kawasan luar bandar bagi mendidik usahawan-usahawan tempatan untuk meningkatkan kefahaman mengenai kepentingan melindungi data peribadi.

Suruhanjaya Komunikasi dan Multimedia Malaysia (SKMM) juga mengeluarkan nasihat awam mengenai ancaman-ancaman terbaru yang perlu diberikan perhatian oleh orang ramai dan melaksanakan program advokasi dan kesedaran pengguna. Antaranya seperti memastikan ciri-ciri keselamatan seperti menggunakan kata laluan yang sukar dibuka dan mengaktifkan pengesahan dua langkah (*2-Factor Authentication*).

Jabatan Perlindungan Data Peribadi (JPDP) juga turut melibatkan pihak industri dalam membangunkan Kod Tata Amalan (KTA) Perlindungan Data Peribadi yang perlu dipatuhi oleh pihak industri bagi memastikan kebolehlaksanaan dan kelancaran prosedur berkaitan pemprosesan data peribadi terutama dari sudut perundangan sedia ada satu-satu sektor dan seterusnya menjamin keselamatan data tersebut.

Pemeriksaan ke atas sistem data peribadi pengguna data seperti yang diperuntukkan di bawah Seksyen 101 dan Seksyen 48 Akta 709 juga dilaksanakan oleh JPDP selain menjalinkan kerjasama erat dengan agensi Kerajaan yang berkepentingan seperti NACSA dan PDRM bagi melaksanakan penguatkuasaan dan siasatan berterusan ke atas kes-kes kebocoran dan penjualan data peribadi.

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT, MESYUARAT KEDUA, PENGGAL YANG KELIMA
PARLIMEN KEEMPAT BELAS, TAHUN 2022**

PERTANYAAN : LISAN

**DARIPADA : YB PUAN TEO NIE CHING
(KULAI)**

TARIKH : 04 OGOS 2022 (KHAMIS)

SOALAN

PUAN TEO NIE CHING (KULAI) minta **MENTERI PEMBANGUNAN WANITA, KELUARGA DAN MASYARAKAT** menyatakan status dan perkembangan terkini tentang program pilot mengenai alternatif untuk penahanan (Alternative to Detention (ATD) pilot programme).

JAWAPAN

Tuan Yang di-Pertua,

Jemaah Menteri pada mesyuaratnya bertarikh 21 April 2021 telah meluluskan Memorandum Jemaah Menteri Bersama antara Kementerian Dalam Negeri (KDN) dan Kementerian Pembangunan Wanita, Keluarga dan Masyarakat (KPWKM) berkenaan pelaksanaan projek rintis *Alternatives to Detention* (ATD) dijalankan dengan kerjasama Yayasan Chow Kit (YCK) dan SUKA Society. Fasa pertama projek rintis ATD dilaksanakan di depot imigresen seluruh Semenanjung Malaysia bermula suku pertama tahun 2021 hingga suku kedua tahun 2022 selama tempoh 1 tahun. Perluasan skop pelaksanaan bagi Fasa 2 akan dipertimbangkan berdasarkan pencapaian fasa pertama projek rintis dan mengambil kira keputusan dasar Kerajaan sedia ada. Walau bagaimanapun, projek ini telah ditangguhkan akibat pandemik COVID-19 dan telah beroperasi semula pada 14 Februari 2022.

Projek rintis ATD yang dicadangkan untuk pelaksanaan di Malaysia merupakan satu penjagaan alternatif kepada penahanan kanak-kanak di depot imigresen. Kanak-kanak ini akan mendapat perlindungan dan perkhidmatan sokongan melalui pemeliharaan berasaskan keluarga bagi memenuhi keperluan asas seorang kanak-kanak seperti tempat perlindungan, khidmat sokongan seperti kaunseling, pendidikan dan kesihatan. Manakala pengurusan kes ATD akan dibuat oleh SUKA Society yang melibatkan proses mengenal pasti keluarga terdekat sekiranya ada, proses kerjasama dengan organisasi antarabangsa dan syor untuk resolusi kes berdasarkan keperluan kanak-kanak tersebut.

Projek rintis ini akan melibatkan kanak-kanak terpisah dan tanpa penjaga (*unaccompanied and separated*) dalam tahanan imigresen yang berumur 0 hingga 18 tahun. Kanak-kanak etnik Rohingya dan kanak-kanak yang mempunyai konflik dengan undang-undang selain daripada Akta Imigresen [Akta 155] adalah terkecuali daripada projek rintis buat masa ini.

SOALAN NO.104

Seramai 5 orang kanak-kanak pada satu-satu masa dan dipilih berdasarkan saringan kerentanan (*vulnerability*). Kanak-kanak akan ditempatkan dalam jagaan Orang Yang Layak dan Sesuai (OYLS) melalui perintah mahkamah di bawah Akta Kanak-Kanak 2001 [Akta 611] sebelum dihantar balik ke negara asal.

Bagi memastikan projek ini berjalan dengan lancar, satu *Standard Operating Procedure* (SOP) telah dibangunkan menerusi 3 siri bengkel yang telah diadakan iaitu Bengkel 1.0 pada 12 November 2021, Bengkel 2.0 pada 17 November 2021 dan Bengkel 3.0 pada 26 November 2021 bersama semua agensi pelaksana projek rintis ATD ini. SOP tersebut telah diluluskan di Mesyuarat Pre-Council yang telah diadakan pada 11 Januari 2022.

Pada masa kini, agensi pelaksana sedang dalam proses saringan berdasarkan SOP untuk memilih senarai pendek nama kanak-kanak sebelum saringan kerentanan ke atas kanak-kanak dijalankan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : YB DATUK MOHD AZIS BIN JAMMAN
[SEPANGGAR]
TARIKH : 04 OGOS 2022 (KHAMIS)

SOALAN

Datuk Mohd Azis Bin Jamman [Sepanggar] minta **MENTERI KEWANGAN** menyatakan berkenaan 'Perintah Pemberian Khas Sabah (Ulangkaji Pertama) 1970 (P.U.(A) 328/1970)' yang berkuatkuasa mulai 1 Januari 1969 secara terperinci iaitu :-

(a) siapakah pemimpin yang terlibat, di manakah persetujuan dicapai dan apakah perkara-perkara yang dibincangkan ; dan

(b) adakah Warta Kerajaan P.U.(A) 328 tertakluk di bawah Perkara 112D(8) Perlembagaan Persekutuan iaitu "Apa-apa Perintah Yang di-Pertuan Agong di bawah Perkara ini hendaklah dibentangkan di hadapan setiap Majlis Parlimen". Jika ya, bilakah warta ini dibentangkan di Parlimen.

JAWAPAN

Untuk makluman Ahli Yang Berhormat dan Dewan Yang Mulia ini,

Perkara yang dibangkitkan oleh Yang Berhormat telah difailkan ke mahkamah oleh 12 orang wakil rakyat dan Persatuan Undang-Undang Sabah (*Sabah Law Society*) terhadap Kerajaan Persekutuan dan Kerajaan Negeri Sabah.

Oleh yang demikian, tiada apa-apa ulasan atau jawapan boleh diberikan atas dasar *sub judice*.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : PUAN HAJAH FUZIAH BINTI SALLEH
(KUANTAN)**

TARIKH : 4 OGOS 2022 (KHAMIS)

SOALAN

PUAN HAJAH FUZIAH BINTI SALLEH (KUANTAN) minta **MENTERI TENAGA DAN SUMBER ASLI** menyatakan jumlah kawasan peratusan hutan simpanan kekal yang telah dinyahwartakan di setiap negeri tanpa konsultasi awam dan juga jumlah kawasan tersebut yang digantikan bagi setiap negeri dengan menjelaskan kaedah penggantian hutan simpanan kekal yang telah dinyahwartakan.

JAWAPAN

Tuan Yang di-Pertua,

1. Untuk makluman Ahli Yang Berhormat, berdasarkan rekod yang dikemukakan oleh Jabatan Perhutanan Semenanjung Malaysia (JPSPM), jumlah keluasan Hutan Simpanan Kekal (HSK) di Semenanjung yang diwartakan keluar bagi tempoh tahun 2017 hingga 2021 adalah 0.95 peratus atau 45,473 hektar, manakala jumlah keluasan HSK yang diwartakan masuk bagi tempoh yang sama adalah 1.57 peratus atau 75,637.40 hektar.

2. Kesemua pewartaan keluar kawasan HSK di Semenanjung Malaysia kecuali negeri Selangor adalah tanpa konsultasi atau siasatan awam (*public hearing*). Di Semenanjung, Pihak Berkuasa Negeri (PBN) hendaklah menggantikan kawasan tanah yang dikeluarkan daripada HSK di bawah seksyen 11, Akta 313 dengan sesuatu kawasan tanah yang lebih kurang sama luasnya sebagai HSK baharu. Manakala di Selangor,

terdapat sedikit perbezaan di mana PBN perlu mengadakan siasatan awam sebelum sesuatu kawasan HSK diwartakan keluar dan HSK yang telah diwartakan keluar perlu digantikan dengan suatu kawasan tanah yang sama luas atau lebih besar selaras dengan pindaan Enakmen (Pemakaian) Akta Perhutanan Negeri Selangor 1985 yang telah dilaksanakan oleh Kerajaan Negeri pada tahun 2011.

3. Kementerian Tenaga dan Sumber Asli (KeTSA) melalui Jabatan Perhutanan Semenanjung Malaysia (JPMS) sedang melaksanakan pindaan ke atas Akta 313. Rang Undang-Undang (RUU) Perhutanan Negara (Pindaan) 2022 telah dibentangkan bagi bacaan pertama di Dewan Rakyat pada 3 Mac 2022 dan baharu selesai bacaan kali kedua dan ketiga pada 18 Julai 2022. Pindaan yang dicadangkan kepada Akta 313 pada kali ini meliputi:

- (i) keperluan untuk mengadakan siasatan awam (*public hearing*) sebelum sesuatu kawasan HSK diwartakan keluar; dan
- (ii) keperluan penggantian serentak HSK yang diwartakan keluar dengan suatu kawasan tanah yang sama luas atau lebih besar.

4. Cadangan pindaan ini bertujuan memperketatkan proses pewartaan keluar HSK dan dalam masa yang sama akan mengurangkan tekanan pembangunan ke atas kawasan HSK sedia ada. Melalui pindaan ini juga, pewartaan keluar HSK bagi tujuan pembangunan akan merupakan pilihan terakhir yang diambil oleh Pihak Berkuasa Negeri setelah semua aspek *due-diligence* dengan izin, dilaksanakan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : DATUK SERI SAIFUDDIN NASUTION BIN ISMAIL (KULIM BANDAR BAHARU)

TARIKH : 4 OGOS 2022 (KHAMIS)

SOALAN

DATUK SERI SAIFUDDIN NASUTION BIN ISMAIL (KULIM BANDAR BAHARU) minta **MENTERI TENAGA DAN SUMBER ASLI** menyatakan berapa keluasan Tanah Simpanan Melayu yang ditanam padi dan berapa pula keluasan Tanah Simpanan Melayu yang lokasinya terletak di pulau-pulau atau pergunungan serta berikan statistiknya mengikut negeri.

JAWAPAN

Tuan Yang di-Pertua,

Keluasan kawasan yang diwartakan sebagai Tanah Rizab Melayu (TRM) di Semenanjung Malaysia adalah 4,963,190.80 hektar sehingga akhir 2021. Kutipan data bagi tahun 2022 masih dalam tindakan Kementerian dengan kerjasama semua Pentadbiran Tanah Negeri.

Kementerian juga tiada maklumat mengenai kedudukan Tanah Rizab Melayu yang dikhususkan untuk penanaman padi atau lokasi TRM yang terletak di pulau-pulau. Maklumat yang diperolehi oleh Kementerian adalah daripada Pentadbiran Tanah Negeri masing-masing yang merangkumi tanah bermilik dan tanah Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : TUAN WILLIAM LEONG JEE KEEN
(SELAYANG)**

TARIKH : 4 OGOS 2022 (KHAMIS)

SOALAN

**TUAN WILLIAM LEONG JEE KEEN [SELAYANG] minta MENTERI
PERTANIAN DAN INDUSTRI MAKANAN menyatakan :-**

- (a) langkah-langkah jangka panjang untuk meningkat bekalan makanan; dan
- (b) sama ada keperluan Approved Permit (AP) harus dimansuhkan untuk semua industri makanan bagi memastikan bekalan yang mencukupi pada harga yang kompetitif.

JAWAPAN

Tuan Yang di-Pertua,

Untuk makluman Ahli Yang Berhormat, bagi mengukuhkan bekalan makanan negara dan menangani isu sekuriti makanan, strategi jangka panjang yang telah dan akan dilaksanakan oleh Kementerian Pertanian dan Industri Makanan (MAFI) telah digariskan dalam Dasar Agromakanan Negara 2021-2030 (DAN 2.0) dan Pelan Tindakan Dasar Sekuriti Makanan Negara 2021-2025 (DSMN 2021-2025). Antara strategi tersebut termasuk:

- (i) meningkatkan penggunaan teknologi moden dan pertanian pintar dalam sistem makanan melalui pemerkasaan aktiviti penyelidikan,

pembangunan, pengkomersialan dan inovasi (R&D&C&I) serta penyediaan sumber dana dan agroteknologi yang bersesuaian;

- (ii) membangunkan modal insan dan tenaga kerja tempatan yang berkemahiran tinggi untuk menyokong keperluan industri pada masa hadapan;
- (iii) memperluas amalan pertanian mampan termasuk pengurusan sumber asli yang cekap serta pengurangan kehilangan dan pembaziran makanan;
- (iv) meningkatkan adaptasi pengeluaran makanan terhadap kesan perubahan iklim seperti bencana dengan pewujudan skim perlindungan yang bersesuaian; dan
- (v) memperkukuh tadbir urus sektor agromakanan termasuk kerjasama merentasi kementerian, kerajaan negeri, pemain industri dan pihak berkepentingan serta pengukuhan data berkaitan sekuriti makanan.

Sebanyak empat (4) komoditi pertanian di bawah kawal selia Kementerian ini iaitu keratan ayam dan ayam bulat, susu cair, kobis bulat serta kelapa tua biji telah dimansuhkan kawalan import (*Approved Permit* – AP) berkuatkuasa mulai 18 Mei 2022. Namun begitu, hanya komoditi beras sahaja yang masih memerlukan *Approved Permit* (AP) bagi tujuan pengimportan ke dalam negara.

AP bagi keluaran pertanian terpilih merupakan satu mekanisme untuk mengawal pengimportan beberapa keluaran pertanian bagi memastikan hanya kuantiti yang optimum dibenarkan untuk diimport ke dalam negara. Ini bertujuan untuk mengimbangi di antara pengeluaran dalam negara dengan kuantiti import supaya memenuhi keperluan pengguna di dalam negara di samping mengelakkan lambakan import yang boleh menjejaskan industri pertanian tempatan.

Sekian, terima kasih.

**PEMBERITAHUAN PERTANYAAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : TUAN LIM GUAN ENG [BAGAN]

TARIKH : 4 OGOS 2022 (ISNIN)

SOALAN

Tuan Lim Guan Eng [Bagan] minta **MENTERI KOMUNIKASI DAN MULTIMEDIA** menyatakan sama ada Apricot, Facebook and Google akan kembali ke Malaysia sungguhpun dasar kabotaj masih tidak diberikan pengecualian untuk syarikat berteknologi tinggi memperbaiki kabel dasar laut serta mengapa Sabah dan Semenanjung Malaysia dipintas dalam kontrak kabel dasar laut South-East Asia Hainan-Hongkong Express Cable (SEA-H2X).

JAWAPAN

Tuan Yang di-Pertua,

Kerajaan sentiasa komited untuk mencapai aspirasi MyDIGITAL yang menyasarkan Malaysia sebagai sebuah ekonomi digital yang moden. Antara sasaran MyDIGITAL adalah untuk menarik pelaburan berkaitan digitalisasi berjumlah RM70 bilion, jumlah pendapatan hasil perkhidmatan pusat data dan pengkomputeran awan syarikat-syarikat tempatan sebanyak RM3.6 bilion dan pertumbuhan pesat kapasiti kabel dasar laut bagi meletakkan Malaysia sebagai lokasi yang sangat kompetitif di rantau ASEAN.

Kerajaan telah menubuhkan Pasukan Petugas Penyelarasan Pelaburan Pusat Data atau DCICTF (*Data Centre Investment Coordination Task Force*) yang dipengerusikan bersama oleh Kementerian Komunikasi dan Multimedia (K-KOMM) dan Kementerian Perdagangan Antarabangsa dan Industri (MITI) bagi memudahkan dan fasilitasi kepada para pelabur pangkalan data yang berminat melabur di Malaysia dalam menyediakan persekitaran pelaburan yang menarik. DCICTF ini akan meneliti isu-isu yang dibangkitkan oleh para pelabur pangkalan data, termasuk kabel dasar laut, seterusnya mendapatkan penyelesaian seperti mengenalpasti dasar-dasar yang perlu diubah atau ditambahbaik bagi membolehkan Malaysia lebih berdaya saing serta menjadi destinasi pilihan utama untuk melabur.

Setakat ini, terdapat sebanyak 34 pusat data di seluruh Malaysia yang menawarkan perkhidmatan-perkhidmatan digital bernilai tinggi seperti perkhidmatan pengkomputeran awan dan sejumlah 23 kabel dasar laut yang telah mendarat di beberapa stesen pendaratan kabel di Malaysia.

Untuk makluman Ahli Yang Berhormat, mengenai isu Sabah dan Semenanjung Malaysia dipintas dalam kontrak kabel dasar laut South-East Asia Hainan-Hongkong Express Cable (SEA-H2X), Syarikat PPTTEL SEA H2X Sdn. Bhd. merupakan pelabur tunggal dari Malaysia dalam kabel tersebut untuk keperluan Sarawak terdahulu dan mempunyai

rancangan untuk memanjangkan sambungan kepada Semenanjung dan Sabah melalui sistem kabel yang lain.

Pemilihan lokasi pendaratan bagi setiap sistem kabel dasar laut adalah bergantung kepada strategi setiap pemilik kabel dan ahli konsortium yang terlibat. Walaupun sistem kabel South-East Asia Hainan-Hongkong Express Cable (SEA-H2X) yang baharu tidak disambungkan ke Semenanjung Malaysia dan Sabah, telah terdapat sistem kabel domestik yang menyambungkan Kuching (Sarawak) kepada Sabah dan Semenanjung. Antara sistem kabel domestik sedia ada adalah Sistem Kabel Rakyat Malaysia menghubungkan Mersing, Kuching, Bintulu, Miri, Tanjung Aru dan Cherating dan juga sistem kabel East-West menghubungkan Kuching dan Mersing.

Selain daripada itu, bagi mengelakkan kebergantungan kepada sistem kabel Apricot, beberapa sistem kabel baharu milik Google dan Facebook juga sedang dalam pelaksanaan di Semenanjung iaitu sistem kabel MIST, BtoBE, IAX dan SEA-ME-WE6. Kesemua sistem kabel ini dijangka akan siap sepenuhnya sebelum tahun 2025 bagi memastikan sasaran di bawah MyDigital tercapai.

Perkara berkaitan dasar kabotaj ini berada di bawah Kementerian Pengangkutan (MOT) dan K-KOMM tertakluk kepada sebarang keputusan kabinet mengenai perkara ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN CHOW KON YEOW
[TANJONG]**

TARIKH : 4 OGOS 2022 (KHAMIS)

SOALAN

Minta **MENTERI PENGAJIAN TINGGI** menyatakan usaha Kerajaan bagi menyelesaikan masalah kekurangan sumber tenaga kerja perlu dalam negara membabitkan pelbagai sektor kini. Perincikan juga pendekatan bagi melahirkan graduan berkualiti demi memenuhi keperluan industri kini dengan berkongsi statistik berkaitan (jumlah graduan, institusi pengajian, bidang pembelajaran dan kerjaya diceburi selepas menamatkan pelajaran) sejak tahun 2018 hingga kini.

JAWAPAN

Tan Sri Yang di-Pertua,

Kementerian Pengajian Tinggi (KPT) sentiasa mengambil langkah proaktif untuk memastikan graduan yang dilahirkan dapat memberikan sumbangan sepenuhnya kepada guna tenaga negara dan mengurangkan jurang antara kemahiran yang dimiliki oleh graduan dengan keperluan pihak industri. Antara langkah yang diambil dalam memastikan graduan yang dilahirkan merupakan graduan berkualiti tinggi ialah:

i. Melaksanakan transformasi pendidikan tinggi awam melalui semakan semula kurikulum program akademik;

Proses ini penting untuk memastikan kurikulum yang ditawarkan adalah relevan, terkini serta selaras dengan kemajuan teknologi IR4.0. Selain itu, program-program akademik yang perlu dijumudkan, dibekukan atau dimansuhkan bagi memberi laluan kepada penawaran program baharu yang memenuhi keperluan semasa dapat dikenal pasti.

ii. Melaksanakan saringan awal yang ketat terhadap setiap program akademik yang ditawarkan oleh IPT;

Kajian analisis secara terperinci terhadap program-program akademik yang akan ditawarkan atau dilaksanakan oleh Institusi Pendidikan Tinggi (IPT) supaya hanya program yang menjadi fokus dan keperluan guna tenaga negara sahaja yang ditawarkan. Selain itu, program akademik yang kekal dalam penawaran perlu memenuhi aspek keperluan tenaga negara, laluan kerjaya dan tahap kebolehpasaran graduan, tidak bertindih dengan program akademik sedia ada di kalangan IPT, serta menepati aspek implikasi kewangan, perjawatan dan fizikal serta perkembangan polisi dan dasar terkini negara.

iii. Memperkukuh inisiatif sedia ada seperti program pengajian mod 2u2i;

Program 2u2i adalah pembelajaran berasaskan pekerjaan (*work based learning*) yang menggabungkan pembelajaran akademik di dalam kampus dan pengalaman di industri. Program ini

menggunakan pelbagai kombinasi seperti 3u1i, 2u2i, dan 2u1i di mana tempoh pembelajaran berlaku di dalam dunia pekerjaan sebenar (industri) adalah sekurang-kurangnya 1 tahun.

iv. Memperkenalkan inisiatif *Experiential Learning and Competency-Based Education Landscape (EXCEL)*;

Kerangka EXCEL sebagai transformasi program akademik ini mengintegrasikan elemen industri, komuniti, penyelidikan dan fleksibiliti (*personalised*) dalam menghasilkan graduan yang mempunyai atribut dan kemahiran dari pembelajaran berasaskan pengalaman dan pendidikan berasaskan kompetensi.

Dari segi statistik pula, Kajian Pengesanan Graduan yang dilaksanakan oleh KPT menunjukkan kadar kebolehpasaran graduan telah meningkat sebanyak 1.1 peratus kepada 85.5 peratus pada tahun 2021 berbanding sebanyak 84.4 peratus pada tahun 2020. Selain itu, bilangan graduan yang telah bekerja dalam tempoh enam (6) bulan setelah bergraduasi meningkat daripada 156,525 orang pada tahun 2020 kepada 176,256 orang pada tahun 2021.

Berdasarkan kajian ini juga, pada tahun 2021, 71,288 graduan telah bekerja dalam kumpulan pekerjaan mahir (iaitu kumpulan Profesional dan Pengurusan) berbanding 59,415 graduan pada tahun 2018. Tiga bidang pengajian yang menunjukkan bilangan graduan paling tinggi bekerja dalam kumpulan Pengurusan dan Profesional adalah Sains Sosial, Perniagaan dan Perundangan; Sains, Matematik dan Komputer; serta Bidang Kejuruteraan, Pembuatan dan Pembinaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : YB DATUK SERI PANGLIMA HAJI MOHD
SHAFIE BIN HAJI APDAL
[SEMPORNA]
TARIKH : 04 OGOS 2022 (KHAMIS)

SOALAN

Datuk Seri Panglima Haji Mohd Shafie Bin Haji Apdal [Semporna] minta **MENTERI KEWANGAN** menyatakan secara terperinci alasan, tuntutan dan halangan yang dinyatakan oleh '*Big Four Telcos*' kepada Kerajaan daripada memeterai perjanjian borong 5G atau memperoleh kepentingan dalam Digital Nasional Bhd (DNB) dan apakah implikasinya kepada Kerajaan dan rakyat sekiranya tuntutan-tuntutan mereka dipenuhi.

JAWAPAN

Tuan Yang Dipertua,

Izinkan saya menjawab secara bersekali soalan-soalan berkaitan Digital Nasional Berhad (DNB) daripada YB Ledang dan YB Semporna.

Secara umumnya, DNB sedang menjalankan **perbincangan secara berterusan** bersama syarikat Telekomunikasi mengenai pelaksanaan rangkaian 5G serta Perjanjian Akses Borong (*Wholesale Access Agreement*) dan Penyertaan Ekuiti oleh syarikat Telekomunikasi dengan penglibatan pihak Suruhanjaya Komunikasi dan Multimedia Malaysia (SKMM) sebagai agensi kawal selia.

Di antara perkara yang dirundingkan termasuklah **akses yang adil dan tanpa diskriminasi, standard prestasi, penentuan harga dan tadbir urus.**

Untuk makluman Dewan yang mulia, **industri telekomunikasi Malaysia menyokong pelan pelaksanaan 5G Kerajaan melalui Rangkaian Borong Tunggal** (*Single Wholesale Network* atau SWN) seperti yang dinyatakan oleh Pengerusi Kumpulan AXIATA serta ketua-ketua syarikat telekomunikasi yang lain.

Berdasarkan perbincangan dan sesi libat urus yang dijalankan, **dijangkakan kesemua syarikat Telekomunikasi akan dapat menawarkan perkhidmatan 5G tidak lama lagi.**

Setakat penghujung bulan Jun 2022, kesemua 6 buah pengendali rangkaian mudah alih telah secara rasminya membuat permohonan akses dan sedang di dalam proses untuk mengintegrasikan rangkaian masing-masing dengan rangkaian 5G DNB. Setelah proses integrasi selesai, syarikat Telekomunikasi dijangka berupaya menawarkan perkhidmatan 5G kepada pelanggan.

Berhubung penyertaan ekuiti, kesemua 6 buah pengendali rangkaian mudah alih telah menandatangani Terma Pelaburan (*Term Sheet*) yang mengandungi terma komersial utama bagi penyertaan Ekuiti sebelum tarikh akhir 30 Jun 2022. Terkini, kesemua pihak sedang memuktamadkan perjanjian rasmi Penyertaan Ekuiti tertakluk kepada kelulusan berdasarkan proses tadbir urus dalaman syarikat-syarikat telekomunikasi.

Tuan Yang Dipertua,

Mengenai soalan kedua, terdapat beberapa syarikat Telekomunikasi antarabangsa yang telah mendekati pihak Kerajaan dan menyatakan minat untuk mengambil bahagian dalam pegangan saham DNB, namun saya **belum dapat mendedahkan perincian** perbincangan atas faktor kerahsiaan.

Sekian, Tuan Yang Dipertua.

**PEMBERITAHUAN PERTANYAAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN SYED IBRAHIM BIN SYED NOH
[LEDANG]**

TARIKH : 4 OGOS 2022 (KHAMIS)

SOALAN

Tuan Syed Ibrahim bin Syed Noh [Ledang] minta MENTERI KOMUNIKASI DAN MULTIMEDIA menyatakan:

- (a) perincian tindakan dan hasil daripada usaha Kementerian dalam membanteras jenayah membabitkan pembocoran maklumat serta privasi rakyat Malaysia; dan
- (b) impak jenayah kepada keselamatan masyarakat awam dan maklumat sensitif melibatkan rakyat dan negara.

JAWAPAN

Tuan Yang di-Pertua,

Kementerian Komunikasi dan Multimedia (K-KOMM) melalui Jabatan Perlindungan Data Peribadi (JPDP) sentiasa bekerjasama dengan agensi Kerajaan yang lain seperti Agensi Keselamatan Siber Negara (*National Cyber Security Agency* - NACSA) serta Polis Diraja Malaysia (PDRM) untuk menangani insiden kebocoran data.

Dalam hal ini, bagi transaksi komersial, kegagalan mematuhi prinsip-prinsip di bawah Akta Perlindungan Data Peribadi 2010 [Akta 709], jika disabitkan kesalahan, boleh membawa kepada denda tidak melebihi RM500,000 atau hukuman penjara tidak melebihi tiga tahun atau kedua-duanya sekali.

JPDP selaku badan kawal selia yang menguatkuasakan Akta 709, sentiasa mengambil pelbagai langkah untuk meningkatkan kesedaran mengenai Akta 709 untuk menjamin keselamatan data peribadi dalam transaksi komersial di Malaysia.

Pelbagai program *outreach* seperti Persidangan Perlindungan Data Peribadi, webinar, sesi konsultasi dan khidmat nasihat serta program kolaborasi di serata negara giat dilaksanakan termasuklah program di kawasan luar bandar bagi mendidik usahawan-usahawan tempatan untuk meningkatkan kefahaman mengenai kepentingan melindungi data peribadi.

Suruhanjaya Komunikasi dan Multimedia Malaysia (SKMM) juga mengeluarkan nasihat awam mengenai ancaman-ancaman terbaru yang perlu diberikan perhatian oleh orang ramai dan melaksanakan program advokasi dan kesedaran pengguna. Antaranya seperti memastikan ciri-ciri keselamatan seperti menggunakan kata laluan yang sukar dibuka dan mengaktifkan pengesahan dua langkah (*2-Factor Authentication*).

JPDP juga turut melibatkan pihak industri dalam membangunkan Kod Tata Amalan (KTA) Perlindungan Data Peribadi yang perlu dipatuhi oleh

pihak industri bagi memastikan kebolehlaksanaan dan kelancaran prosedur berkaitan pemprosesan data peribadi terutama dari sudut perundangan sedia ada satu-satu sektor dan seterusnya menjamin keselamatan data tersebut.

Pemeriksaan ke atas sistem data peribadi pengguna data seperti yang diperuntukkan di bawah Seksyen 101 dan Seksyen 48 Akta 709 juga dilaksanakan selai menjalinkan kerjasama erat dengan agensi Kerajaan yang berkepentingan seperti NACSA dan PDRM bagi melaksanakan penguatkuasaan dan siasatan berterusan ke atas kes-kes kebocoran dan penjualan data peribadi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

DARIPADA : TUAN YUSUF BIN ABD. WAHAB (TANJONG MANIS)

TARIKH : 4 OGOS 2022 (KHAMIS)

SOALAN

TUAN YUSUF BIN ABD. WAHAB (TANJONG MANIS) minta **MENTERI PERTANIAN DAN INDUSTRI MAKANAN** menyatakan apakah perancangan mampan pihak Kementerian untuk mengatasi atau membendung kenaikan harga baja dan racun pertanian yang mendadak naik sejak kebelakangan ini. Apakah bantuan atau insentif yang ditawarkan untuk membantu petani dan peladang yang terkesan akibat kenaikan harga bahan-bahan ini.

JAWAPAN

Tuan Yang di-Pertua,

Untuk makluman Ahli Yang Berhormat, kenaikan harga input pertanian seperti baja dan racun yang berlaku berpunca daripada beberapa faktor seperti perubahan dasar negara pengeksport, kenaikan kos bahan mentah serta kenaikan kos logistik. Konflik geopolitik dunia seperti krisis Rusia-Ukraine juga telah memberi kesan terhadap rantai bekalan makanan dunia dan Malaysia tidak terkecuali dari menerima tempiasnya.

Kerajaan memandang serius perkara ini dan beberapa langkah telah diambil bagi membantu para petani, pekebun kecil serta peladang bagi mengurangkan beban kenaikan kos input pertanian seperti berikut:-

- i. Penyediaan Dana Pembiayaan Agromakanan Keluarga Malaysia (DPAKM) sebanyak RM800 juta bagi menjamin kesinambungan aktiviti pengeluaran makanan di bawah Agrobank;
- ii. Pemberian Subsidi Padi sebanyak RM1.5 bilion merangkumi Skim Baja Padi Kerajaan Persekutuan (SBPKP), Skim Insentif Pengeluaran Padi (SIPP), Insentif Benih Padi Sah (IBPS) dan Skim Baja dan Racun Padi Bukit (SBRPB) serta tambahan peruntukan sebanyak RM62 juta bagi Skim Insentif Pengeluaran Padi (SIPP) yang memberi manfaat kepada 322,830 orang pesawah;
- iii. Peruntukan sebanyak RM200 juta di bawah Tabung Ekonomi Kumpulan Usahawan Niaga (TEKUN) dan Agrobank sebagai pinjaman pada kadar faedah sifar peratus dan moratorium bayaran balik pinjaman selama enam bulan bagi membantu 276,621 orang pengusaha tanaman sayur-sayuran serta buah-buahan;
- iv. Menggalakkan petani mengamalkan Pengurusan Perosak Bersepadu (*Integrated Pest Management*) bagi mengurangkan kebergantungan terhadap racun kimia melalui kawalan secara kultura, kawalan fizikal dan kawalan biologi;
- v. Meningkatkan amalan pertanian baik melalui program pensijilan myGAP dan myOrganik. Amalan pertanian baik merupakan suatu sistem pengurusan sumber di dalam pengeluaran pertanian secara lestari di mana penggunaan baja dan racun adalah mengikut kitaran dan keperluan tanaman;
- vi. Menggalakkan penggunaan teknologi-teknologi moden seperti fertigasi dan *control environment farming*. Fertigasi merupakan kaedah penanaman menggunakan air baja yang dibekalkan mengikut masa yang ditetapkan kepada tanaman bagi mengelakkan berlakunya pembaziran penggunaan baja manakala

control environment farming merupakan satu sistem yang mengawal keperluan tanaman seperti cahaya, air, suhu dan kelembapan supaya tanaman dapat tumbuh dengan lebih sihat dalam persekitaran yang dikawal.

- vii. Menggunakan benih-benih berkualiti dan varieti yang rentan penyakit dan perubahan iklim. Benih-benih berkualiti dan varieti yang rentan penyakit dan perubahan iklim akan dapat membantu tumbesaran tanaman tanpa terlalu bergantung kepada baja dan racun.
- viii. Penggunaan kaedah *soil profiling* yang membantu mengenalpasti kandungan nutrien yang tersedia di dalam tanah dan membolehkan penggunaan baja dilaksanakan secara efisien mengikut kuantiti yang diperlukan oleh tanaman sahaja.
- ix. Menggalakkan dan mempromosikan penggunaan input pertanian berasaskan mikroorganisma berfaedah *Effective Microorganism* seperti '*Plant Booster*', '*Growth Enhancer*' dan '*Bokashi*';
- x. Menggalakkan penggunaan bahan sisa tanaman seperti jerami padi untuk dijadikan baja kompos; dan
- xi. Menjalankan aktiviti pengembangan bagi mendidik petani untuk menggunakan baja dan racun mengikut keperluan dan sukatan yang tepat dengan teknik-teknik yang betul supaya penggunaan racun dan baja adalah berkesan.

Sekian, terima kasih.